

萬有文庫

第ニ集七百種

王雲五主編

宋文鑑

(五十)

呂祖謙証次

商務印書館發行

鑑文 宋
(五十)
次謙祖

國學基本叢書

宋文鑑卷第一百三十

題跋

跋放生池碑

歐陽脩
跋華嶽題名

歐陽脩
跋平泉草木記

歐陽脩
跋景陽井銘

歐陽脩
跋王獻之法帖

歐陽脩
讀李翹文

歐陽脩
讀封禪書

歐陽脩
書种放事

歐陽脩
書襄城公主事

歐陽脩
書洪範傳後

歐陽脩
讀江南錄

歐陽脩
讀孟嘗君傳

歐陽脩
書刺客傳後

歐陽脩
劉敞

歐陽脩
歐陽脩

讀柳宗元傳

王安石

書沿淮巡檢廳壁

傅堯俞

書賈偉節廟

傅堯俞

書魏鄭公傳

曾鞏

書資治通鑑外紀後

劉恕

跋放生池碑

歐陽脩

右放生池碑不著書撰人名氏。放生池唐世處處有之。王者仁澤及於草木昆蟲。使一物必遂其生而不爲私惠也。惟天地生萬物所以資於人。然代天而治物者常爲之節。使其足用而取之不過。萬物得遂其生而不夭。三代之政如斯而已。易大傳曰。庖犧氏之王也能通神明之德。以類萬物之情作結繩而爲罟。以佃以漁。蓋言其始教民取物資生而爲萬世之利。此所以爲聖人也。浮屠氏之說乃謂殺物者有罪。而放生者得福。苟如其言。則庖犧氏遂爲人間之聖人地下之罪人矣。

跋華嶽題名

歐陽脩

右華嶽題名自唐開元二十三年訖後唐清泰二年實二百一年題名者五百人。一人再題者又三十三人。錄爲十卷。往往當時知名士也。或兄弟同遊。或子姪並侍。或寮屬將佐之咸在。或山人處士之相携。或奉使奔命。有行役之勞。或窮高望遠。極登臨之適。其富貴貧賤歡樂憂悲。非惟人事百端。而亦世變多故。開元二十三年歲在丙午。是歲天子耕籍田肆大赦。羣臣方頌太平。請封禪。蓋有唐極盛之時。清泰二年。

歲在乙未廢帝篡立之明年也是歲石敬瑭以太原召契丹入自雁門廢帝自焚于洛陽而晉高祖入自太原五代極亂之時也始終二百年間或治或亂或盛或衰而往者來者先者後者雖窮達壽夭參差不齊而斯五百人者卒歸于共盡也其姓名歲月風霜剝裂亦或在或亡其存者有千仞之山石爾故時錄其題刻每撫卷慨然何異臨長川而歎逝者也

跋平泉草木記

歐陽脩

右平泉草木記李德裕撰余嘗讀鬼谷子書見其馳說諸侯之國必視其爲人材性賢愚剛柔緩急而因其好惡喜懼憂樂而捭闔之陽開陰塞變化無窮顧天下諸侯無不在其術中者惟不見其所好者不可得而說也以此知君子宜慎其好蓋泊然無欲而禍福不能動利害不能誘此鬼谷之術所不能爲者聖賢之高致也其次簡其所欲不溺於所好斯可矣若德裕者處富貴招權利而好奇貪得之心不已至或疲弊精神于草木斯其所以敗也其遺戒有云壞一草一木者非吾子孫此又近乎愚矣

跋景陽井銘

歐陽脩

景陽井銘不著撰人名述隋滅陳叔寶與張麗華等投井事其後有銘以戒又有唐江寧縣丞王震井記云井在興嚴寺其石檻銘有序稱余者晉王廣也其文字皆磨滅僅可識者其十二叔寶事史書之甚詳不必見于此然錄之以見煬帝躬自滅陳目見叔寶事又嘗自銘以爲戒如此及身爲淫亂則又過之豈所謂下愚之不移者哉今其銘文隱隱尚可讀處有云前車已傾負乘將沒者又可歎也

跋王獻之法帖

歐陽脩

右王獻之法帖余嘗喜覽魏晉以來筆墨遺跡而想前人之高致也所謂法帖者其事率皆弔哀候病敍曠離通訊問施於家人朋友之間不過數行而已蓋其初非用意而逸筆餘興淋漓揮灑或妍或醜百態橫生披卷發函爛然在目使人驟見驚絕徐而視之其意態愈無窮盡故使後世得之以爲奇覩而想見其人也於高文大冊何嘗用此而今人不然至或棄百事滋弊精疲力以學書爲事業用此終老而窮年者是真可笑也

讀李翹文

歐陽脩

予始讀復性書三篇曰此中庸之義疏爾智者識其性嘗復中庸愚者雖讀此不曉也不作可焉又讀與韓侍郎薦賢書以謂翹特窮時憤無薦己者故丁寧如此使其得志亦未必然以翹爲秦漢間好事行義之一豪雋亦善諭人者也最後讀幽懷賦然後置書而歎不已復讀不自休恨翹不生于今不得與之交又恨予不得生翹時與翹上下其論也況迺翹一時有道而能文者莫若韓愈愈嘗有賦矣不過羨二鳥之光榮歎一飽而無時爾推是心使光榮而飽則不復云矣若翹獨不然其賦曰衆囂囂而雜處兮咸歎老而嗟卑視予心之不然兮慮行道之猶非怪神堯以一旅取天下後世子孫不能以天下取河北以爲憂嗚呼使當時君子皆易其歎老嗟卑之心爲翹所憂之心則唐之天下豈有亂與亡哉然翹幸不生今時見今之事則憂又甚矣奈何今之人不憂也余行天下見人多矣脫有一人能知翹憂者又皆疏遠與翹無異其餘光榮而飽者一聞憂世之言不以爲狂人則以爲病子不怒則笑之矣嗚呼在位而不肯自憂又禁他人使皆不得憂可歎也矣

讀封禪書

劉敞

劉子曰新垣平候日再中文帝以建元言汾陰有寶鼎氣乃效於後平之于術亦可免矣其卒以詐死爲世大僇何哉彼以其術爲遠而飾之以巧以其利爲迂而益之以謗者也敗不亦宜乎是故博學而精擇之正言而謹守之不爲□久變志不以利鈍遷慮辟此患也莊周有言毋以人徇天毋以故滅命豈新垣平之謂耶悲夫

書种放事

王回

景德二年右諫議大夫种放賜假遊嵩山真宗御資政殿置酒餞放侍臣當直者四人預之時有司不宿戒宣召旣集皆相顧莫敢就坐上乃親定其儀翰林學士晁迥西面侍上資政殿學士王欽若東面侍上知制誥朱巽南次迴待制戚綸南次欽若放北面對上示特客之云酒半上作七言詩一首賜放放奉和侍臣應詔皆作而欽若最後成二首焉初放養其母隱終南山講經書著嗣禹表孟子文秦蜀諸生多從之游其母好道家言脩辟穀之術放阿其好終身不娶婦世以其能行人之所難益高之朝臣屢表薦聞太宗召之辭疾不出上卽位張齊賢以舊相守京兆又薦焉乃遣內供奉官周班齋手詔召放放應召旣至拜右司諫直昭文館賜名第什器御廚給膳四遷至工部侍郎卒放雖居官屢請假還山上輒爲作詩置酒餞之後賜兩制三館學士等御筵餞於瓊林苑常手詔問以政事欲大用之放辭乃止昔堯起舜于畎畝之中位以司徒商高宗起傅說于岩野而位冢宰彼授受之際不嫌駭衆如此而功烈竟立豈藉其虛名而誕後世哉竊觀真宗特禮寵放近世天子蓋未聞也而放之行乃叛其所學以棄人倫爲難有君

而無臣惜哉。放既正已不足，則其用捨行止之節曷議焉。

書襄城公主事

王回

唐太宗長女襄城公主出降太常卿汾州刺史蕭銳。初公主在女時篤行好禮。太宗賢之。嘗指以誨諸公主。旣降銳。銳父宋國公瑀尙無恙。而太宗敕有司爲公主起第。公主辭曰：「婦事舅姑如子事父。定省朝夕。所以養也。而營別居者。據何理也？」太宗不許。而公主固辭不可奪。太宗乃卽瑀之私第。其旁隋煬舊晉邸。葺以爲襄城公主第。第成。當施公主槩載於門。公主又辭曰：「禮無以抗於尊者爲榮也。今舅之門旣立戟矣。而更于女門施戟。是婦抗於舅而爲禮。豈所以榮女也？」太宗不許。而公主終辭不可奪。太宗乃勑以公主槩載并施于宋國公之門。昔堯將任舜以天下。以二女嬪之畎畝之中。而不敢留于帝室者。以舜有父母。未順其心。雖與天下舜必不受也。使舜受之。顧非所以任天下者也。周之王姬嫁于諸侯。車服不繫其夫。猶執婦道以成肅雌之德。故其詩曰：「曷不肅雝。王姬之車。」自秦以來。祖於申韓之術。其治務以隆君抑臣爲盛。天子之女特創其號曰公主。而婿者不得自當其妃匹。曰：「尙公主。其弊之漸。至于父母不敢畜其子。舅姑不敢畜其婦。原其故。以隆君抑臣爲治也。而使人倫諱于上。風俗壞于下。又豈所以隆君而治哉。」三而僅從其心。則化公主之有舅姑者。益亦別居耳。蓋弊流于千載者。雖願治之明主。猶不遽變其習也。而一女子卓然出其間。可不謂賢哉。

書洪範傳後

王安石

王安石曰。古之學者雖問以口而其傳以心。雖聽以耳而其受者意故爲師者不煩而學者有得也。孔子曰。不憤不啓。不排不發。舉一隅不以三隅反則不復也。夫孔子豈敢愛其道。驚天下之學者而不使蚤有知乎。以謂其問之不切。則其聽之不專。其思之不深。則其取之不固。不專不固而可入者口耳而已矣。吾所以教者。非將善其口耳也。孔子沒。道日以衰熄。浸淫至于漢。而傳注之家作爲師。則有講而無應。爲弟子。則有讀而無問。非不欲問也。以經之意爲盡于此矣。吾可以無思而得也。夫如此。使其傳注者皆已善矣。固足以善學者之口耳。而以經之意爲盡于此矣。吾可以無問而得也。豈特無問。又將無思。非不欲思也。以經之意爲盡于心。況其有不善乎。宜其歷年以千數。而聖人之經卒于不明。而學者莫能資其言以施于世也。予悲夫。洪範者。武王之所以虛心而問。與箕子之所以悉意而言。爲傳注者汨之。以至于今冥冥也。于是爲作傳。以通其意。嗚呼。學者不知古之所以教。而蔽于傳注之學也久矣。當其時。欲其思之深問之切。而後復正歟。則吾將孰待而言耶。孔子曰。子欲無言。然未嘗無言也。其言也。蓋有不得已焉焉也。孟子則天下固以爲好辨。蓋邪說暴行作。而孔子之道幾於熄焉。孟子苟不如是。不足與有明也。故孟子曰。予豈好辨哉。予不得已也。夫予豈樂反古之所以教。而重爲此譊譊哉。其亦不得已焉者也。

讀江南錄

王安石

故散騎常侍徐公鉉。奉太宗命撰江南錄。至李氏亡國之際。不言其君之過。但以歷數存亡論之。雖有愧于實錄。其於春秋之義。春秋臣子爲君親禮也。箕子之說。周武王克商間商所以亡。箕子一不忍言商惡。徐氏錄爲得焉。然吾聞國之將亡。必有大惡者。無大于殺忠臣。國君無道。不殺忠臣。雖不至於治。亦不至于亡。紂爲君至暴矣。武王觀兵。

於孟津。諸侯伐紂。武王曰未可。及聞其殺王子比干。然後知其將亡也。一舉而勝焉。季梁在隨。隨人雖亂。楚人不敢加兵。虞不用宮之奇之言。晉人始有納璧假道之謀。然則忠臣國之與也。存與之存。亡與之亡。予自爲兒童時。已聞金陵臣潘佑以直言見殺。當時京師因舉兵來伐。數以殺忠臣之罪。及得佑所上諫李氏表觀之。詞意質直忠臣之言。予諸父中舊多爲江南官者。其言金陵事頗詳。聞佑所以死則信。然則李氏之亡不徒然也。今觀徐氏錄。言佑死頗以妖妄。與予舊所聞者甚不類。不止于佑。其它所誅者皆以罪戾何也。予甚怪焉。若以商紂及隨虞二君論之。則李氏亡國之君必有濫誅。吾知佑之死信爲無罪。是乃徐氏匿之耳。何以知其然。吾以情得之。大凡毀生于嫉。嫉生于不勝。此人之情也。吾聞鉉與佑皆李氏臣。而俱稱有文學。十餘年爭名于朝廷。當李氏之危也。佑能切諫。鉉獨無一說。佑見誅。鉉又不能力諍。卒使其君有殺忠臣之名。踐亡國之禍。皆鉉之由也。鉉懼此過而又恥其善及于佑。故匿其忠。而汙以它罪。此人情之常也。以佑觀之。其它所誅者又可知矣。噫。若果有此。吾謂鉉不惟厚誣忠臣。其欺吾君不亦甚乎。

讀孟嘗君傳

王安石

世皆稱孟嘗君能得士。士以故歸之。而卒賴其力。以脫于虎豹之秦。嗟乎。孟嘗君特雞鳴狗盜之雄耳。豈足以得士。不然。擅齊之彊。得一士焉。宜可以南面而制秦。尙取雞鳴狗盜之力哉。夫雞鳴狗盜之出其門。此士之所以不至也。

書刺客傳後

王安石

曹沫將而亡人之城，又劫天下盟主管仲，因勿倍以市信一時可也。予獨怪智伯國士豫讓，豈顧不用其策耶？讓誠國士也，曾不能逆策三晉救智伯之亡，一死區區尙足校哉？其亦不欺其意者也。聶政售于嚴仲子，荆軻豢于燕太子丹，此兩人者，汙隱困約之時，自貴其身，不亡願知，亦曰有待焉。彼挾道德以待世者，何如哉？

讀柳宗元傳

王安石

余觀八司馬皆天下之奇材也。一爲叔文所誘，遂陷于不義。至今士大夫欲爲君子者，皆羞道而喜攻之。然此八人者既困矣，無所用于世，往往能自彊以求別于後世，而其名卒不廢焉。而所謂欲爲君子者，吾多見其初而已。要其終，能毋與世俯仰以自別于小人者少耳。復何議于彼哉？

書汾淮巡檢廳壁

傅堯俞

巡檢職捕盜，職舉則盜去，如失其職，兵皆盜也。何則？上既不戢，下從而縱，恃賴勢力，侵漁良民，非盜而何？噫！鼠竊狗偷者，逐可去；捕可擒，係繫囚戮，其勢易制。至于士兵，一得縱放，則欺擾公行使，民口膠舌結，噤不敢出聲，是誠盜之巨者。新息腋淮面山地，雖褊隘，實爲咽喉，故置巡檢、提健兵百人，以遏狂寇。官事脩舉，民倚之得安存，一非其人，下罹苦害。以區區之邑，若先用百盜，縱乎其間，傍與它盜者併力，賊之則雖欲背死趨生路，亦無繇也。曹君德華受命職捕盜，既至，頗革前弊，約身廉馭，兵嚴士不敢犯。民則向所謂百盜者，固以息矣。于是封域靜寧，帖焉亡驚。居日多暇，頗圖燕安。先是視事廳風頽雨剝，殆不可居。德華醜之，命工新其棟宇，雖有取于民，半出私奉，規模宏偉，數倍平昔，可以示壯大。若益堅其廉，益勵其嚴，雖

亡是廳不害居是廳不愧苟弛其廉忘其嚴則是廳廣豁邃深軒危瑰琦更盛于今日亦奚以爲哉徒增過重不德耳後人至者其廉與嚴思有以上曹君可也若曰某屋未豐于是廳某屋未華于是廳思以士木之功加之則可乎不可也吾懼來者不知而務侈以殘吾民志壁以示之

書賈偉節廟

傅堯俞

息之滅亡移徙尙矣其俗頗好鬼視正直聰明之神則反蔑如先是邑之南幾十數里有其故侯之廟國人事之簫鼓豆牢歲時甚謹而公之祠在新城之北密邇民間不遠數步門宇不崇奠享不恭人之至者歲無一二予甚疑乘間因詢諸故老僉曰侯之祠不信不祀則禍福時至賈公之神雖不祭不我爲害予曰嘻來吾語爾侯爲息之君不能保有爾衆至于喪社稷而亡國其身殞則其靈歇惡乎能驚動此民而禍福加于後世此其怪妖依憑恐諸愚以倅祀爾若賈公者其民之主乎昔爾之先有子曰男曰女皆殺而不育公爲邑之長嚴爲制而禁之賴是生者以千數非公息民其遂絕爾將安出昔之男爾民之父也昔之女爾民之母也活爾父母而不報可乎況公之英風與靈氣固當未泯以昔時之人今日未必無陰相也反以其不禍誣以其不能而怠之罪孰甚焉爾歸厚報爾之主可也無爲奔走乎怪妖之庭況禮曰有功德于民則祀之是公之堂可祀而侯之廟可廢惜也吾之賤而侯之廟在籍去之不可爾聽吾言而亟改則爾之休蔑矣僉曰唯而心不以爲然事如初異日過公之祠登公之堂傷民之過遂志于壁曰活爾父母莫報不舉實吾神之侮爲民禍尤豆牢是求則吾神之羞我瞻公之象昂昂可仰我想公之靈英如生厚矣公德在息之國嗟哉息民忘公之仁嗚呼怪妖是謠明靈是誣爾則無知神不爾誅

書魏鄭公傳

曾 翩

予觀太宗嘗屈己以從羣臣之議。而魏鄭公之徒喜遭其時。感知已之遇事之大小。無不諫諍。雖其忠誠自主。亦得君以然也。則思唐之所以治。太宗之所以稱賢主。而前世之不及者。其淵源皆出于此也。能知其有此者。以其書存也。及觀鄭公以諫諍事付史官。而太宗怒之。薄其恩禮。失終始之義。則未嘗不反覆嗟惜。恨其不思而益知鄭公之賢焉。夫君之使臣與臣之事君者。何大公至正之道而已矣。大公至正之道。非滅人言以掩已過。取小亮以私其君。此其不可者也。又有甚不可者。夫以諫諍爲當掩。是以諫諍爲非美也。則後世誰復當諫諍乎。況前代之君有納諫之美。而後世不見。則非惟失一時之公。又將使後世之君。謂前代無諫諍之事。是啓其怠且忌矣。太宗末年。羣下既知此意而不言。漸不知天下之得失。至于遼東之敗。而始恨鄭公不在世。未嘗知其悔之萌芽出于此也。夫伊尹周公何如人也。伊尹周公之諫諍。其君者。其言至深。而其事至迫也。筆之于書。未嘗掩焉。至今稱太甲成王爲賢君。而伊尹周公爲良相者。以其書可見矣。令當時削而棄之。成區區之小讓。則後世何所據依而諫。又何以知其賢且良。與桀紂幽厲始皇之亡。則其臣之諫諍無見焉。非其史之遺。乃天下不敢言而然也。則此諫諍之無傳。乃此數君之所以益暴其惡于後世而已矣。或曰春秋之法。爲尊親賢者諱。與此戾也。夫春秋之所諱者惡也。納諫諍豈惡乎。然則焚藁者非歟。曰焚藁者誰歟。非伊尹周公爲之也。近世取區區之小亮者爲之耳。其事又未善也。何則。以焚其藁爲掩君之過。而使後世傳之。則是使後世不見藁之是非。而必其過。常在于君。美常在于已也。豈愛而君之謂歟。孔光之去其藁之所言。其在正邪。未可知也。其焚之而惑後世。庸詎知非謀。

已之奸計乎。或曰造辭而言。詭辭而出。異乎此。曰。此非聖人之所曾言也。令萬一有是理。亦謂君臣之間。議論之際。不欲漏其言于一時之人耳。豈杜其告萬世也。噫以誠信待已。而事其君而不欺乎萬世者。鄭公也。益知其賢云。豈非然哉。豈非然哉。

書資治通鑑外紀後

劉恕

劉恕曰。孔子作春秋。筆削美刺。子游子夏聖門之高弟。不能措一辭。魯太史左丘明以仲尼之言高遠難繼。而爲之作傳。後之君子不敢紹續焉。惟陸長源唐春秋。吳楚之君僭號稱王。誅絕之罪也。左氏傳據魯史。因諸侯國書。繫年敍事。春秋所貶損大人當世君臣有威權勢力。其事實皆形于傳。故隱其書而不宣。以免時難。後漢獻帝以班固漢書文繁難省。命荀悅依左傳體爲漢紀。言約事詳。大行于世。晉太康初。汲郡人發魏襄王冢。得紀年文似春秋。其所記事多與左氏符同。諸儒乃知古史記之正法。自是袁宏、張璠、孫盛、千寶、習鑿齒以下。爲編年之書。至唐五代。其流不廢。漢晉起居注、梁唐實錄。皆其遺制也。國語亦左丘明所著。載內傳遺事。或言論差殊。而文詞富美。爲書別行。自周穆王盡。晉知伯趙襄子。當貞定王時。凡五百餘年。雖事不連屬。于史官蓋有補焉。七國有戰國策。晉孔衍作春秋後語。並時分國。其後絕不錄焉。唐柳宗元采摭片言之失。以爲誣淫。不概于聖。作非國語六十七篇。其說雖存。然不能爲國語輕重也。司馬遷始撰本紀。年表八書。世家列傳之目。史臣相續。謂之正史。本朝去古益遠。書益煩雜。學者牽于屬文。專尚西漢書。博覽者乃及史記。東漢書而近代士頗知。唐書自三國至隋。下逮五代。懵然莫識。承平日久。人愈怠惰。莊子文簡而義明。玄言虛誕而似理。功省易習。陋儒莫不尚之。史學浸微矣。案歷代國史。其流

出于春秋劉歆敍七略王儉撰七志史記以下皆附春秋荀勗分四部史配舊事入丙部阮孝緒七錄記傳錄記史傳由是經與史分夫今之所以知古後之所以知今因善惡以明褒貶察政治以見興衰春秋之法也使孔子贊易不作春秋則後世以史書爲記事瑣雜之語春秋列于六藝愚者莫敢異說而終不能曉也恕皇祐初舉進士試于禮部爲司馬公門生侍于大儒得聞餘論嘉祐中公嘗謂恕曰春秋之後迄今千餘年史記至五代史一千五百卷諸生歷年莫能竟其篇第畢世不暇舉其大略厭煩取易行將泯絕予欲託始于周威烈王命韓魏趙爲諸侯下訖五代因丘明編年之體倣苟悅簡要之文網羅衆說成一家書恕曰司馬遷以良史之才敍黃帝至秦漢興亡治亂班固以下世各名家李延壽總八朝爲南北史而言詞卑弱義例煩雜書無表志沿革不完梁武帝通史唐姚康復統史近世亡軼不足稱也公欲以文章論議成歷世大典高勳美德褒贊流於萬世元寃宿姦貶繙甚于誅殛上可繼仲尼之經丘明之傳司馬遷安可比擬苟悅何足道哉治平三年公以學士爲英宗皇帝侍講受詔脩歷代君臣事迹恕蒙辟置史局嘗請于公曰公之書不始于上古或堯舜何也公曰周平王以來事包春秋孔子之經不可損益曰曷不始于獲麟之歲曰經不可續也恕乃知賢人著書尊避聖人也如是儒者可以法矣熙寧三年冬公出守京兆明年春移帥潁川固辭不行退居洛陽恕褊狷好議論不敢居京師請歸江東養親又以新書未成不廢刊削恕亦遙隸局中嘗思司馬遷史記始于黃帝而庖犧神農闕漏不錄公爲歷代書而損不及春秋則無與於聖人之經包犧至未命三晉爲諸侯比于後事百無一二可爲前紀本朝一祖四

宗一百八年可請實錄國史於朝廷爲後紀昔何承天樂資作春秋前後傳亦其比也將俟書成請于公而爲之熙寧九年恕罹家禍悲哀憤懣遂中癱瘓右肢既廢凡欲執筆口授稚子義仲書之常自念平生事業無一成就史局十年俛仰竊祿因取諸書以國語爲本編通鑑前紀家貧書籍不具南徵僻陋士人不藏書臥病六百日無一人語及文史昏亂遺忘煩簡不當遠方不可得國書絕意于後紀乃更前紀曰外紀如國語稱春秋外傳之義也自周共和元年庚申至威烈王二十二年丁丑四百三十八年見于外紀自威烈王二十三年戊寅至周顯德六年己未一千三百六十二年載于通鑑然後一千八百年之興廢大事坦然可明昔李弘基用心過苦積年疾而藥石不繼盧昇之手足攢廢著五悲而自沉潁水予病眼病創不寐不食才名不逮二子而疾疹艱苦過之陶潛豫爲祭文杜牧自撰墓志夜臺甫邇歸心若飛聊序不能作前後紀而爲外紀焉它日書成公爲前後紀則可刪削外紀之煩冗而爲前紀以備古今一家之言恕雖不及見亦平生之志也

宋文鑑卷第一百三十一

題跋

書東臯子傳後

書黃子思詩集後

題唐氏六家書後

題逸少帖

書鮮于子駿八詠後

書鄭玄傳

題論衡後

書鄭玄傳

題張唐公香城記後

書王知載响山雜詠

書贈韓瓊秀才

書邢居實南征賦後

書邢居實文卷

蘇軾

蘇軾

蘇軾

蘇軾

蘇軾

林希

呂南公

徐積

潘興嗣

黃庭堅

黃庭堅

黃庭堅

黃庭堅

題陳自然畫

題徐巨魚

題自書卷後

題崔圓傳後

書五代郭崇韜卷後

題郇公詩帖

主父之事

龍井題名

記殘經

書洛陽名園記後

跋薛唐卿秦璽文

書與賈明叔書後呈崔德符

書東臯子傳

予飲酒終日不過五合。天下之不能飲無在予下者。然喜人飲酒見客舉杯徐引則予胸中爲之浩浩焉落落焉。酣適之味乃過於客。閑居未嘗一日無客。客至未嘗不置酒。天下之好飲亦無在予上者。常以謂

黃庭堅

黃庭堅

黃庭堅

王无咎

張耒

張舜民

張舜民

秦觀

李昭玘

李格非

周行己

田 畫

蘇軾

晁詠之

人之至樂莫若身無病而心無憂我則無是二者矣然人之有是者接於予前則予安得全其樂乎故所至常蓄善藥有求者則與之而尤喜釀酒以飲客或曰子無病而多蓄藥不飲而多釀酒勞已以爲人何也予笑曰病者得藥吾爲之體輕飲者因於酒吾爲之酣適蓋專以自爲也東臯子待詔門下省日給酒三升其弟靜問曰待詔樂乎曰待詔何所樂但美醞三升殊可戀耳今嶺南法不禁酒予旣得自釀月用米一斛得酒六斗而南雄廣惠循梅五間太守復以酒遺予略計其所獲殆過於東臯子矣然東臯子自謂五斗先生則日給三升救口不暇安能及客乎若予者乃日有三升五合入野人道士腹中矣東臯子與仲長子光游好養性服食預刻死日自爲墓誌予蓋友其人于千載或庶幾焉

書黃子思詩集後

蘇軾

予嘗論書以謂鍾王之迹蕭散簡遠妙在筆畫之外至唐顏柳始集古今筆法而盡發之極書之變天下翕然以爲宗師而鍾王之法益微至於詩亦然蘇李之天成曹劉之自得陶謝之超然蓋亦至矣而李太白杜子美以英偉絕世之姿凌跨百代古今詩人盡廢然魏晉以來高風絕塵亦少衰矣李杜之後詩人繼作雖間有遠韻而才不逮意獨韋應物柳宗元發纖穠於簡古寄至味於澹泊非餘子所及也唐末司空圖崎嶇亂兵之間而詩文高雅猶有承平之遺風其論詩曰梅止於酸鹽止於鹹飲食不可無鹽梅而其美常在鹹酸之外蓋自道其詩之有得於文字之表也二十四韻恨當時不識其妙予三復其言而悲之閩人黃子思慶曆皇祐間號能文也予嘗聞時輩詩每得佳句妙語反復數四乃識其所謂信乎表聖之言美在鹹酸之外可以一唱而三歎也予旣與其子幾道其孫師是游得窺其家集而子思篤行高志

爲吏有異材見於墓誌詳矣予不復論評其詩如此。

題唐氏六家書後

蘇軾

永禪師書骨氣深穩禮兼衆妙精能之至反造疎淡如觀陶彭澤詩初若散緩不反反復不已乃識其奇趣今法帖中有云不具釋智永白者誤收在逸少部中然亦非禪師書也云謹此代申此唐末五代流俗之語耳而書亦不工歐陽率更書妍緊拔羣尤工於小楷高麗遣使購其書高祖歎曰觀其書以爲魁梧奇偉人也此非知書者凡書象其爲人率更貌寒敏悟絕人今觀其書勁峻刻厲正稱其貌爾褚河南書清遠蕭散微雜隸體古之論書者兼論其平生苟非其人雖工不貴也河南固忠臣但有讒殺劉洎一事使人快快然余嘗考其實恐劉洎褊忿實有伊霍之語非譖也若不然馬周明其無此語顧太宗猶誅洎而不問周何哉此殆天后朝許李所誣而史官不能辨也張長史草書頽然天放略有點畫處而意態自足號稱神逸今世稱善草書有或不能真行此大妄也真生行行生草真如行立草如走未有未能行立而能走者也今長安猶有長史真書郎中石柱記作字簡遠如晉宋間人顏魯公雄秀獨出其書一變古法如杜子美詩格尤天縱奄有漢魏晉宋以來風流後之作者殆難復措手柳少師書本出于顏而能自出新意一字百金非虛語也其言心正則筆正者非特諷諫理固然也世之小人書字雖工而其性情終有睢盱側媚之態不知人情隨想而見如列子謂竊斧者乎抑眞爾也然至使人見其書而猶憎之則其人可知矣余謫居黃州唐林夫自湖口以書遺余云吾家有此六人書子爲我略評之而書其後林夫之書過我遠矣而反求於余何哉此又未可曉也

題逸少帖

逸少爲王述所困。自誓去官。超然於事物之外。常自言吾當卒以樂死。然欲一遊岷嶺。勤勤如此。而至死不果。乃知山水遊放之樂。自是人生難必之事。況於市眷朝戀之徒。而出山林獨往之言。固已疎矣。

書鮮于子駿八詠後

蘇軾

始余過益昌。子駿治漕利路。其後八年。余守膠西。而子駿始移漕京東。自朝廷更法以來。奉法之史尤難。其人刻急則傷民。寬厚則廢法。二者其理難通。而山峽地瘠。民部以親則害法。以法則傷恩。二者難全。其勢是三難者。萃于子駿。而子駿爲之九年。其聲藹然。聞之四方。上不害法。下不傷民。中不廢親。自講議措置。至于立法定制。皆成其手。吏民舉欣欣焉。而子駿亦自治園囿亭榭。賦詩飲酒。雍容有餘。如異時爲監司者。君子以是知其賢。子駿以其所作八詠寄余。余甚愛其詩。欲作而不可及。及書其末。以遺益昌之人。使刻石。以無忘子駿之德。

書鄭玄傳

林希

余嘗謂聖人之教。尤備于禮。自堯舜以來。積于三代。周之所以爲周者。守此也。秦悖人道。書灰火。學士腐于坑。天下之口。不敢復言仁義。先王之道。不亡而存者幾何也。賴當時耆儒老叟。遺及漢世。口諷手傳。或山巖屋壁之間。收拾缺編。折冊朽蠹。斷絕之餘。次而成文。猶有篇章條類明白。蓋其初不經于聖人之手。或至後世。又遭磨滅。其不能完。而少有訛誤。豈能免也。及得鄭氏注。精微通透。鉤連濱會。故古經益以明世。學者皆知求而易入。識爲人之道者。漢諸儒之功。而成之者。鄭氏也。其於法制。更爲章明。獨失之者。緯也。

蘇軾

然當大壞之後，聖人不世以一人之思慮，欲窮萬世之文，豈不難哉？世之人猶指其一二而譏之，遂以鄭爲一家之小學，噫亦甚愚矣。蓋玩文辭則薄于徑術，抑不思其所爲功者，雖玄猶有所不敢盡，況無玄哉？當漢之末，姦雄競起，玄身出禁錮，四方聘請，不能動其志，脫一身於污濁之世，獨全其道，至使黃巾望玄而拜，不入其境，嗟夫！歷千百年，及此者迺幾人，尙敢輒訕玄哉？若玄者可謂賢矣。

題論衡後

呂南公

傳言蔡伯喈初得此書，常秘玩以助談，或搜其帳中見之，輒抱以去，邕且丁寧戒以勿廣也。嗟乎！邕不爲賢儒，豈不宜哉？夫飾小辯以驚俗，充之二十萬言，既自不足多道，邕則欲以獨傳爲過人之功，何繆如之良金美玉，天下之公寶，爲其貴於可用耳。小夫下人，偶獲寸片，則臥握行懷，如恐人之弗知，又兢兢於或吾寇也。而金玉果非天下所無，信以充書爲果可用乎？孰禦天下之同貴，有如不然也？邕之志慮，曾小夫下人之及耶？

書鄭繁傳

徐積

天下之所恃而爲安危者誰乎？曰：宰相焉耳。故自朝廷百執事至于州縣之吏，不幸而一非其人，不過敗其一隅之事耳。至于宰相者，其人一非，則天下殆矣。雖亡宗赤族，何益於敗？蓋天子之於天下也，得其術，則其道甚易。宰相佐天子治天下，以一身而當天下之責，雖得其術，其道甚難。臨之六五曰：「知臨大君」之宜。此豈非易乎？乾之九三曰：「君子乾乾，夕惕若」，此豈非難乎？然而人皆易之何也？曰：「不知量也。今有馬于此，且其行不過百里也，驅而倍之，則馬且病矣；龠合升斗之量，各有所受也。以龠合而加之升斗之上，則

溢矣況斟酌之量乎故一邑之才施之一郡則不可也其以一郡之才而當天下之責可乎此黃霸之所以得令名於前而見譏于後也況遠不迨霸乎甚矣人之不知量也坤之六五黃裳元吉蓋君子之有諸中形諸外如此可也大有之九二曰大車以載蓋君子以盛德大烈當天下之責如此則可也乾之九三曰君子終日乾乾蓋君子履天下之危當天下之責其憂勞如此可也忠烈如伊尹勳勞如周公而又終以謙易曰勞謙君子有終吉嗚呼其難若此而人皆易之何也曰好之也尊官重祿固人之所好也不如是不足充其好快其欲彼安肯曰吾不才也吾辱其位者卽有禍敗隨之耶取天下笑耶爲萬世之羞耶甚者亡人之國危人之天下不顧也豈子謂不知量者耶安得知量者見之乎予讚陳平傳嘉平知其任讀鄭君傳愛君知其量嗚呼如君者豈易得哉豈易得哉

題張唐公香城記後

潘興嗣

唐公國士也立朝敢言名動搢紳視萬鍾之祿不易其操一丘一壑自謂過之方此時僕齒髮方少已無仕宦意第以琴書爲樂相視莫逆至於忘年可謂以無累之神合有道之器不愧於古人矣每一至此視公筆蹟於壞壁間字浸漫滅惘然于懷真覺上人好事次錄其言勒于石

書黃知載晦山雜詠後

黃庭堅

詩書人之情性也非強諫爭於廷怨忿詬於道怒鄰罵坐之爲也其人忠信篤敬抱道而居與時乖逢遇物悲喜同牀而不察並世而不聞情之所不能堪因發於呻吟調笑之聲胸次釋然而聞者亦有所勸勉比律呂而可歌列于羽而可舞是詩之美也其發爲訕謗侵陵引頸以承戈披襟而受矢以快一朝之忿

者人皆以爲詩之禍是失詩之旨非詩之過也故世相後或千歲地相去或萬里誦其詩而想見其人所居所養如旦暮與之期鄰里與之游也營丘王知載仕宦在予前予在江湖浮沉而知載已沒於河外不及相識也而得其人於其詩時不遇而不怒人不知而獨樂博物多聞之君子有文正公家風者耶惜乎不幸短命不得發於事業使予言信於流俗也雖然不期於流俗此所以爲君子者耶

書贈韓瓊秀才

黃庭堅

讀書欲精不欲博用心欲純不欲雜讀書務博常不盡意用心不純訖無全功治經之法不獨玩其文章談說義理而已一言一句皆以養心治性事親處兄弟之間接物交朋友之際得失憂樂一考之於書然後嘗古人之糟粕而知味矣讀史之法考當世之盛衰與君臣之離合在朝之士觀其見危之大節在野之士觀其奉身之大義以其日力之操玩其華藻以此心術作爲文章無不如意何況翰墨與世俗之事哉

書邢居實南征賦後

黃庭堅

陽夏謝師復景回年未二十文章絕不類少年書生語余嘗序其遺藁云方行萬里出門而車軸折可爲隕涕今觀邢惇夫詩賦筆墨山立自爲一家甚似吾師復也日者閱國馬圉人曰千里駒往往不及奉輿斃於阜櫨駕蹇十百爲羣未嘗求國醫也聞之喟然曰吾惇夫亦足以不朽矣

書邢居實文卷

黃庭堅

余觀學記論君子之學有本末等衰人雖不能自壽百歲然必不踰等如水行川盈科而後進耳小學之

事雖若糜費日月要須躬行必曉所以致大學之精微耳吾惇夫才性高妙超出後生千百輩然慕大略小初日便爲塗遠之計則似可恨後生可畏當欣慕其才而鑒其失也

題濟南伏勝圖

御史晁大夫號爲峭直刻深觀所寫形質似未至也然作伏勝宛然故齊之老書生耳又作勝女子鬱然是儒家子此亦丹青之妙

題摹燕郭尚父圖

凡書畫當觀韻往時李伯時爲予作李廣奪胡兒馬挾兒南馳取胡兒弓引滿以擬追騎觀箭鋒所直發之人馬皆應弦也伯時笑曰使俗子爲之當作中箭追騎矣余因此深悟畫格此與文章同一關紐但難得人入神會耳

題陳自然畫

水意欲遠鳴鶴欲閑暇蘆葦風霜中猶有能自持者予觀李營丘六軸驟雨圖偶得此意陳君以佛畫名京師戲作秋水寒禽便可觀因書以遺之

題徐巨魚

徐生作魚庖中物耳雖復妙於形似亦何所賞但令嚙獠生涯耳向若能作底柱析城龍門岌礪驚濤險壯使王鮪赤鱣之流仰波而上泝或其瑰怪雄傑乘風霆而龍飛彼或不自料其能薄乘時射勢不至乎中流折角點額窮其變態亦可以爲天下壯觀也

黃庭堅

黃庭堅

黃庭堅

題白書卷後

黃庭堅

崇寧三年十一月余謫處宜州半歲矣官司謂余不當居關城中乃以是月甲戌抱被入宿于城南余所僦舍喧寂齋雖上雨旁風無有蓋障市聲喧憒人以爲不堪其憂余以爲家本農耕使不從進士則田中廬舍如是又可不堪其憂耶旣設臥榻焚香而坐與西鄰屠牛之机相直爲資深書此卷實用三錢買雞毛筆書

題崔圓傳後

王无咎

天下之郡無大小遠近天子皆爲之置賓佐曹掾者不唯共守境土行條約均職務而已固將有以出謀議規過失也故守臣虛屈意以事訪于賓佐曹掾而爲賓佐曹掾者亦專專然不憚舉其守之缺者乃其勢然也予觀近世之爲郡者多不知其勢之如此故鮮有能盡以事訪于其屬而爲其屬者亦鮮有能舉上之缺設有能然者則往往驟取譴怒挫辱甚者萬方掇拾行事釀成其禍而去之以騁已之憤而遂其非焉故今天下多不治之郡而朝廷有不審擇之過予嘗有憾于此也久矣每觀韓愈誌韓岌墓稱其父紳卿爲楊州錄事參軍大衡會日舉崔圓之過曰公與小民狎至其家害于政圓驚謝曰錄事言是圓實過乃自署罰錢五十萬則未嘗不反覆歎慕其賢焉及讀唐書紳卿則固無傳圓雖有傳然是事乃不列于其中亦可惜也夫愈以文行賢後世必不輕其言過譽諸人其事可信無疑矣然而史不列之者豈其有遺者歟故予輒取其事書于傳之後以補之噫古之遺者良多予獨區區以補此者是亦有爲而然也

自古大臣權勢已極富貴已亢滿前無所希則必退爲身慮自非大姦雄包異志與夫甚庸鴛昏鬪茸鮮有不然者然其爲慮也實難不憂思之不深計之不工然異日釁之所起往往自夫至深至工是故莫若以正夫正者操循簡而周智者爲緒多而拙夫正者無所事計也行所當然雖怨仇不敢議之況繼之者賢乎郭崇韜於五代亦聰明權智之士也佐莊宗決策滅梁遂一天下自見功高權重姦人議已而莊宗之昏爲不足賴也乃爲自安之計時劉氏有寵莊宗嬖之因請立爲后而中莊宗之欲又結劉氏之援此於劉氏爲莫大之恩而莊宗日以昏湎內聽婦言爲計宜無如是之良者然卒之殺崇韜者劉氏也使崇韜繆計不過劉氏不能有所助而已豈知身死其手哉好謀之士敗于謀好辨之士敗於辯惟道德之士爲無所窮而禍福之變豈思慮能究之哉

題郇公詩帖

張舜民

我生不及郇公而家有公選詩十卷所選皆精于時已信公之能詩也迨觀此作爲信然其文采深潤與字書故同當時非特郇公大抵前輩皆若此倘與今人語必曰其文未甚高其書未甚精至其自秉筆命語則鮮不戾者藝顧如此况其大者乎苟率是求攻堅致遠之效是以誤成事

主父之事

張舜民

近歲渭南縣有田父得宿藏于土中凡七甕水銀者二金銀者五金銀皆刻主父字按漢主父偃以金敗而至於殺其身滅其家今日乃知偃之死非謬也中庸曰莫見乎隱莫顯乎微故君子慎其獨也荀卿曰聲無遠而不聞行無微而不彰當偃之死于今久矣徒觀其事而不見其迹猶未足以爲信何以暴其數

千年之後今之人結交於戶牖之間託物于苞苴之內期于無人之境投於夜半之時欲人之不我知真愚也哉

龍井題名

秦觀

元豐二年中秋後一日余自吳興道杭東還會稽龍井有辨才大師以書邀余入山比出郭日已夕航湖至普寧遇道人參寥問龍井所遺籃輿則曰以不時至去矣是夕天雨開霽林間月明可數毫髮遂棄舟從參寥策杖並湖而行出雷峰度南屏濯足于惠因澗靈石塢得支徑上風篁嶺憩于龍井亭酌泉據石而飲之自普寧凡經佛寺十五皆寂不聞人聲道旁廬舍或燈火隱顯草木深鬱流水上激悲鳴殆非人間之境行二鼓矣始至壽聖院謁辨才于潮音堂明日乃還

記殘經

李昭玘

南臺有利有佛書數百卷多唐季五代時所書字畫精勁歷歷可喜按大藏經目凡五千四百卷今所存纔十一首尾可讀者又無幾也阿含經四卷泰寧軍節度使齊克讓造廣明元年劉漢宏合黃巢侵揚州高駢按兵不出詔克讓屯汝州會許州部將周公殺其帥薛能克讓懼下叛引其軍還袁十二月巢攻潼關克讓復出戰關外士飢燒營以躁克讓遽走入關勢不能守賊遂犯京師昔王緒相代宗或夷狄入寇必合衆沙門誦護國仁王經爲禳厭人事不修而終以敗敗嗚呼將相大臣不能以身任社稷安危而託浮屠氏以生死負天下多矣然辱國喪師不擢誅殛之禍者又何幸也正法華經一卷乾符六年子牛妙音書僖宗旣立天下多亂盜賊羣嘯王仙芝搖毒於江湖黃巢磨牙于閩粵荒墟暴骨不堪行路士大夫

顧唐將亡竄匿避禍如觸罟網畏死無日閨門女子區區媚佛以自救亦可哀矣大涅槃般若經共三十卷武寧軍節度使朱友恭造友恭全忠養子李彥威也後爲龍武都統軍與叔琮同殺昭宗全忠亟誅之以滅天下謗此經天復三年所書崔垂休召全忠誅宦官韓全誨刦天子奔鳳翔昭宗初不知謀全忠旣至帝怒諭使還鎮未幾復引兵薄城下惡焰赫然寢逼輿衛強藩悍鎮陰虞爛額之禍進退首鼠莫肯同出一手以扶天步全忠禍心滋大欺天盜國人共怨怒友恭猶詭情佞佛以厭天下耳目使世無佛則可果佛能報應人則又將欺佛而盜禍不亦愚乎毗奈耶雜事一卷德妃伊氏造唐莊宗次妃初神閔敬皇后劉氏以微賤得立歸賜于佛性喜聚斂貨財山積惟寫佛書饋賂僧尼而士卒不得衣食妃爲此經豈非畏后所逼耶後有印章曰燕國夫人伊氏蓋未進封時所制也唐制太后皇之寶皆主之未嘗用印凡封令書卽太后用宮官印皇后用內侍省印而夫人不聞有用印之禮是時兩宮交通藩鎮使者旁午於道而恬小知禁則夫人私自鑄亦不爲僭矣按五代史稱德妃與韓淑妃居太原普高祖反時爲契丹所虜不知是經何從至也其餘中斷橫裂虫鏽鼠齧雨敗塵腐無復完綴想夫飄散蹂藉炷燈拭案補壞帷塞屋漏者又不勝其數也釋氏之戒能爲人寫四句偈獲福無量心生不信頓抵干劫今其怠弃如此何頑頓之甚也不然禍福自人不在於黃藤赤軸之間耶余感其禍亂之迹殘缺之餘因書其事聊寄其一嘆云

書洛陽名園記後

李格非

洛陽處天下之中挾殼匪之阻當秦隴之襟喉而趙魏集蓋四方必爭之地也天下常無事則已有事則

洛陽必先受兵。余故嘗曰：洛陽之盛衰也，天下治亂之候也。方唐正觀元之間，公卿貴戚開館列第於東都者，號千有餘邸。及其亂離，繼以五季之酷，其池塘竹樹，兵車蹂躪，廢而爲丘墟，高亭大榭，煙火焚燎，化而爲灰燼，與唐共滅而俱亡者，無餘處矣。余故曰：園囿之興廢者，洛陽盛衰之候也。且天下之治亂，候於洛陽之盛衰，而知洛陽之盛衰，候於園囿之興廢，而得則名園記之作。余豈徒然哉？嗚呼！公卿大夫方進於朝，放乎一己之私，以自爲而忘天下之治，忽欲退享此得乎？唐之末路是矣。

跋薛唐卿秦璽文

周行已

李斯篆，世傳爲第一。學者莫不愛之。吾每見其書，幾不疾唾而却走者，何哉？謂夫人善成其君之過也。夫秦之君，其資亦未若桀紂之惡之甚也。而二三臣釀其君於不善，則又有甚焉者。嗚呼！斯乎，是嘗去詩書以愚百姓者乎？是嘗聽趙高以立胡亥者乎？是嘗殺公子扶蘇與蒙恬者乎？是嘗教其君嚴督責而安恣睢者乎？使其璽不得傳者，斯人也。而其刻畫，吾忍觀之哉？顧唐卿猶區區珍藏之者，豈不欲傳百世以爲監歟？吁！是何以監也。

書與賈明叔書後呈崔德符

田 畫

此書成，與諸弟讀之，相對悲不自勝。嗟乎！身長七尺，氣塞天地，不能飽一母。富家僮僕，狀飫梁肉，吾道非耶？奚爲而至此？然折節售文章，真鄙夫事。此書遲遲未投，尚惜此也。其勢正如提孤軍薄堅敵，矢窮力盡，餉道不繼。伏兵又從而乘之。當是時，不折北者鮮矣。公其籌之。

書張生客遺事

晁詠之

祖宗以武定天下至章聖時益厭兵漕淵之役契丹之衆可覆而取也縱其去不忍殺自是不復言兵封泰山祀沁陰天神降格休祥並至以文太平縉紳之士以此相繼受爵秩于朝將相大臣往往列於三公侍從多至丞郎以上其以武受賞者殆無其人此主客公之功所以不錄然公之名由然以顯出入中外爲時名臣蓋當時廷臣奉使于外者舉天下三四十人耳邦之大計總于三司而諸道各有轉運使一人其財賦調度凡利之入悉歸之其權比今爲甚重每改使一道輒推恩官其子若孫一人其它禮遇稱此蓋其部吏尊其使者亦以此進是時大臣多白首耆艾加公十年之壽以馴致公卿必矣然則朝廷未嘗薄公之功也論者見公一旦斷河橋捕朱能滅其凶燄而賞不加不知朝廷所以待士大夫者固自有在或比公仲連辭封不願其言美矣然仲連縱橫辨士眩奇於衰世非公之所願學嘗觀景德祥符以來風俗淳厚士大夫人人自重有長者之風公之不自言其所以自處蓋甚厚非有激而爲者方其少時以經明動場屋其爲吏以治劇名一時大臣多薦公者冠萊公知公尤深然則公之所養可知蓋自公繼其父光祿公起家至公百有餘年傳六世世有人其澤未艾彼以尺寸之勢自鬻於一時過取爵位者曾不旋踵輒致隕敗顧何以傳來世然則天之所以報公亦甚厚詠之官長安公之曾孫介夫爲鄆令間以事抵府數相遇愛其溫厚儒雅意其先世必有盛德之士果得公遺事爲攷其世而論之終

宋文鑑卷第一百三十二

樂語

教坊致語

勾合曲

勾小兒隊

隊名

問小兒

小兒致語

勾雜劇

放隊

教坊致語

勾合曲

勾小兒隊

隊名

問小兒隊

王 王 王 王 宋 宋 宋 宋 宋 宋 宋
珪 珪 珪 珪 祁 祁 祁 祁 祁 祁 祁

小兒致語

勾雜劇

放小兒隊

勾女弟子隊

隊名

問女弟子隊

女弟子致語

勾雜劇

放女弟子隊

集英殿秋宴教坊致語

勾合曲

勾小兒隊

隊名

問小兒隊

小兒致語

勾雜劇

元元元元元元王王王王王王
絳絳絳絳絳絳珪珪珪珪珪珪

放小兒隊

勾女弟子隊

隊名

問女弟子隊

女弟子致語

勾雜劇

放女弟子隊

集英殿秋宴教坊致語

勾合曲

勾小兒隊

隊名

問小兒隊

小兒致語

勾雜劇

放小兒隊

勾女童隊

元元元元元元元元元元
蘇蘇蘇蘇蘇蘇蘇蘇蘇蘇
軾軾軾軾軾軾軾軾軾

隊名

問女童隊

女童致

放隊

會老堂致語

哀
寧

哭尹舍人詞

哀穆先生文

弔岳先生文

蘇明允哀詞

錢君倚哀詞

哭李仲蒙辭

毗陵張先生哀辭代呂侍講作

王升之誄

教坊致語

宋祁

臣聞璿杓東指披寶典以開年玉節南馳重歡隣而講好國美春臺之享朝推宴俎之慈用治樂康式昭熙盛恭惟尊號皇帝陛下紹承丕烈奄宅中邦坐黃屋以訓恭擁綠圖而進道五辰順理九扈告豐圓璧方琮並薦精純之祀巽風解雨交流曠蕩之恩五刑則解網畫冠一尉則垂橐臥鼓鴻休紹至協氣翔臻屬歲朔之中儀加使華之修聘爰開廣殿胥慶佳辰王人捧日以揚輝方丈移山而獻壽珍羣肅穆啐表顚印瑞藻躍魚嘉鎬京之飲酒翠梧傾鳳應韶舞之縱金式均蒙湛之仁普詠叢雲之旦臣濫巾法部旅進神庭切抃草期敢進口號千官星拱侍凝旒紫殿餘寒已暗收日湛露華浮宴席天回春色徧皇州雲韶三闕翔朱鷺錦幕千層舞翠虬拭玉隣邦通使節萬齡亨會慶洪猷

勾合曲

宋祁

玉色凝溫盛慶儀于瑞日葵心委照同華宴于需雲矧韶律以方融顧羣萌之將達宜陳備奏用洽太和徐韻宮商教坊合曲

勾小兒隊

宋祁

綵岫岩堦爛仙葩於曉日霞裾轉炫疊華鼓于春雷烏漏未移鸞觴在御宜進游童之列俾陳逸緩之妍上奉宸歡教坊小兒入隊

隊名

宋祁

紫殿開慈宴青衿綴舞行

問小兒

宋祁

便娟躡履皆竹馬之髻齡蹀躞交竿盡蘭艤之雅飾旣樂陶姚之化盍陳象勺之因進叩天階雍容敷奏

小兒致語

宋祁

臣聞慶朔履端儼釐雍而四會寶隣馳騁拭虹玉以申歡嘉乃禮成眷茲作首爰詔夏渠之饗允昭交泰之期恭惟尊號皇帝陛下德總右文功宣下武順四時之和燭濟萬世於夷庚海不揚波地無愛寶屬以階蓂肇曆律鳳回春順邦令以布和脩國儀以行慶承雲調露方諧廣樂之音酬飲陪殫普適中衢之賜洽歡心于萃庭暢羣抃于山鼇臣等雖愧妙年同欣盛際旣造規蒲之地願陳秉翟之容未敢自專伏候進止

放隊

宋祁

金徒漏改玉罿巡周旣殫雅舞之容復罄歡謠之樂宜遵矩步歸詠雩風再拜天階相將好去

教坊致語

王珪

臣聞高廩登秋美粢盛之已報需雲命燕嘉飲食之維時況寶曆之逢熙復皇居之乘豫樂與羣臣之飫翕同萬物之和恭惟尊號皇帝陛下德邁前王仁敷中寓虎旗犀甲韜兵武庫之中桂海水天獻賛形墀之下邦有休符之應民躋壽域之康候爽氣于重霄置清觴于別殿下珍羣之鶴鶯發和奏之笙鏞于時日上扶桑風生閻闔度芝蓋于丹城降金輿于紫闈百獸感和來舞帝虞之樂羣生遂性如登老氏之臺固已追平樂之勝遊掩柏梁之高會臣繆參法部獲望清光靡揆才蕪敢進口號翠輦鳴梢下未央千

官齊望赭袍光。霜清玉佩中。天響風轉金爐合。殿香仙路忽驚蓬島近。畫陰偏度漢宮長。年年萬寶登秋後。常與君王獻壽觴。

勾合曲

王珪

露泛帝觴凝九秋之顥氣。星聯朝弁燦初日之長暉。方魚藻以均歡。宜簫韶之合奏。宸遊正洽樂節徐行。上悅天顏教坊合曲。

勾小兒隊

王珪

燕觴飛羽方歌湛露之詩。廣樂擬金已極鈞天之奏。宜命遊童之綴來陳舞佾之容。上奉皇慈教坊小兒入隊。

隊名

王珪

紅茵鋪錦氍絺節引仙童。

問小兒隊

王珪

宸庭廣御仰侔太紫之纏。鈞樂更和曲盡咸英之奏。何處采髦之侶。輒趨文陛之前必有所陳雍容敷奏。

小兒致語

王珪

臣聞舜帝深仁衆極慕羶之樂。周家盛德時歌在藻之娛。矧逢下武之期。屢洽登年之瑞。張君臣之廣燕。煥今古之多儀。恭惟尊號皇帝陛下躬神容之姿。撫休明之運。禮樂兼于三代。文章邁于兩京。矧乃武庫韜戈。戎亭徹候。百蠻犇走。南踰銅鼓之鄉。萬里謳謠。西出玉關之路。今則清商應律。滯穗盈疇。奏肆夏之

音事軼元候之饗詠嘉魚之什禮交君子之歡足以崇勝會于難追騰頌聲於無既臣等生陶釀化謬齒伶坊雖在童髦嘗習舞干之妙爭趨君陛願隨樂節之行未敢自專伏候進止

勾雜劇

華旌炫影觀童舞之成文畫鼓收聲識鈞音之終曲助以優人之伎卜爲清晝之歡上憚宸顏雜劇來歟

放小兒隊

銅壺遞箭屢移宮樹之音鶯羽充庭久曳童髦之綵旣闢韶音之奏難停舞綴之容再拜天階相將好去

勾女弟子隊

王珪

華簪照席再嚴百辟之趨寶幄更衣復覩中天之坐宜度仙韶之曲更呈舞袖之妍上奉皇慈兩軍女弟子入隊

隊名

王珪

宮錦祥鸞下仙磬采鳳來

問女弟子隊

王珪

金徒緩刻延麗日於壺中翠羽飛觴醉流霞于天上何仙姿之綽約叩丹陛以踟蹰須有剖陳近前敷奏女弟子致語

妾聞候迎霜降屬百工之告休歌起鹿鳴見羣臣之合好矧萬機之多豫復千載之盛期啓燕良辰騰歡綿寓恭惟尊號皇帝嚮明紫極儲思巖廊邁三皇五帝之風紹一祖二宗之烈候亭相屬不齋萬里之糧

年廩屢登又美曾孫之稼時及授衣之候民多擊壤之禧廣慈惠于前儀慶升平于茲日玉觴盈醴均流湛露之恩翠虡搖金合奏洞庭之曲感福休于靡極召和樂於無窮妾等幸遇昌時預陳法部舉聽鏗純之節來參蹈厲之容未敢自專伏候進止

勾雜劇

鸞拂宮茵極七盤之妙態鳳儀仙曲終九奏之和聲方鑄飲之窮歡宜秦優之進技宸顏是奉雜劇來歟

放女弟子隊

王珪

宮花剪彩恍疑天上之春海日啣規忽覺人間之暮宜整羽衣之綴卻回雲島之遊再拜彤庭相將好去

集英殿秋宴教坊致語

元絳

臣聞灝氣澄爽當金飈沆砀之時岩廊穆清乃黃屋燕闕之日肆陳廣惠申惠庶工慶盛世之熙隆浹輿情而鼓舞恭惟皇帝陛下九乾毓粹三象儲精丕承累治之基茂建大中之治縱橫文武聲教塞于天淵出入聖神威靈震于戎狄方且輯瑞而朝羣后垂策而揖三皇光圖麗史之祥紛綸而淳至軼漠踰沙之貢竭蹕以相趨運獨化于陶鈞寘懷生于仁壽屬商煒之邇暮方歲物之順成特御大庭爰開高宴動詔蹕于丹禁集朝簪于赤墀美樂在陳下九苞之鳳舞嘉觴來上騰萬歲之山聲續卿雲復旦之歌合湛露晞陽之雅臣等叨參法部幸對威顏上瀆聖聰敢進口號秋風閭闈九門開天上鳴鞘步輦來萬樂筦弦流紫府千官簪佩集鈞臺華胥雲霧凝仙仗南極星辰入壽杯旣醉太平均五福明良賡載詠康哉

勾合曲

元絳

金飈日爽慶嘉生登穩之祥玉座天臨宣惠宴均懽之澤宜按鳳韶之奏載賡魚藻之歌上奉宸嚴教坊合曲

勾小兒隊

簫韶迭奏通天地以均和簪組相趨協君臣之同樂宜命垂髫之侶來陳舞象之容徐韻宮商教坊小兒入隊

隊名

舞羽虞庭樂 歌雲沛水童

問小兒隊

廣樂張庭華茵匝地何爾童鱗之侶來瞻宸扆之嚴必有敍陳分明敷奏

小兒致語

元絳

臣聞霜氣始肅登萬寶以順成金行當期奄四夷而率服乘蕭辰之爽澈開廣宴之光華親御九宸均懽百辟恭惟皇帝陛下至仁溥博盛德昭清獨觀萬化之源遐踵三皇之武振張禮樂垂玉度于區中攬瓊英彥儕霆威于徼外神功廣運聖業永昌方黃屋之清居乘素商之令序肆瑤席于黼帳下璣輿于紫闈壽畀九行懌聲動而六鼈抃鈞簫八闋和氣浹而丹鳳翔仰屬重熙誕膺多福臣等甫當髫髻幸閱聲明習戲康衢嘗爲于蹈舞進趨文陛願效於伎能未敢自專伏候進止

勾雜劇

元絳

疊鼓凝簫未已九成之奏垂髫佩韠暫分八佾之行宜陳優戲之容上奉威顏之樂再更妙引雜劇來歟

放小兒隊

金肯漏緩玉案香濃天酒千鍾春簪紳之具醉童衣五綵促步武以將歸再拜天階相將好去

勾女弟子隊

日轉彤墀香飄黼座宜旅陳于舞綵以仰奉于宸懽上悅天顏兩軍女弟子入隊

隊名元絳

承雲鈞籟合迴雪舞衣輕

問女弟子

翠華日麗玉殿風清飄然妙舞之容來此丹塗之地帝暉在望晝漏已移必有敍陳分明敷奏

女弟子致語

妾聞周詩旣醉工歌均五福之祥漢宴無譁國禮重九儀之序方戒肅霜之候特推湛露之恩百辟相趨

三靈共悅恭惟皇帝陛下握樞臨極秉籙御乾道昭五聖之光孝奉兩宮之養聰文若古動雲漢之昭回智武如神馳雷霆之震赫羌戎率服稼穡阜成當秋籥之澄凝方政機之暇豫轉清蹕于黃道集華簪于赤墀汎齊千鍾共享衢尊之美咸池九奏具聞天籟之和維茲燕愷之娛屬是休嘉之會妾等叨陪樂府得踐宮塗咫尺之威實欣于天幸效蹁躚之舞願奉于宸懽未敢自專伏候進止

勾雜劇

元絳

舞佾徊翔已奉建章之會倡徘調笑宜來平樂之場上悅天顏雜劇來歟

放女弟子隊

元絳

香凝黼幄聽玉漏之頻移日轉文茵顧霓裳之久駐已盡七盤之妙宜還三洞之遊再拜天階相將好去

集英殿秋宴教坊致語

蘇軾

臣聞天無言而四時成聖有作而萬物覩清淨自化雖仰則于帝心愷悌不回亦俛同于衆樂屬此九秋之候粲然萬寶之成吾王不遊何以勞農而休老君子如喜則必大烹以養賢恭惟皇帝陛下孝通神明仁及草木行堯禹之大道守成康之小心華夷來同天地並應以謂福莫大于無事瑞曷加于有年南極呈祥候秋分而老人見西夷慕義涉流沙而天馬來嘉與臣工肅陳燕俎禮元侯以三夏諸庶尹於九成宗示御觴聳近臣之榮觀臚傳天語溢兩廡之歡聲臣等幸觀昌辰叨塵法部採謠言于擊壤助矇瞍之陳詩仰奉威顏敢進口號霜飛碧瓦尚生煙日泛彤庭已集仙藹藹四門多吉士熙熙萬國屢豐年高秋爽氣明宮殿元祐和聲入管絃菊有芳兮蘭有秀從臣誰和白雲篇

勾合曲

蘇軾

西風入律間歌秋報之詩南籥在庭備舉德音之器絃匏一倡鍾鼓畢陳上奉宸嚴教坊合曲

勾小兒隊

蘇軾

皇慈下逮罄百執以均歡衆技畢陳示四方之同樂宜進垂髫之侶來脩秉翟之儀上奉威顏教坊小兒入隊

隊名

登歌依頌磬下管舞成童。

問小兒隊

大君有命肆陳管磬之音童子何知入籩工師之末欲詳來意宜悉奏陳。

小兒致語

蘇 軾

臣聞天行有信正得秋而萬寶成君德無私日將旦而羣陰伏清風應律廣樂在庭占歲事于金穰望天
顏之玉粹沐浴膏澤詠歌太平恭惟皇帝陛下天縱聰明日躋聖知無一物之失所得萬國之權心雖擊
壤之民固何知于帝力而後天之祝亦各抒其下情臣等幸之齟齬之年得居仁壽之城詠舞雩于沂水
久樂聖時唱銅鞮于漢濱空慙俚曲願陳舞綴少奉宸懽未敢自專伏候進止

勾雜劇

蘇 軾

朱絃玉琯屢進清音華翟文竿少停逸綴宜進詼諧之技少資色笑之歡上悅天顏雜劇來歟

放小兒隊

蘇 軾

回翔丹陛已陳就日之誠合散廣庭曲盡流風之妙歌鍾告闕羽籥言旋再拜天階相將好去

勾女童隊

蘇 軾

錦薦雲舒來九成之丹鳳霞衣鱗集隱三疊之靈鼉上奉宸嚴教坊女童入隊

隊名

蘇 軾

宋文鑑

卷第一百三十二

一七五三

香雲浮繡扆。花浪舞彤庭。

問女童隊

清禁深嚴方縉紳之雲集。仙音嘵緩忽簪珥之星陳。徐步香茵悉陳來意。

女童致語

妾聞鈞天廣樂空傳帝所之遊。闔闢清風理絕庶人之共。夫何仙聖靡隔塵凡。仰瞻八采之威。自慶千齡之遇。恭惟皇帝陛下乾健而粹。離明而文。規摹六聖之心。人將自化。儀刑文母之德。天且不違。樂茲大有之年。申以示慈之會。虞韶旣畢。夏籥將興。妾等分綴以須審音。而作願俟上歌之闋。少同率舞之歡。未敢自專。伏取進止。

勾雜劇

絃匏迭奏。干羽畢陳。洽聞舜樂之和。稍進齊諧之技。金絲徐韻。雜劇來歟。

蘇軾

放隊

羽觴湛湛。方陳旣醉之詩。鼂鼓淵淵。復奏言歸之曲。峨鬢佇立。斂袂卻行。再拜天階。相將好去。

會老堂致語

某聞安車以適四方。禮典雖存于往制。命駕而之千里。交情罕見于今人。伏惟致政少師一德元臣。三朝宿望挺立始終之節。從容進退之宜。謂青衫早並于俊遊。白首各諧于歸老。已釋軒裳之累。卻尋雞黍之期。遠無憚于川塗。信不渝于風雨。幸會北堂之學士。方爲東道之主人。遂令潁水之濱。復見德星之聚。里

歐陽脩

蘇軾

開拭目覺陋巷以生光風義聳聞爲一時之盛事敢進口號上贊清歡欲知盛集繼荀陳請看當筵主與賓金馬玉堂三學士清風明月兩閑人紅芳已盡鶯猶囀青杏初嘗酒正醇美景難并良會少乘歡舉首莫辭頻

哀辭

哭尹舍人詞并序

富弼

亡友河南尹洙字師魯嘗爲起居舍人直龍圖閣知渭州乙酉歲謫官漢東未幾稍遷于均疾且革訪醫南陽以託范公醫不效遂沒焉時予官汝上又東徙乎盧距其沒所遠甚歎師魯之不得見復不得撫其櫬一祭其神因追思其平生所可列恨未有以卒其志爲辭而哭之嗚呼人皆貴君實悴焉人皆富君實寢焉人皆老君實天焉吾知君爲深是三者舉非君之志則吾焉哭哭必義始君作文世重淫麗諸家舛殊大道碎裂漫漶費詞不立根柢號類嘯朋爭相教基上翔公卿下典書制君子厥時了不爲意獨倡古道以救其敝時俊化之識文之詣今則亡矣使斯文不能救其源而極其致吾是以哭之始君爲學遭世乖離掠取章句屬爲文詞經有仁義曾非所治史有褒貶亦弗以思君顧而歎嫉時之爲鉤抉六籍潛心以稽上下百世指掌而窺功不苟進習無匪彝今則亡矣使所學不能信于人而用于時吾是以哭之惟文與學二事既隆功用而衷豐于時窮純深蘊積資而爲德行乎已而已必裕行乎家而家必克今則亡矣使賢者之行不能移人心而化大國吾是以哭之積德既成道隨而生謀罔不究動必有經列于庭則以蹇謗見黜蒞于邊則以威懷取寧才望既出讒嫉以興酷罰嗣降慍色不形今則亡矣使君子之道

不能被天下而致太平。吾是以哭之。嗚呼師魯君生于時實惟恢音鍾此具美。謂必有光大以奮康濟是期。胡旣厚其稟而反速其萎。凡粵中蘊百無一施。豈茫茫下土天亦有所不知耶。將冥冥上穹人固非其所司耶。何惡不必釁而善不必禡。忠良而天險狠而耆汨淆參錯顛倒乖睽。天其或者世不欲常泰人不欲常熙。吾疑夫激者之論差不得而信之。第于師魯哭無已而一哭而慟再哭而咽三哭而魂離四哭而腸絕蘇而復哭哭又不足聊以寫吾之哭聲而寓于辭庶不泯沒于陵谷。

哀穆先生文

蘇舜欽

嗚呼穆伯長以明道元年夏客死於淮西道中友人蘇叔才子美作詩悼之遣人馳弔之痛夫道不光予又次其一二行事以鑑于世爲文哀之先生字伯長名脩幼嗜書不事章句必求道之本原皆記士徒無意熟習評論之性剛介喜于背俗不肯下與庸人小合願交者多固拒之議事堅明上下今古皆可錄然好詆卿弼斥言時病謹細後生畏聞之又獨爲古文其語深峭宏大蓋爲禮部格詩賦咸平中舉進士得出身調泰州司法參軍牧守稱其才貳郡者惡之又嘗以言忤貳郡者守病告貳者私黜吏使誣告先生于朝後累恩得爲蔡州參軍先生自廢來讀書益勤爲文章益根柢于道然恥以文干有位以故困甚張文節守亳毫之士豪者作佛廟文節使以騎召先生作記記成竟不竄士名士以白金五斤遺之曰枉先生之文願以此爲壽又使周旋者曰士所以遺者乞載名于石圖不朽耳旣而亟召士讓之投金庭下遂假裝去郡士謝之終不受嘗語之曰寧區區糊口爲旅人不爲匪人辱吾文也天聖末丞相有欲置爲學

官者恥詣謁之竟不得嘗客京師南河邸中往往醉暮歸遏地如不省持者夜半邸人猶聞其吟誦喟嘆聲因隙窺之則張燈危坐苦讀執卷誦達曙用是貸其資母喪徒跣自負櫬成葬日誦孝經喪記未嘗觀佛書飯浮屠氏也識者哀憐之或厚遺之則必爲盜取去不然且病或妻子卒後得柳子厚文刻貨之售者甚少踰年積得百緡一子輒死將還淮西遇病氣結塞胸中不下遂卒噫吁天之厭文久矣先生竟以黜廢窮苦終其身顧其道宜不容于世然由賦數奇隻常罹兵賊惡少輩所辱因其節行至死不變有孤懦且幼遺文散墜不收伯長之道竟已矣乎初先生死梁堅自解以書走上黨遺予欲訪其文俾予集序之去年赴舉京師歷問人終不復得一篇惟有任中正尙書家廟碑靜勝亭記徐生墓志蔡州塔記皆平昔所爲又不足成卷今舅氏守墓以書使存其家且求所著文字未至間作文哀之道不勝于命命不會于時吁嗟先生竟何爲

弔岳二生文并序

劉敞

今年有詔州郡皆立學乃命處士有不受學者勿舉之其受學者吏爲設員程日夜不休有疾病慶弔輒書其日爲後按眎當償之滿日如律令乃可與岳有兩生自下邑辭其親而來爲博士弟子旣久告歸當渡洞庭時方大風不可渡兩生畏失期而吏黜之遂渡溺死予悲其意而弔之其文曰蓋君子道而不徑舟而不游所以爲孝也彼洞庭之天險兮夫何二子之乘舟路幽昧以不顧兮委死生其若浮自古皆有死兮子獨失身乎江流意有所恨兮而曾不得其由魂放蕩而無歸兮骨沉潛而不收父母悲于堂上兮妻子號乎中洲諒行險之來患兮信徼幸之爲尤且使子而無學兮又安得此之憂是以君子溺名小人

死利夸者沒權貪夫踏勢豈獨二子兮吾又以悲于今之世競進之爲悅兮靜退之爲愚干祿之爲敏兮守節之爲迂一世之皆然兮固若人以喪軀昔重華之事曠兮躬秉耒乎歷山之下受帝禪而不喜兮夫孰欣于進取乘沅湘以南征兮吾知華之絕汝生汎汎而無名兮死惄惄而終古故君子審乎自得安乎幽貞道德爲爵仁義爲榮不以貴故學問不以賤故自輕悠悠兮江波奈何乎二生

蘇明允哀詞并序

曾鞏

明允姓蘇氏諱洵眉山人也始舉進士又舉茂才異等皆不中歸焚其所爲文閉戶讀書居五六年所有既富矣乃始復爲文蓋少或百字多或千言其指事析理引物託諭侈能盡之約遠能見之近大能使之微小能使之著煩能不亂肆能不流其雄壯俊偉若決江河而下也其輝光明白若引星辰而上也其略如是以余之所言於余之所不言可推而知也明允每於其窮達得喪憂歎哀樂念有所屬必發之于此於古今治亂興壞是非可否之際意有所擇亦必發之于此於應接酬酢萬事之變事雖錯出于外而用心于內者未嘗不在此也嘉祐初始與其二子軾轍復去蜀遊京師今參知政事歐陽公脩爲禮部又得其二子之文擢之高等于是三人之文章盛傳于世得而讀之者皆爲之驚或歎不可及或慕而效之自京師至于海隅障徼學士大夫莫不人知其名家有其書旣而明允召試舍人院不至特用爲祕書省校書郎頃之以爲霸州文安縣主簿編纂太常禮書而軾轍又以賢良方正策入等于是三人者尤見于時而其名益重于天下治平三年春明允上其禮書未報四月戊申以疾卒享年五十有八自天子輔臣至閭巷之士皆聞而哀之明允所爲文有集二十卷行于世所集太常因革禮一百卷更定謚法二卷藏于

有司又爲易傳未成讀其書者則其人之所存可知也明允爲人聰明辯智遇人氣和而色溫而好爲策謀務一出己見不肯躡故迹頗喜言兵慨然有志于功名也二子軾爲殿中丞直史館轍爲大名府推官其年以明允之喪歸喪于蜀也旣請歐陽公爲其銘又請余爲辭以哀之曰銘將納之于壙中而辭將刻之冢上也余辭不得乃爲其文曰嗟明允兮邦之良氣甚夷兮志則疆閥今古兮辨興亡驚一世兮擅文章御六馬兮馳無疆決大河兮噭浮桑粲星斗兮射精光衆伏玩兮彫肺腸自京師兮泊幽荒矧二子兮與翹翔唱律呂兮和宮商羽峨峨兮勢方颺孰云命兮變不常奄忽遊兮汎之陽維自著兮暉煌煌在後人兮慶彌長嗟明允兮庸何傷

錢君倚哀詞

蘇 軾

大江之南兮震澤之北吾行四方而無歸兮逝將此焉止息豈其土之不足食兮將其人之難偶非有食無人之爲病兮吾何不可獨徘徊而不去兮眷此邦之多君子有美一人兮瞭然而瘦亮直多聞兮古之益友帶規矩而蹈繩墨兮佩芝蘭而服明月載而之世之人兮世捍堅而不答其何喪兮超方揚而自得吾將觀子之進退以自小兮相行止以效清濁子奄忽而不返兮世混混吾焉則升空堂而挹遺象兮弔凝塵于几席苟律我者之信亡兮吾居此其何益行傍徨而無徒兮悼捨此而奚嚮豈存者之舉無其人兮遼遼如晨星之相望吾此年而三哭兮堂堂皆國之英苟處世之恃友兮幾如是而吾不亡臨大江而長歎兮吾不濟其有命

鍾子翼哀詞并序

宋 文 鑑

卷第一百三十二

一七五九

蘇 軾

某年始十二先君宮師歸自江南曰吾南遊至虔有隱君子鍾君與其弟槩從吾游同登馬祖巖入天竺寺觀樂天墨迹吾不飲酒君常置醴焉方是時先君未爲時所知旅遊萬里舍者常爭席而君獨知敬異之其後五十有五年某自海南還過贛上訪先君遺迹而故老皆無在者君之沒蓋三十有一年矣見其子志仁志行志遠相持而泣念無以致其哀者乃追作此詞君諱棐字子翼博學篤行爲江南之秀歐陽永叔尹師魯余安道曾子固皆知之然卒不遇以沒儂智高叛嶺南聲搖江西虔州曹觀欲籍民財爲戰守備謀之於君君曰智高必不能過嶺無事而籍民民懼且走觀曰如緩急何曰同舟遇風胡越可使爲左右手況吾民乎不幸而至于急則官與民爲一家夫孰非吾財者何以籍爲觀悟而止虔人以安其詞曰崆峒摩天章貢激石致兩確高深相臨悍堅相排澗嶽嶽是故其民勇而尙氣巧鑿斲而其君抗志厲節敏於學矯矯鍾君沐于德淵自濯濯貧不怨天困不求人老愈慤嘉言一發排難解紛已殘剝吾先君子南游萬里道阻邈如金未鎔木未繩墨玉未琢君於衆中一見定交陳禮樂曰子不飲我醪甚甘釅此濁覽觀江山扣歷泉石步堦确先君北歸君老于虔望南翔我來易世池臺旣平墓木握三子有立移書問道過我數我亦自首感傷薰心隕涕渥是身空虛俯仰變滅過電雹何以寓哀追頌德人詔後覺

哭李仲蒙辭

文 同

憐憊栗兮臨清秋懷忿憤兮紛予憂拂其弭兮久復留念將焉適兮升高中丘間胡然兮予之思組予心兮不解以繆謂遐闊兮願如其宮悵西南兮川塗緬脩已忽寤兮往嘗以此計蓋子之生于世兮期爲已休萬感芸然兮盡予之中魄幹漂潰兮索其若抽念子一去兮不可以復見顧子之于道兮尙胡爲而此謀

欲子似兮取友，但寥寥兮安求。孰識子兮子深當何人與侔？彼徒以文行兮爲子之高，其不爲賤正體而貴餘肱，如刻畫兮妄以累子。類神珠兮釁天球，如子之末兮尙可以表世。其不能究者兮彼又何尤已矣乎。子之存兮在予憶，子之疾將何時而可瘳？斂予恨兮暮來歸，煙雲飄蕭兮奉予以愁。

毗陵張先生哀辭

并序代呂侍講作

汪革

毗陵有隱君子曰張先生，孝弟脩于家，忠信行于友，而聲名聞于人，達于遠近。當世之鉅公偉人，莫不聞之。有過毗陵而不造先生之門者，人以爲恥。平居蕭然自得，凡世人之所趨而向者，先生不一經意。至接世俗而與之酬酢，則無一毫不中節度。人委之以事，未嘗以難易爲解。有造之者，爲設尊酒，一笑相樂，亦未嘗不欣然也。有勸之仕者，推挽雖甚力，終不應。固非若前世隱遁之士，事詭激甘槁薄，臞悴于山砠水厓，窮居獨遊，使影響昧昧，不聞于人。然後爲高也。而未嘗崇飾小節，要鄉黨宗族之譽。自少力學于古書，無所不窺。而時發于爲詩語，皆清新出人意表。其善于筆札，天佐也。當世士大夫欲銘述其先人功德，圖不朽于後世者，得先生書以爲榮。旣壯長益放棄世事，遂以終其身。是可謂君子也已。先生諱舉字子厚，用叔祖天章公鼎之奏，補郊社齋郎。治平四年甲科調睦州青溪主簿。先生初無意于仕，又無兄弟之助，獨養其親，故力取科第以慰親志。旣得，又不忍舍朝夕之養，而從祿于他郡。朝奉君亦安于小官，不汲汲于先生，遂不赴青溪，終其身。人不能相吏，後用近臣薦起爲潁州學官，復不就。其後孫莘老胡完夫范淳夫及外臺交薦其能，蘇子瞻亦數言于朝。於是勑郡縣以禮遣，蓋將用之也。先生終不屈，嗚呼！今死矣。予以天章公壻，自先生幼時已異其爲人，而親厚之。先生亦喜從吾兄弟遊，及長且老，凡四五十年間，其相

與之意益以篤。有自東南來者。先生未嘗不導之以見予。予與之書。雖寸紙皆藏之。故其死也。予哭之尤哀。曾祖祕給事中。祖益之尙書郎。父次道。朝奉郎。其先江南人。給事爲李氏不能用。故亡。隨李氏入朝。以直道受知于祖宗。朝奉君仁孝慈祥。兄死其孤猶已。子不欲遠去。屢以筦庫請于朝。終不大用于時。先生之節。蓋朝奉君成就之爲多。詞曰。維古制行必中庸兮。出處用舍道之從兮。降及末世。戾不通兮。首陽柱下。更拙工兮。山棲木茹。初無庸兮。鳥獸之羣。烏可同兮。偉哉先生。蹈厥中兮。達不苟進。退不窮兮。以仁爲爵。峻且崇兮。祿雖不富。義君豐兮。忠信孝友。施家邦兮。載瞻眉宇。心則降兮。激貪敦薄。助教風兮。固非亂倫而潔躬兮。惠泉遼遶。山複重兮。窅然其深。如有容兮。桂枝相繚。舊青葱兮。先生之廬。今一室兮。目極東南。涕沾胸兮。伸之以詞。寫予衷兮。

王升之誄并序

劉跋

維政和二年五月壬戌。鉅野王君升之卒于京師。七月丙辰返柩于鄆。鄉人所厚善。皆會哭。其孤兒孟博。出臨終書二紙。遺余言。峒不幸病且死。妻弱子幼。恐此骨流落。不得下從先人。伏惟哀憐。與諸賢經紀之。書凡百餘字。語無錯繆。問其家言。病甚。棺斂皆自營。將絕。付囑後事情。不悲哽。旣授書其子。教以面達。余狀遂奄忽不能言。余屬皆哭盡哀。因相與定計。告其家。以八月乙酉葬先墓之丙穴。囊橐中空。無有賣屋。未卽售。合凡。贖贈得錢九萬五千。乃使斲石治穿。買椽席灰葦諸下裏物。事皆前爲之期。如期而窆。君黃州翰林公之元孫。寶文公之子。少不羈。旣長學問。尤邃漢書。效李長吉爲詩。有致思。葬其親。至破產。雅不喜熾嗇。又體羸多疾。日事藥餌。因積貧窶。得官未及赴。疾亟。壽財四十有一。惟前悲哀稱述。必借文字。乃

作誄以見意。其詞曰：大鈞無垠，一播萬殊。靡生不遂，條達紛敷。孰戕爾根，隆夏隕枯。哀衆若人，亦孔之辜。偉君高門，一世楷撫。遺烈言言，休聲吳吳。爰及穆考，養德豐腴。維君妙齡，孔鸞將雛。踵武前脩，建旆禮輿。逢辰清明，駕言馳驅。疇或梟旃，罔所適徂。機心日灰，驕色自勗。名到仕版，自候里閭。優游卒歲，文史爲娛。毓草蘀木，畦苑躋躇。良朋萃止，肴設醴酌。退察其私，盍不宿儲。寧獨貧攻，亦復病拘。蕭然壁立，副是形癯。休文革帶，計月有餘。幼安絮帽，當暑不除。乳石斷下，糜粥充虛。長爲散人，庶以全軀。云胡遠行，旅舍窘拘。沉疴頓劇，顛倒醫巫。東野後事，孝權遺書。豈無他人，顧以屬余。嗚呼哀哉，壯心兮摧頽。白日兮須臾，永違兮昭代。不淪兮幽墟，大暮兮何晨。冥行兮空居，娶婦兮嗷嗷。幼子兮呱呱，誰與兮晤歌。謌誑兮夔魑，謂君兮非存。君墨兮猶濡，謂君兮非亡。君屋兮誰廬，折芳馨兮素華。湛玉瀝兮清酤，況思君兮不見。攬涕淚兮歎歎，嗚呼哀哉。塞物化之徂遷，慨有生之迷途。何神爽之泰定，臨驚懼而弗渝。遵寧宅于先丘，寫幽憤于素旗。庶無愆于遺託，君亦不昧夫所知。

宋文鑑卷第一百三十三

祭文

祭薛尚書文

歐陽脩
祭尹子漸文

歐陽脩
祭尹師魯文

歐陽脩
祭蘇子美文

歐陽脩
祭范公文

歐陽脩
祭杜公文

歐陽脩
祭石曼卿文

歐陽脩
祭丁學士文

歐陽脩
祭吳大資文

歐陽脩
祭孫僕射文代諸朝賢作

歐陽脩
祭孔中丞文

歐陽脩
祭僕射王沂公文

歐陽脩
祭梅聖俞文

歐陽脩
宋文鑑

卷第一百三十三

劉尹宋祁歐陽脩
歐陽脩
歐陽脩
歐陽脩
歐陽脩
歐陽脩
歐陽脩
歐陽脩
歐陽脩
歐陽脩

告伯父殯文

劉敞

祭范潁州文仲淹

王安石

祭吳冲卿相公文

歐陽脩

祭薛尚書文

祭杜侍制文

歐陽脩

景祐之元，公初解政，雖告于家，而疾未病。若脩之鄙，散辱公知公于此時，欲以女歸公，德方隆，謂當再起。齊大之昏，敢辭以禮。天不憖遺，公薨忽然。其後二年，卒追前言，生死之間，以成公志，掛劍于墓，古人之義。公敏于材，剛毅自勵，不顧不隨，以直而遂命也。在天位則難期，惟其行已，敢言是師有罪之身，竄逐囚拘，生不及門，葬不送車，致誠薄奠，因道終初。

祭尹子漸文

歐陽脩

嗚呼！天於萬物與吾人孰愛憎而薄厚？其生未始以一齊，其死宜其有天壽。苟百年者亦死，則短長之何較？推善人之可喜，謂宜在世而常存，曰仁者壽兮，是亦愛之者之說。謂善必福兮，得非以已而推天禍福吉凶，至理難通？雖聖人亦曰：命而罕言兮，豈其至此而辭窮？壽天置之，吾不能問。嗟乎！子漸吾獨有恨，我不見子於今幾時。自子得懷，始有見期，子不能來我欲亟往，子今安歸？我往何訪？昔我在朝，諫官侍從職當薦賢，知子不貢，朋黨之誣，苟避讒諷，兩相知而以心謂尺書之不用，遂聲音之永隔，哭不聞而徒慟，嗟此奠之一觴，本冀歡言之可共，往莫及兮，難追哀以辭而永送。

祭尹師魯文

歐陽脩

嗟乎師魯辯足以窮萬物而不能當一獄吏志可以狹四海而無所措其一身窮山之崖野水之濱猿猱之窟麋鹿之羣猶不容于其間兮遂卽萬鬼而爲鄰嗟乎師魯世之惡子之多未必若愛子者之衆何其窮而至此兮得非命在乎天而不在乎人方其奔顛斥逐困厄艱屯舉世皆冤而語言未嘗以自及以窮至死而妻子不見其悲忻用捨進退屈伸語默夫何能然乃學之力至其握手爲訣隱几待終顏色不變笑言從容死生之間旣已能通於性命憂患之至宜其不累于心胸自子云逝善人宜哀子能自達子又何悲惟其師友之益平生之舊情之難忘言不可究嗟乎師魯自古有死皆歸無物惟聖與賢雖埋不沒尤于文章焯若星日子之所爲後世師法雖嗣子尙幼未足以付予而世人藏之庶可無虞墜失子于衆人最愛予文寓辭千里侑此一樽冀以慰子聞乎不聞

祭蘇子美文

歐陽脩

哀哀子美命止斯邪小人之幸君子之嘆子之心胸蟠屈龍蛇風雲變化雨雹交加忽然揮斧霹靂轟車人有遭之心驚膽落震仆如麻須臾霽止而回顧百里山川草木開發萌芽子于文章雄豪放肆有如此者吁可怪邪嗟乎世人知此而已貪悅其外不窺其內欲知子心窮達之際金石雖堅尙可破碎子于窮達始終仁義唯人不知乃窮至此蘊而不見遂以沒地獨留文章照耀後世嗟世之愚掩抑毀傷譬如磨鑑不滅愈光一世之短萬世之長其間得失不待較量哀哀子美來舉予觴

祭范公文

歐陽脩

嗚呼公乎學古居今持方入圓丘軻之艱其道則然公曰彼惡公爲好訐公曰彼善公爲樹朋公所勇爲公則躁進公有退讓公爲近名讒人之言其何可聽先事而斥羣譏衆排有事而思雖仇謂材毀不吾傷譽不吾喜誰非公徒讒人豈多公志不舒善不勝惡豈其然乎成難毀易理又然歟嗚呼公乎欲壞其棟先摧桷棟傾巢破轂披折傍枝害一損百人誰不罹誰爲黨論是不仁哉嗚呼公乎易名謚行君子之榮生也何毀沒也何稱好死惡生殆非人情豈其生有所嫉而死無所爭自公云亡謗不待辨愈久愈明由今可見始屈終伸公其無恨寫懷平生寓此薄奠

祭杜公文

歐陽脩

士之進顯于榮祿者莫不欲安享于豐腴公爲輔弼飲食起居如陋巷之士環堵之儒他人不堪公處愉快士之退老而歸休者所以思自放于閑適公居于家心在于國思慮精深言辭感激或達旦不寐或憂形于色如在朝廷而官有責嗚呼進不知富貴之爲樂退不忘天下以爲心故行于己者老益篤而信于人者久愈深人之愛公寧有厭已壽胡不多八十而止自公之喪道路嗟咨況于愚鄙久辱公知繫官在朝心往神馳送不臨穴哭不望帷啣辭寫恨有涕漣洒

祭石曼卿文

歐陽脩

嗚呼曼卿生而爲英死而爲靈其同乎萬物生死而復歸于無物者暫聚之形不與萬物共盡而卓然其不朽者後世之名此自古聖賢莫不皆然而著在簡册者昭如日星嗚呼曼卿吾不見子久矣猶能鬢鬚子之平生其軒昂磊落突兀嶧崿而埋藏于地下者意其不化爲朽壤而爲金玉之精不然生長松之千

尺產靈芝而九莖。柰何荒烟野蔓荆棘縱橫。風淒露下走燐飛螢。但見牧童樵叟歌吟而上下與夫驚禽駭獸悲鳴躡躅而咿嚶。今固如此更千秋而萬歲兮安知其不穴藏狐貉與鼯鼃此自古聖賢亦皆然兮獨不見夫纍纍乎曠野與荒城。嗚呼曼卿盛衰之理吾固知其如此而感念疇昔悲涼悽愴不覺臨風而隕涕者有媿乎太上之忘情。

祭丁學士文

歐陽脩

嗚呼元珍善惡之殊如火與水不能相容其勢然爾是故鄉人皆好孔子不然惡于不善然後爲賢子之美才懿行純恕誰稱諸朝當世有識子之憔悴遂以湮淪問孰惡子可知其人毀善之言譬若蠅矢點彼白玉濯之而已小人得志慙快一時要其得失後世方知受侮被謗無如仲尼巍然衰冕不祀桓魋孟軻之道愈久彌光名尊四子不數臧倉是以君子脩身而俟擾擾奸愚經營一世迨榮華之銷歇嗟泯沒其誰記是皆生則狐鼠死爲狗彘惟一賢之不幸歷千載而猶傷自古孰不有死至今獨弔乎沅湘彼靈均之事業初未見于南邦使不遭罹于放斥未必功顯而名彰然則彼讒人之致力乃借譽而揄揚嗚呼元珍道之通塞有命在天其如予何孔孟亦然何以慰子聊爲此言寄哀一奠有涕漣漣

祭吳大資文

歐陽脩

惟公以孔孟之學晁董之文佐治三朝始終一節顧惟庸繆敢啓光塵而金門玉堂早接雋遊之末紫樞黃閣晚陪國論之餘雖出處之略同在進退而則異余實衰病久思返于田疇公方盛年宜復還于廊廟豈期白首來哭素帷飲酒百杯尙想平生之意氣寫哀一奠不知涕淚之縱橫

祭孫僕射文代諸朝賢作

宋祁

嗚呼圓方相函有奧有清稟乎粹靈賢人挺生筮宰相期有睽有遇值其嘉會盛烈斯舉允矣我公懿德乘時摠是二美蔚爲人師齊風浹浹洙浴闔閭弱齡就傅典學書紳巾箱襞積油素紛綸神宗御天擢首儒先所立卓爾其聲襯然一命筮仕十銓密啓緩玦縕帷繙經璧水禮有愛羊河無渡豕我冠兩梁我紱斯皇進陪朝禮兼侍藩房諸家去聖詆謀奪攘空言秕稗異制桁楊公憤若時毅然舍章層埤發墨塞路摧楊詵詵學徒終知嚮方章聖臨馭神庭構宇命公待詔軒然鳳舉邦實上賢人榮稽古鯁亮摩切優游博裕匪尺是杆伊柔弗茹前昧宸帷叩頭省戶砥刃以須衰章輒補謀之其臧弊庶遄沮帝念蒸黎連翩出塵奉行細札褰去垂帷神明樹政樂職聞詩居則率俾去而見思乃踐諫靄乃官瑣闈長君繼明進階貳卿追鋒趣召燕席光亨宣室清問華光授經有猷有爲弗狃弗并典常墳大武戒湯銘誦言必對嘉猷是經曰首魁壘與世作程銀臺崇崇公閱其封牧騶耳耳公專厥使或司綿蕞或教國子惟公得之異乎求之截河弗溷道凝靡虧大車而載秋陽以輝鴻飛冥冥不慕矰弋公居法從志澹慮抗章引年闔門謝客上所固留願焉弗獲龍筦納言得請東藩奎鈞灑翰宴斝申恩亦命四近賦詩贈言臥閣踰歲乞骸去位春坊傳席菟裘仙里疏受揮金式宴以喜廣德掛車貽孫及子天且佚老君能知止嚮用五福興善則常公明且哲宜壽而昌天乎弗淑委哲殲良莞簪占命忠言孔彰玉輝金相掩此不揚人彝代矩今也云亡士類相弔朝家憫傷恤恩告第蹏書密章高明令終微公孰當某等或奉緒言或麻大庇遊藩蒙潤挹流疏穢平日函文今茲交臂拘此宿官永乖薄酣有李成蹊有碑墮淚遐齋令芳庶展哀愴嗚呼哀哉

祭孔中丞文

石介

昔公爲諫議大夫知兗州，臣僚有以詩千篇獻上者，執政者卽請進爲龍圖閣直學士。上曰：千首詩豈若孔某一言？卽日拜公龍圖閣直學士。公再爲中丞，風格益峻。及公沒，劉平戰死于陣，讒賊害忠良，誣奏平非戰屈乃叛耳。天子怒，將夷平家。平家胥靡就闕，冤號道途，逢驕唱中丞來。平家將扣中丞馬，言其事。兩街賣販兒以數千嘆曰：徒往訴耳，是非孔中丞者，平家慟哭而止。噫！至尊極者，君至愚暗者，民尊極則不信。愚暗則難開，非公至忠，豈能動尊極耶？非公至誠，豈能感愚暗耶？勤乎尊極，感乎愚暗，公之道格乎上下矣。嗚呼！公之生也，君稱之；公之死也，人感之。公之道全于生死矣。夫道格于上下爲著，全于生死爲難。舉是二節，公之道充于天地之間矣。大冬殘臘，風號雲咽，節物慘淡，心肝摧折，爐烟氤氳，樽酒冷烈，享誠不享味。公來降茲，莫伸。嗚呼哀哉。

祭王沂公文

尹洙

景祐初，公臨洛師。某在幕府，公以才敏見目，數被器使。議獄處事，某或依違其言，公必丁寧勗以正道。及公再秉大政，嘗以身事有請門下。公莊色厲辭，不少恩假。某始懼中慊，終則大悟。嗚呼！凡公語言雖因事見誨，然公在大位，默不敢傳。公今薨謝，輒錄以自思。一言之誣，天實鑒之。以衰服不獲備故吏之列，情禮莫伸。嗚呼哀哉。

祭梅聖俞文

劉敞

謹以清酌庶羞，祭于聖俞二十五兄之靈。乃者鄰幾病革，君往問之，退而過我，相對嗟咎。我視君色異于

他時自爲君診。勸君從醫。君雖我信。其中猶疑。明日大饗。四方來賀。奉觴上壽。嘉客在坐。百辟相趨。敢或私臥。賜食上前。謹懼已過。疾果大作。仆不能起。俗醫控搏。以表爲裏。中涸外乾。翕翕如燬。勢一大跌。不得中止。俯仰晨夕。遂有生死。痛駭驚呼。曷云能已。孰謂旬日。殺二賢士。嗚呼哀哉。物固有生生。固有命。豈曰君子。獨天其性。君子文學。信于友朋。君子孝友。鄉黨是稱。仕不過榮。壽不百齡。一至于此。何其不平。喪還故鄉。義從此訣。哭送道周。情豈能絕。

告伯父殯文

劉敞

古者庶人之喪。鄰里執事。其在士。千里赴義。及其送葬。塗潦毋避。焉有至親。而或不至。某獨不幸。受命典城。戎馬是司。匍匐不能。不哭于堂。不祖于庭。窆不復土。虞不奉牲。回望萬里。悲號失聲。門外之治。王命實行。蓋古亦云。不卽人情。於奠陳詞。以昭哀誠。

祭范潁州文

王安石

嗚呼我公。一世之師。由初迄終。名節無疵。明肅之盛。身危志殖。瑤華失位。又隨以斥。治功亟聞。尹帝之都。閉奸興良。稚子歌呼。赫赫之家。□首俯趨。獨繩其私。以走江湖。士爭留公。蹈禍不憚。有危其詞。謁與俱出。風俗之衰。駭正怡邪。蹇蹇我初人。以疑嗟力行。不可慕者。興起儒先。曾曾以節相侈。公之在貶。忠勇爲忠。稽前引古。誼不營躬。外更三州。施有餘澤。如灑河江。以灌尋尺。宿臧自解。不以刑加。猾盜涵仁。終老無邪。講藝弦歌。慕來千里。溝川障澤。田桑有喜。戎孽獮狂。敢齧我疆。鑄印刻符。公屏一方。取將于伍。後常名顯。收士至佐。維邦之彥。聲之所加。席不敢瀕。以其餘威。走敵寧鄰。昔也始至。瘡痍滿道。藥之內外。完好。

旣其無爲飲酒笑歌百城晏眠吏士委蛇上嘉曰材以副樞密稽首禮讓至于六七遂參宰相釐我典常扶賢贊保亂冗除荒官更于朝士變于鄉百治具脩偷惰勉強彼闕不遂歸侍帝側卒屏于外身屯道塞謂宜者老尚有以爲神乎孰忍使至于斯蓋公之才猶不盡試肆其經綸功孰與計自公之貴廩庫逾空夷其色辭傲訐以容化于婦妾不靡珠玉翼翼公子弊綈惡粟閔死憐窮惟是之奢孤女以嫁男成厥家孰墮于深孰鍥乎厚其傳其詳以法永久碩人今亡邦國之憂矧鄙不肖辱公知尤承凶萬里不往而留涕哭馳辭以贊醪羞

祭吳冲卿文

嗚呼公命在西長我一時公先我苗我後公萎中間仕宦有合有離後我所踐公輒仍之出則交轡處則連攘坐肘則並行肩則差豈願敢及天實我貽公之停蓄及所設施有誥有誄亦有銘詩又將有史傳所不疑我旣憊眊何辭能爲婚姻之故唯以告悲

祭杜待制文

士恥無材恥不脩身身脩而材有不及民凡世可願於公皆有孰窺其年不使難老貴者善防其有孰窺公心豁豁不置牆帷有挾易驕不難拒善公義所在服之無賤惟以時施宜以每成又況於公強果以行物貴於時常以其少悲矣子思我如其久鍾山北蟠江落而東完厚密牢萬世之宮其歸孰知愚與在此酌公以文以配銘史

王安石

王安石

宋文鑑卷第一百三十四

祭文

祭韓欽聖文

祭曾博士文

祭王深甫文

祭歐陽少師文

祭王平甫文

祭歐陽文忠公文

祭魏國韓令公文

祭任師中文

黃州再祭文與可文

祭范蜀公文

祭歐陽文忠公夫人文

穎州祭歐陽文忠公文

祭滕大夫母楊夫人文

王安石

王安石

曾鞏

蘇軾

- 蘇軾轍
蘇頤
程曾
黃庭堅
曾肇
曾肇
曾肇
張舜民
張舜民
陳浩
陳瓘
鄒塗
田浩
畢仲游
游塗
毛滂
張繹
程伊川
祭鄭庭誨文
祭程子翁文
祭范德孺文
祭陳了翁文
祭王和甫文
祭范忠宣公文
祭呂申公文
祭王樞密文
代祭劉貢父文
祭張生文
代范樞密祭溫公文
祭彭江州文
祭知命弟文
再祭亡兄端明文
爲家君祭呂申公文
祭柳仲遠文二首

祭韓欽聖文

王安石

嗟爲君兮邦之特目揚秀兮顏髮澤紛百家兮並涉超獨懷兮道德博蕩蕩兮無畛寬恂恂兮莫迺出當官兮發論使權彊兮累息年何尤兮止此祿不多兮誰嗇具壺觴兮醉哭攀喪車兮啓夕豈獨愁兮吾僚隱多聞兮諒直顧笑語兮已矣冀來嘉兮魂魄

祭曾博士文

王安石

嗚呼公以罪廢實以不幸卒困以天亦惟其命命與才違人實知之名之不幸知者爲誰公之閭里宗親黨友知公之名於實無有嗚呼公初公志如何孰云不諧而厄孔多地大天穹有時而毀星日脫敗山傾谷圮人居其間萬物一偏固有窮通世數之然至其壽天尙何憂喜要之百年一蛻以死方其生時窘若囚拘其死以歸混合空虛以生易死死者不析唯其不見生者之悲公今有子能隆公後惟彼生者可無甚悼嗟理則然其情難忘哭泣馳辭往侑奠觴

祭王深甫文

王安石

嗟嗟深甫真棄我而先乎孰謂深甫之壯以死而吾可以長年乎雖吾昔日執子之手歸言子之所爲實受命于吾母曰如此人乃與爲友吾母知子過於予初終子成德多吾不如嗚呼天乎旣喪吾母又奪吾友雖不卽死吾何能久搏脣一慟心摧志朽泣涕爲文以薦食酒嗟嗟深甫子尙知否

祭歐陽少師文

曾鞏

惟公學爲儒宗材不世出文章逸發醇深炳蔚體備韓馬思兼莊屈垂光簡編焯若星日絕去刀尺渾然

天質辭窮卷盡含意未卒讀者心醒開蒙愈疾當代一人顧無儔匹諫垣抗議氣震回遹跋疐非恤世僞難勝孤堅竟室紫微玉堂獨當大筆二典三謨生明藏室頓挫彌厲誠純志壹斟酌損益論思得失經體慮萌沃心造膝帝曰汝賢引登輔弼公在廟堂尊明道術清靜簡易仁民愛物斂不煩苛令無迫猝棲置木索里安戶逸櫛斂兵革天清地謐日進昌言從容密勿開建國本情忠力悉卯未之歲龍駕飈欵再拯大艱垂紳秉笏乾坤正位上下有秩功被社稷等夷召畢公在廟堂總持紀律一用公直兩忘猜昵不挾朋比不虞訕嫉獨立不回其剛仡仡愛養人材獎成誘掖甄拔寒素振興滯屈以爲己任無有廢弛維公平生愷悌忠實內外洞澈初終若一年始六十懇辭冕黻連章累歲乃愈所乞放意丘樊脫遺羈累沉浸圖史左右琴瑟氣志浩然不陋蓬蓽意謂百齡重休累吉還斡鼎軸贊微計密云胡傾殂慙遺則弗聞訃失聲皆淚橫溢憇冥不敏早蒙振拔言蘇公誨行蘇公率戴德不酬懷情獨鬱西望轎車莫持紩繡維公犖犖德義譏述爲後世法終天不沒託辭敍心曷能髫鬚嗚呼哀哉

祭王平甫文

曾鞏

嗚呼平甫決江河不足以爲子之高談雄辯吞雲夢不足以爲子之博聞強記至若操紙爲文落筆千字徜徉恣肆如不可窮祕恠恍惚亦莫之係皆足以高視古今桀出倫類而況好學不倦垂老愈專自信獨立在約彌厲而志屈於不伸材窮於不試人皆待子以將昌神胡速子於長逝嗚呼平甫余昔相逢我壯子稚間託婚姻相期道義每心服於超軼亦情親於樂易何堂堂而山立忽泯泯而飈駛計皎皎而猶疑淚汎汎而莫制聊寓薦於一觴纂斯言而見意

祭歐陽文忠公文

蘇軾

嗚呼哀哉公之生於世六十有六年民有父母國有蓍龜斯文有傳學者有師君子有所恃而不恐小人有所畏而不爲譬如大川喬嶽不見其運動而功利之及於物者蓋不可以數計而周知今公之沒也赤子無所仰庇朝廷無所稽疑斯文化爲異端而學者至於用夷君子以爲無與爲善而小人沛然自以爲得時譬如深淵大澤龍亡而虎逝則變恠雜出舞鮀鱣而號狐狸昔公之未用也天下以爲病而其旣用也則又以爲遲及其釋位而去也莫不冀其復用至其請老而歸也莫不惆悵失望而猶庶幾於萬一者幸公之未衰孰謂公無復有意於斯世也奄一去而莫予追豈厭世溷濁絜身而逝乎將民之無祿而天莫之遺昔我先君懷寶遁世非公則莫能致而不肖無狀因緣出入受教於門下者十有六年於茲聞公之喪義當匍匐往救而懷祿不去愧古人以忸怩緘詞千里以寓一哀而已矣蓋上以爲天下慟而下以哭吾私嗚呼哀哉

祭魏國韓令公文

蘇軾

天生元聖必作之配有或司之不約而會既生堯舜禹稷自至仁宗龍升公舉進士妙齡秀發秉筆入侍公於是時仲舒賈誼方將登庸盜起西夏四方騷然帝用不赦授公鉄鋌往督西旅公於是時方叔召虎入贊兵政出殿大邦恩威並行春雨秋霜兵練民安四夷屈降公於是時臨淮汾陽帝在明堂欲行王政羣后奏功罔底于成召自北方付之樞衡公於是時蕭曹魏邴二帝山陵天下憮惄呼吸之間有雷有風有存有亡有兵有戎公於是時伊尹周公功成而退三鎮偃息天下嗷然曷日而復畢公在外心在王室

房公且死，征遼是卹。嗚呼哀哉！六月甲寅，人之無祿，喪我宗臣。我有黎民，誰與教之？我有子孫，誰與保之？巍巍堂堂，寧復有之？公之云亡，我無日矣。慟哭涕流，何嗟及矣！昔我先子，沒于東京。公爲二詩，以祖其行。文追典誥，論極皇王。公言一出，孰敢改評？施及不肖，待以國士。非我自知，公實見謂。父子昆弟，並出公門。公不責報，我豈懷恩？惟此涕泣，實哀斯人。有肉在俎，有酒在樽。公歸在天，寧聞我言？嗚呼哀哉！

祭任師中文

蘇軾

允義大夫，維蜀之珍。詩之老成，易之丈人。去我十年，其德日新。庶一見之，遽沒元身。惟慥與軾，匪友則親。自丙以降，昔惟州民。旅哭于庭，惻焉酸辛。禍福之來，孰知其因？自壽自天，自屈自信。天莫爲之矧，凡鬼神。生榮死哀，自昔所難。持此令名，歸于九原。

黃州再祭文與可文

蘇軾

嗚呼哀哉！我官于岐，實始識君。方口秀眉，忠信而文。志氣方剛，談詞如雲。一別五年，君譽日聞。道德爲膏，以自濯薰。藝學之多蔚，如秋蕡脫口成章。粲莫可耘，馳騁百家。錯落紛紜，使我羞歎。筆硯爲焚，再見京師。默無所云，杳兮清深。落其華芬，昔執我黍。今熟其餕，啜漓歌呼。得淳而醺，天力自然。不施膠筋，坐了萬事。氣回三軍，笑我皇皇。獨違垢紛，俯仰三州。眷戀桑梓，仁施草木。信及麋麌，昂然來歸。獨立無羣，俛焉復去。初無戚欣，大哉死生。悽愴蒿君，君沒談笑。大鈞徒勤，喪之西歸。我竄江濱，何以薦君。採江之芹，相彼日月。有朝必曛，我在茫茫。凡幾合分，盡此一觴。歸安于墳，嗚呼哀哉！

祭范蜀公文

蘇軾

嗚呼仁宗在位四十二年。畦而種之。有得皆質。旣歷三世。悉爲名臣。今如晨星。存者幾人。孰如我公。碩大光明。導日而昇。燦焉長庚。死生契闊。公獨壽考。天實祐之。以殿諸老。二聖嗣位。仁義是施。公昔所言。略行無遺。維樂未和。公寢不寧。樂成而薨。公往則瞑。凡百君子。願公無極。胡不萬年。以重王國。責難之忠。愛莫助之。嗟我後來。誰復似之。吾先君子。秉德不耀。與公弟兄。一日之少。窮達不齊。歡則無間。豈以閭里忠義。則然。先君之終。公時在陳。有夢告行。晨起訃聞。先友盡矣。我亦白髮。聞公之喪。方食哽咽。堂堂我公。豈其云亡。望公凜然。猶舉我觴。

祭歐陽文忠公夫人文

蘇軾

嗚呼文忠之薨十有八年。士無所歸。散而自賢。我是用懼。日登師門。旣友諸子。入拜夫人。望之愀然。有穆其言。簡肅之肅。文忠之文。雖無老成。典刑則存。何以嗣之。使世不忘。諸子惟迨。好學而剛。夫人實使。兄弟吾孫。徵福文忠。及我先君。出守東南。往違其顏。病不能見。卒以訃聞。自歛及葬。餽奠莫親。匪愧于今。有覲昔人。寓詞千里。侑此一樽。

潁州祭歐陽文忠公文

蘇軾

嗚呼軾自齠齶。以學爲嬉。童子何知。謂公我師。畫誦其文。夜夢見之。十有五年。乃克見公。公爲拊掌。歡笑改容。此我輩人。餘子莫羣。我老將休。付子斯文。再拜稽首。過矣公言。雖知其過。不敢不勉。契闊艱難。見公汝陰。多士方譁。而我獨南。公曰子來。實獲我心。我所謂文。必與道俱。見利而遷。則非我徒。又拜稽首。有死無易。公雖云亡。言如皎日。元祐之初。起自南遷。叔季在朝。如見公顏。入拜夫人。羅列諸孫。敢以中子。請婚

叔氏夫人曰然師友之義凡二十年再升公堂深衣廟門垂涕失聲白髮蒼顏復見穎人穎人思公曰此門生雖無以報不辱其門清穎洋洋東注于淮我懷先生豈有涯哉

祭滕大夫母楊夫人文

蘇軾

嗚呼士盛慶曆如漢武宣用兵西方故西多賢惟時滕公實顯于西文武殿邦尹范是齊功名不終有命有義我時童子知爲公喟四十餘年墓木十圍乃識其子傾蓋不凝忠厚具文前人是似秉心平反慈訓則爾仰止德人如岡如陵升堂而拜猶愧未能豈其微疾一慟永已胡不百年以慰其子壽祿在天考終非亡鵠巢之應子孫其昌

祭柳仲遠文二首

蘇軾

嗚呼哀哉我生多故愈老愈艱親朋幾人曰代日遷逝者如風計來逾年一慟海徼摧腎破肝痛我令妹天獨與賢德如召南壽甫見孫矧我仲遠孝友恭溫天若成之從政有聞富以學術又昌以言久而不試理豈其然崎嶇有求凡以爲親雖不負米實勞且慙知止于此不如歸閑哀我孤甥生如內顏銜痛遠訴誰撫誰存逝者已矣存者何冤慎勿致毀以全汝門慰我仲遠永歸之魂嗚呼哀哉我厄于南天降罪疾方之古人百死有溢天不我亡亡其朋戚如柳氏妹夫婦連璧云何兩逝不憇遺一我歸自南宿草再易哭墮其目泉壞咫尺闕也有立氣貫金石我窮且老似舅何益易其墓側可置萬室天定勝人此語其必

再祭亡兄端明文

蘇軾

嗚呼惟我與兄出處昔同幼學無師先君是從遊戲圖書寤寐其中曰予二人要如是終後迫寒飢出仕

于時鄉舉制策並驅而馳猖狂妄行誤爲世羈始以是得終以失之兄遷于黃我竄于筠流落空山友其所堪瘴起襲帷艤來掀簷臥不得寐食不暇甘如是七年雷雨一覃兄歸晉陵我還潁川願一見之乃有不然瘴暑相尋醫不能痊嗟兄與我再起再顛未嘗不同今乃獨先嗚呼我兄而止斯耶昔始宦遊誦韋氏詩夜兩對床後勿有違進不知退踐此禍機欲復斯言而天奪之先壘在西老泉之山歸骨其旁自昔有言勢不克從夫豈不懷地雖郊郿山曰峨眉天實命之豈人也哉我寓此邦有田一廛子孫安之殆不復遷兄來目西於是盤柏卜告孟秋歸于其阡潁川有蘇肇自兄先

爲家君祭呂申公文

程頤

嗚呼公稟則異得天之粹遘茲昌辰出爲嘉瑞生而富貴處之無累幼而聰明充之能至學既知真仕則爲道出入屢更險夷一操二聖臨御人望是從起藩入輔命相冊公平日視公靜默恂恂國論所斷一言萬鈞謂公無位位爲相臣謂公得志志存未伸然公心如權衡所以無間言於率土德如山嶽所以致敬心於人主從容語默之間人孰量其所補胡上天之不弔不一老之愍遺淵水無涯將孰求於攸濟百身莫贖爲有識之同悲嗚呼哀哉羸老餘生辱知有素二男論忘勢之交不偶無酬知之路阻臨穴以仲哀姑託文而披露想英靈兮如在監丹誠而來顧

祭知命弟文

黃庭堅

君歿荊州我在萬里歿後四月始聞訃音旣無孤惄恃有兄弟夫旣喪我君不能年自我哭君頭髮盡白

英風豪氣窟此一棺。拊棺長號，殆無生意。公私之計，身有所靡，既難以歸。舟車可慮，乃得吉卜。旅殯僧坊，雖遠至親，理則安寧。無驚無恐，扶將上輿，絕慟一觴。君其尚饗。

祭彭江州文

曾肇

嗚呼器資忽不見其安之乎。孰爲天生斯人而止於斯乎。人固忌子之獨立，天亦責子之不詭隨乎。不然，何以壽不躋於六十位，不過四品卒泯默而無施乎。嗚呼器資凡世可貴，學問文章言語政事有一于茲，足高士類，而況居今行古，蹈義依仁，衆人所趨而視若無有，舉世所背而仔肩以身檻窄當前而不避，曾何得喪之足云。此固聖賢之自任，豈止度越於時人。至若孝友著於閨門，信義行於鄉閭，處榮悴而無虧，臨死生而不亂，可謂內外全德，始終一貫，實橫流之砥柱，宜大廈之棟幹。柰何道未行於當世，福未及於生靈，忽飄流於下國，遂天關於脩齡，去此昭昭，卽彼冥冥，有志不就，銜恨泉扃。惟自立之卓偉，亘萬世如日星，彼一時之苟得，譬熠燿之與長庚。嗚呼器資末俗陵遲，朋友道熄，許與之分切磋之益，衆皆訕訕，子獨汲汲，我生昏愚，與世殊適，惟子好我，論心莫逆。我先我後，子爲羽翼，我有過咎，子爲藥石。子善誰責，豈無他人。莫如子直，嗚呼器資念者太學相從之初，綢繆縹緥，二十年餘中，閒省闌並，典贊書出，入風議，惟予子俱，子如飛黃，豈受罣拘，有言不用，去不須臾。我亦遭讒，自請州符，跡有乖隔，心焉弗殊，去歲京城，子留我北，中情莫宣，相視默默，我行未幾，子亦南遷，孰云契闊，曾不經年，尺書未達，已隔終天寢，門一慟，有淚如泉。嗚呼器資子訃之來，我適罪逐，相念平生了然在目，匍匐欲往，身有羈束，千里寓辭，以代號哭。

代范樞密祭溫公文

張來

嗚呼天祚有邦界之元龜篤生我公爲世父師夷齊之清淵騫之德子產之惠叔向之直人擅其一足以成名公兼衆德乾乾不寧九流百家金匱石室鈎索沉隱裁其失得根抵治亂經綸皇極作爲文章有書秩秩玄圭大裘望之肅然冬暘夏冰赴者爭先仁英兩朝錚錚厥聲國有正人折姦于萌芽染柔木求直於繩我公盡親君心則寧烈烈神考體貌有德公獻有可巖巖翼翼言有未用不敢受爵深衣幅巾歸休於洛公則休矣四方顚顚君子野人泊于它邦聞風懷歸于父子兄天施不齊或怨寒暑公獨何施四海一譽元豐末年國有大事穆穆文母宥我神嗣爰立作相媚于神人我公在庭其重萬鈞士賀于朝民歌于塵農慶於野兵休於邊燠爾慄寒養其飢孱無瘡于飢無休于田培其本根枝葉則茂豈曰我作憲章惟舊於赫聖考左右上帝休公于家實遺聖子卷耳思賢夙夜周京不惑不疑成此太平公之去來人之戚嬉人之戚嬉帝之從違豈人事耶天實爲之純仁不才辱公之深人之相知貴相知心惟公我知洞達表裏采其所長謂或可使申結義好丘山不移匪我則然公實取之泚泚清洛獨樂之園嘉華春敷修竹夏寒清酌修然我招我從琅琅嘉言有銘在躬朝偶之人備位樞機入與國論獲親風規六七年間爲益不貲私祈白首從公以歸憂勞傷生公旣遘疾庶幾有瘳卒相王室國祠旣誓公以喪聞我心之悲不獲至門入哭于室公旣大斂終天之情不一見面人生有死如旦夜耳曾子將沒知免而喜公身旣修公志旣畢旣壽令終無有其失有如公者古今萬一任重道遠稅駕茲曰庶幾念此以紓我悲猶有鬼神實聞我辭

代祭劉貢甫文

張來

嗚呼子之強學博敏超絕一世肇自載籍孔墨百氏太史所錄俚問野記延及荒外陰陽鬼神細大萬殊一載以身下至律令老吏所疑故事舊章在廷不知有問於子歸如得師直貫傍穿水決矢飛一時書林衆俊並馳滿堂賢豪視子塵揮逸足奇毛不受纁羈擯守列郡吏民畏思治盜宛朐不事誅斬他嚴見欺子愛不犯中斥于南人憂子怡歸來白首晚職訓詞子之來歸亦旣疾病惟其精明猶足以永誰云如子竟止斯耶國失君子善人之嗟方其盛時弛不得張亦旣有遭而盡其強誰與子仇敗子百世雖然今日竟何有亡惟我與君同年進士申以婚媾兼恩與義平生笑談樽席安喜其當在耶臨此酒哉

祭張生文

張舜民

嗚呼學者所以去鄉里離父母妻子甘淡薄盡勤勞繼晝夜而不息者知患其道之不至而不患乎身之不安也身安可以學道知愛其道以亡其身亦蔽之深者也而吾子旣死矣其知之乎否耶然諫諍之臣死於朝廷疆場之臣死於敵國吾子死於庠序其志一也有雖凶而無咎者吾子之謂乎嗚呼吾子年猶未壯敏而好學死乎數千里之外母老而失所養妻寡而失其依晚節末路委爲窮人天道固如何哉是可悲也已

祭王樞密文

張舜民

夫物有自小而致大積卑而致高唯豫章之材數年而過百尺騏驥之足一日而馳千里黃河發源而注海太華拔地而參天與夫命世之英特起之士布衣負公輔之望小官蘊廊廟之器一旦遭時遇主建功

立業奸邪望風而屏息。賢者引類而彙征。朝廷以之治安。禮樂由是興起。則豈特豫章騏驥黃河之太華比也。其公之謂乎。唯公少而居家。則膺令名。長而出任。則有公望。乘時設施。自州縣之卑。數年之間。致位二府。危言大節。懾動天下之耳目。明而可見者著。以爲甲令。隱而不露者。杜患於未形。披榛攘棘。正路廣開。大奸雄懾。束手竄身。歷觀先世以來。固有以兵武而克禍亂。定策而安邦家者。率皆塗炭驅除。糜爛而後止。曾未若雍容於簾箔之前。啓迪於方幅之内。興利除害。如醫者以毫芒之鍼。刀圭之藥。愈膏肓沈憊之疾。不知其工妙之端也。宜其天下爲之矚目。二聖謂之有功。孟子自謂放淫辭詎誠行以承三聖。程公之力。較公之才。固不在孟子之下。然才高則多嫉。位隆則招殃。曾不旋踵。讒言遽興。未及中年。百疾交作。二聖方隆之眷。而有云亡之嘆。八十待養之親。而嬰哭子之情。善人堂堂。擯死略盡。爲國家者。將何賴焉。始猶疑之人事。今日乃知天極自天。復何言哉。嗚呼。公之存不能共致其力。公之歿不能一哭其門。徒然予知有愧。古昔遺詞。揮淚靈乎。歆哉。

祭范忠宣公文

陳瓘

昔文正公在仁祖時。忠於謀國。衆正所依。心虛而明。照了不疑。先事而慮。告如蓍龜。兩遭勅榜。益奮不移。外禦元昊。數蹈禍機。國勢旣安。奚恤我危。考公行事。尤也似之。安不擇地。難不敢辭。至於言兵。則曰不知。豈曰爲異。各遵其時。不述其跡。是乃無違。三年遽改。生事者誰。蔡相南行。公獨救之一。勝一復。其兆在茲。公可以默。又進忱辭。人亦有言。公爾忘私。孰能臨義。捨安取危。一斥四年。盲廢始歸。天子哀憐。拜命涕洟。其心不盲。意有所施。人願公留。爲帝龍夔。病不能對。人所嘆咨。天子曰吁。疾尚可爲錫。以上劑。臨遣國醫。其心不盲。意有所施。人願公留。爲帝龍夔。病不能對。人所嘆咨。天子曰吁。疾尚可爲錫。以上劑。臨遣國醫。

丁寧訓飭速療勿遲。云何不淑。竟止於斯。嗚呼哀哉。公果已矣。舉世思公。公不來矣。人之於公。有合有睽。聞公之歿。睆者亦悲。情隔生死。公論乃出。悲公之人。始自今日。臨終不昧。忍死有述。小其一身。大我王室。置小恤大。自初訖終。可使聞者。勸而作忠。太宗征遼。喬死不忘。公之所慮。奚獨一方。願惜生靈。願合朋黨。願爲宣仁。一洗誣謗。願正其事。願辨其人。願以中道。行帝之仁。嗚呼哀哉。言惟心聲。孰無此聲。孰有此誠。神器雖大。如人之形。愛養胃氣。可以保生。陽明之經。徧於四體。呼吸之間。無有不差。左絡連右。首脉應趾。中經流行。寧有定位。彼執一者。棄異取同。異我曰偏。同我曰中。語各有心。心各有物。孰能審是。而不彼恤。公獨有言。繼者誰乎。公薨我悲。豈緣葭莩。公昔南遷。我在北陲。側身以望。心往從之。及公之還。我有言責。陳留雖近。欲往不得。平生想慕。獨未識公。見公之心。何必形容。文正歿後。公又亡矣。仲季方興。公復有子。其門益大。其道益光。公可無憾。我亦奚傷。

祭呂申公文

鄒浩

天祐上主。篤生我公。來對休運。爲今人鴻面愧執璧。啓心而恭。衆方竊迫。公獨從容。爰有因革。論起如蠶。公徐一言。翕然以從。事已而默。終日斂躬。若無所與。莫測胸中。但見百官。上下以功。但見四夷。車書以同。但見田野。年穀以豐。流離者復。憔悴者充。白顛黃馘。端若兒童。爰笑爰語。涵泳時雍。朝廷益尊。勳業益隆。殊尤俊偉。益振家風。人亦有言。孰不薦紳。維公秉國。始爲有臣。人亦有言。孰不是似。維公肯構。始爲有子。竊惟公初。信非凡人。情不聲色。學不空文。西山之清。孟軻之醇。德盛行高。孰與擬倫。如古寶器。如時慶雲。世獲覩者。倍萬懽忻。所以施設。如前所陳。公昔去位。君子怛傷。比登三事。交賀壺觴。宜其昊天俾壽而康。

曷爲不仁禍降非常兩檻入夢中台坼光歲值龍蛇遞爾云亡業岌大廈摧其棟梁爰自二聖遠極八荒知與不知失聲霑裳顧如某者頃在廣陵辱公青眼收之門庭豈徒應格薦其姓名每及人物猥賜題評遂令踈賤聞于公卿重念參侍屏息人後未嘗請間敢祈公售爾來日月不爲不久文章工乎問學正不公竟不問不考其有若爲憐之久而益厚仰惟此恩山嶽在首吉卜伊邇將舉神匱義當捨官躬設雞酒願莫之遂視古則醜寓茲一奠以昭不苟公騎箕尾寧來欽受

祭王和甫文

田晝

惟公心符於跡實稱其名包含蘊蓄見於力行頃在并府參訂機務韓侯于宣城彼西土發民四萬以踵其武將臣依違莫敢或悟公曰不然深入賊所師干之用茲亦焉取振旅言旋書可插羽毋空我師祇以餌虜我言有成帝用嘉止陟於陪屬亦旣顯仕士有險膚冥人危機娟彼技能掇於文詞童贍孺嘵羣舌毛起公獨營之卒免於死明明天子從諫如流爰屬星變直言是求敢謂臣鄰不臧其謀厚歛竭作變則有由擢尹王畿剖煩折微游刀砉驕風颶霆飛曾未百日狴犴告空夷人駭觀邦史奏公遺書上變蔓延無辜公摘其姦弭於須臾丘封萬計終以不徙請師文王掩骼埋骴乃發菟厯乃治強梗貴幸側目權豪歛衽遂躋丞輔天子是毗正人所倚細民所腓有夏多罪天命徂征鼠奔鳥竄師老于行皇帝震怒載整其旅簡期授材恢我疆圉內焉卿士噤不一語外焉方鎮則惟所舉公力如虎公乃有陳豈不來威眷此下民皇帝曰都汝惟可信一言罷師天子神聖其惠伊何曰蠲其逋其恕伊何曰緩其獄忠烈允著仁風載穆孰是勳庸而不公屬法吏沾沾吹毛剗骨陵藉衣冠狐翫豕突有如公者致於彈文竟坐棼墨廢其

終身粵雋在下實公貽恥勿俾堙沈式穀以位熾佞截截心折膽落嫉公居中肆是讒謫出領大邦曰昇與青周旋楊雍晚殿于井政尚寬大存繅弔惄肆靖我境其隱如城公在帷幄恩威延延彼蠢者羌毋敢犯邊施及卒伍以至降虜祝公百年稽額蹈舞胡爲遇疾奄見殂歿疇昔起之以定王國於皇聖君誰適謀矣哲人云亡梁木靡矣蚩蚩之甿靡所依矣街祭巷泣嗟何及矣維昔不肖往官江瀆龍塞鳳翥始見偉人平生知己世無擬倫執手上堂得於逡巡匪惟知之抑又存之保釐我躬燕及其私自時契闊亦復流離川塗阻越夢寐懷思旌旆北來言適太鹵迎拜霍丘笑言如故恩斯閔斯公意愈隆引寘幕府獻醻從容謂公壽康歸相天子乃今冥冥聲采頓委大明在上品物在下巍巍堂堂遽卽長夜我心傷悲公葬有期念非古人懷祿在茲旒車髦鬚與公永違致彼薄奠有愧公知嗚呼哀哉

祭范德孺文

畢仲游

曩歲識公靈武之城公貌旣偉公氣亦英黃河滸海間關共行公矜我憇我知公誠遂同夷險期以死生其後公顯鏗鏘有聲旣顯而貴隱然大名帥慶帥延帥熙帥并武夫悍卒怖若雷霆軍師老將心服其寧屬鞬聽命甘從使令四路十年不知有兵及公尹洛以嚴輔明下教旣悉擿伏亦精洛城萬室千里爲畧公獨裁之如穴被塞凡人之情好寬喜逸公獨檢之規矩繩墨宜其不懌而以爲病乃獨懷公式歌且詠豈其施設遠而難窺人樂其大而忘其私不然則公不足爲奇矧公門戶奕世顯榮太師爲父相輔爲兄公又崛起峩峩嶧嶧宜繼三人秉國之成而公一廢十有八齡公廢于家匪公匪卿二邊倚重猶如長城

人言公復士夫倏興人言公用夷虜震驚公復之日萬耳皆傾復未之用而公已薨嗚呼哀哉吉人今喪矣胷中之奇包而往矣威名氣像豈可爲矣予末小生將何依矣慟哭于野出相送矣追念平昔恍如夢矣嗚呼哀哉

祭陳了翁文

游酢

嗚呼陳公萬夫之傑大虛無塵心凝知徹經綸大猷如挈裘領灼知幾先眇綿作曷慮遠而知者疑言危而弱者警蓍龜有稽可觀而省嗚呼陳公知事道而已不知鼎鑊之臨其顛也知徇國而已不知陷穿之橫其前也阨之白首而氣愈和蹙之死地而志愈堅處約彌久妻孥裕然畎畝念忠頂踵利物人疑其爲墨平生拯飢任重一身吾知其爲稷行道之人聞者心惻意者天將降之大任而空乏其身耶意者吾君將追念其篤誠發獨斷而收之以澤斯民耶嗚呼孰謂流離川途遭廻萬狀而淪於淮楚之濱耶嗚呼孰謂謀可以託心膂力可以任股肱而志願卒不伸耶浩浩元精慘不知其因耶歲首之書後訃而達執書一慟肯驚心折嗚呼陳公蓋將有哲人能盡知而賢之有志士能慷慨而言之有仁人能經紀其家而存之有良史能具載其實而傳之區區鄙詞曷足以涉其流而泝其源乎寓奠一觴聊薦悃愞東望傷懷淚落橫牕

祭程伊川文

張繹

嗚呼利害生于身禮義根于心伊維此心喪于利害而禮義以爲虛也故先生踽踽獨行於世衆乃以爲迂也維尙德者以爲卓絕之行而忠信以爲孚也立義者以爲不可犯而達權者以爲不可拘也在吾先

生曾何有意心與道會冥然無際無欲可以係羈兮自克者知其難也不立意以爲言兮知言者識其要也德猶如毛毛猶有倫無聲無臭夫何可親嗚呼先生之道不可得而名也伊言者反以爲病兮此心終不可得而形也維太山以爲高兮日月以爲明也春風以爲和兮嚴霜以爲清也在昔諸儒各行其志或得乎數或觀乎禮學者賴之世濟其美獨吾先生淡乎無味得味之真死其乃已自我之見七年于茲含孕化育以蕃以滋天地其容我兮父母其生之君親其臨我兮夫子其成之欲報之心何日忘之昔先生有言見乎文字者有七分之心繪乎丹青者有七分之儀七分之儀固不可益七分之心其猶可推而今而後將築室于伊洛之濱望先生之墓以畢吾此生也嗚呼夫子沒而微言絕則吾固不可得而聞也然天不言而四時行地不言而百物生惟與二三子洗心去智格物去意期契斯道在先生爲未亡也嗚呼二三子之志不待物而後見先生之行不待誄而後徵然而山頽梁壞何以寄情淒風一奠敬祖于庭百年之恨并此以傾

祭鄭庭誨文

毛滂

石梁鬱然上有佳氣下走清湍昔聞異人相携盤桓寥寥至今漁樵所安尙意山閒人必有異下乃君廬長廊甲第記初識君在稠人中孤雿傲兀知不可籠一見傾蓋定交尊俎豈惟姻聯氣則相許予才闢蕡寡諧於世所賴得君差彊人意奮然高談氣蓋一座有非吾曹瞪目欲唾君真偉人秀眉奇狀使當卒學仕必人上退託於酒日飲亡何羽衣岸巾枕麪而哦小詩立成晚更婉熟不樸不圓元和贋馥揮金如土結客如市遠韻翛然形骸之外名利之徒其隘如髮敗意苦心十居七八開口一笑人生能幾君醉不知

笑以沒齒。君年不足行樂則過。胡用百憂齒拙髮墮。曩子西征相酌以酒。酣歌悲壯起舞爲壽。予謂此別行當來歸。當益釀酒。從君遨嬉。予歸酒熟。君不復臨。有佳風月。如聆車音。薦酒君堂。予目泫然。呼君不聞。是豈醉眠。

孫襄宣公議

張忠定謚議

趙僖質謚議

陳執中謚榮靈議

歐陽文忠公謚議

范忠宣公謚議

祈雨祭漢高皇帝文

吏有常職來官于滁者不三四歲而易也神食于此無窮已也神與吏於滁人孰親且久孰宜愛其人之

深也滁人敢慢其吏而犯吏法者有矣未聞有敢慢神而犯威靈也其畏信勤事於神也吏於凡小且猶皆勤有法令約束違則有罰孰若神之變化不測而能與民轉災爲福也吏朝夕拜禱彌旬越月而無所感動神之召呼風雲開闔陰陽而役使鬼物頃刻之間也今民田待雨急矣吏知人力不能爲猶竭其力而不得已況神之易爲也况滁人畏信勤事之久而親神宜愛之而又有可以轉災爲福變化不測之能也吏誰敢與神較而某輒以此爲贊者蓋哀民之急辭也其政不善而召災旱又以爲贊神宜降殃于某而賜民以雨使賞罰並行而兩得也民之幸也某之願也

宋祁

劉敞

韓維

李清臣

鄧忠臣

歐陽脩

北嶽祈雨文

自冬無雪大寒不效宿麥枯槁涉春之仲土僵凍泮天極愈高暖氣蚤來癘鬼挾疫以中齊人寒咳僵仆

宋祁

赭埃蒙田，耒耜弗施。夫家愁嘆，疾首無訴。坐待飢虛，臣荷二千石印綬。克長此邦，部九州軍地，幅員千里。民有不獲，匪臣孰司。臨政不敏，御下弗嚴。事神不虔，怨詛騰布。爲疾爲旱，職臣所召。向者已遣府從事，投訴祠闕。冀蒙嘉生，而涉月跨歲。大和閑鬱，終風連朝。雲合輒披，臣日夜自省，不知所救。惟身多罪，蔽暗懦愚，非帝所赦。不敢逃誅，斯民何辜。擢此亢厄，孩耋相持，驅就困窮。有仁如帝而不垂閔，側聞古諸侯祭境內山川，以山川能出雲爲風雨。見怪物福庇其下，而血食之。自侯以降，養犧儲醪，跪伏進薦，或禴或嘗。不敢有貳，以能爲之主也。惟帝所宅，乃州之望。何材不取，何變不除。然則蓄而泄之，沛潤千里，振洗惔焚，奮張葉牙。滋液流浸，啓侑有年。是岳所以主而州所以爲望也。人能事神，神能庇人。方窮而訴，必見哀情。物薄情豐，所恃至誠。

祭左丘明文

黃晞

噫嘻嗚呼，天地何私。鐘才特殊，智羅萬象。器函八隅，堯形舜骨。禹步湯趨，巍巍左丘。千古德孤，周屏魯撓。玉石混渝，何王何侯。何主何奴。鬼哭朝陽，狐巢國都。丁艱憤辰，閉目涕裾。捉簡磨鉛，申杼踟蹰。仲尼經之，神居緯諸。百王千法，電熠霞鋪。浮忠暴孝，竄姦磔訛。弗官而賞，弗斧而誅。雲龍譎詭，麟鳳怡愉。星紀二十，鱗如燦如。後俗荒醉，履捷迷途。跬步咫尺，荆棘扶疎。鄒夾公穀，不式不謨。侵官盜位，犯禁擢辜。辜指白爲赤，驚聾駭愚。太陽無色，殘燈有餘。惟聖作古，降聖異區。四子於是，析言厚誣。仲舒劉向，習異牽拘。病在膏髓，徒信皮膚。有漢後葉，方漏本書。子駿元凱，怒氣虹舒。赤地申力，橫流展圖。大年倏臻，平原罔虞。凜然千祀，清風襲予。時移事遠，迷終反初。陸淳啖趙，信吠空虛。黃踵成習，夸紫亂朱。方孩躡躅，作氣跺跺。骨幹葱弱，

吻齦乳濡張脣哆齒洞塘囁嚅狂聖殊厲齊鑣並驅蚓口蟬腹性稟只且張皇受納毫芒碎銖孰先而師孰後而徒更唱迭和蠅喧蠻吁喧嘻嗚呼有梟者子食母含腴有梟之士爲儒賊儒古人有法健爾之軀少宰司寇木偶屍蛆柝劍尺鐵土蝕階除旁徨觀者血迸睛枯歲次庚寅假道曹墟秀領參天苦霧冥糾寤寐晷刻肸蠁冥符驚醒感嗟肅齋造祠酌水投文噫嘻嗚呼

祭馬當山上水府文

呂誨

惟神道靈水府雄據長江濟物利人載在祀典然風波重阻帆檣交會物貨貿遷者商人之利也又如冒官敗墨侵漁下民重裝以還者貪吏之利也是皆行險徼幸日進千里而不知其徑者利汨於中豈計於險易一有傾覆固其宜矣至若艤尾相噏率鍾致石遠奉公上固有期會豈得已者又況忠臣義士忘軀報國一言忤時謫斥萬里雖葬於魚腹未厭仇人之欲與夫徇福誠異趣爾意天地設險阻舟楫濟不通皆有所謂神據險阻受國封爵濟物利人福善禍淫乃其職爾今狂蛟肆怒乘風鼓浪恣其覆沒阽危若是果威靈不能制耶彼安濟者皆其幸耶某六年中再得罪沿泝上下者四移麾晉陽舟次于是適值風濤幾爲淪溺三日未霽故具牢醴禱訴所誠神其監焉

諸廟謝雨文

曾鞏

吏之罪大矣一切從事於謹繩墨督賦役而已民之所欲不能與所惡不能去自恕以竊食不知其可媿安能使陰陽和風雨時乎故若某者任職於外六年于茲而無歲不勤於請雨賴天之仁鬼神之靈閔人之窮輒賜甘澤以救大旱吏知其幸而已其爲酒醴牲饗以報神之賜曷敢不虔維神尚終惠之使水有

年則神亦無窮有依于人。

福州鱠溪禱雨文

曾鞏

嗟呼旱也誰則爲之丸丸之稼將槁而萎嗷嗷之衆曷望而依爲閩屬者寇賊之罹逮其旣附我士已疲餘醜成羣百十睢睢跳浪出沒負力乘巘亦有爲渠諸偷所推相望某布未受爾羈室家莫寧遠近以疑吾人卽安含糗而嬉士馬亦奮桓桓驥驥天子聖德海邦是綏維此海邦初亦難饑今宇寧矣師征始歸今食足矣廩實尙微若歲大熟如梁如茨如陵如坻自公及私獄無訟繫里無盜闕式于永世方始在茲今此大田旣碩而齊俾不卒成熟忍爲斯神有靈蹟國人所祇神有顯號天子所躋萎能起之槁能澤之胡能有餘斂而不施我用卜日蚤駕以馳卽告潭側尙其聽之攘除驕陽騰雲彌霓播爲甘液霑洒淋漓俾農有秋百物具宜熄偷與爭長置刑笞人於報事豈有斅思

始定時薦告廟文

張載

自周衰禮壞秦暴學滅天下不知鬼神之誠繼孝之厚致喪祭失節報享失虔狃尙浮圖可恥之爲雜信流俗無稽之論世代寢久習爲厥常載私淑祖考遺訓聖賢簡書歲恥月慙朝儻夕惕比用瞻拜愧汗不容自安竊自去秋以來稍罷無謂節名閭閻俗具一用拜朔之辰移就新薦然而四時正祀尙未講脩禮謂士有田則祭無田則薦祭用四孟薦用仲月載於秩命乃視天子中士當用四仲擇日申薦成禮故議自今春二月爲始決用四時分至之日舉行常儀然尙懼採擇之未明恬俗之易駭或財用不足或時不

得爲未免雜用。夔味燕器。參從近事。遽爾變創。要之所安。恭惟考妣恩明。尙賜矜享。間有未盡。仍幸稍益改脩。方歲之初。不敢不告。惟賜鑒諒。幸甚。

生擒西蕃鬼章奏告永裕陵祝文

蘇軾

大獮獲禽必有指縱之自豐年高廩孰知耘耔之勞。憬彼西戎古稱右臂。自嘉祐末木征擾邊至熙寧中董氈方命於赫聖考。恭行天誅。非貪尺寸之疆。蓋爲民除蠭賊。遂建長久之策。不以賊遺子孫而西蕃大首領鬼章。首犯南川。比連拓拔申命諸將擇利而行。旋聞偏師無往不克。吏士用命爭酬未報之恩。聖靈在天難逃不漏之網。已於八月戊戌生擒鬼章。韻利成擒。初無渭水之恥。郅支授首。聊報谷吉之冤。謹當推本聖心。益修戎略。務在服近而來遠。期於偃革以息民。仰冀威神曲垂昭鑒。

禱雨社稷四首

蘇軾

噫我侯社我民所恃。祭于北墉答陰之義。陽亢不歹。自春徂秋迄冬不雨。嗣歲之憂。吏民嗷嗷謹以病告。錫之雨雪。民敢無報。

右社神

神食于社。蓋數千年更歷聖王。訖莫能遷。源深流遠。愛民宜厚。雨不時應。亦神之疚。社稷惟神。我神惟人。去我不遠。宜軫我民。

右后土

農民所病。春夏之際。舊穀告窮。新穀未稔。其間有麥。如渴得涼。如行千里。弛擔得漿。今神何心。憮此雨雪。

敢求其佗尙憫此麥

右稷神

惟神之生稼穡是力。廬身爲民。尙莫顧惜。矧今在天。與天同功。召呼風雲。孰敢不從。豈惟農田。井竭無水。我求於神。亦云亟矣。

右后稷

祭戰馬文

路振

咸平中。契丹犯高陽關。執大將康保裔。略河朔而去。天子幸魏。遣特將王榮以五千騎追之。榮無將材。但能走馬。以馳射爲事。受命恆怯。數日不敢行。伺賊渡河而後發。賊有剽淄齊者。數千騎尙屯泥沽。榮不欲見敵。遂以其騎略界河南岸而還。晝夜急馳。馬不秣而道斃者十有四五。天子憫之。遣使收瘞焉。因作祭文曰。

房駟之精。降爲驪驛。泉水呀風。流沙激霆。虎脊孤聳。龍媒驚獰。丹髦曉霞。的穎秋星。茀方著幹。宜乘旋膺。嶺臚角起。方皆珠明。爾其絕塞草荒。八月隕霜。毛縮蹄研。筋舒脈張。獸惡恐噬。虬獰欲驥。噴沙散沫。千里飛雪。戎人負紩。武士索鐵。前遮後突。雷動地裂。忽挽一而制百。終伏撾而授絨。戎官劬劬。歲入券書。蹄踵纍纍。通乎鬼區。名駒大駘。銜尾入塞。勞其酋長。節以駟僧。蜀錦吳繪。積如丘陵。馬歸於我也。重幣入於彼也。輕於是絡黃金之羈。浴天池之波。鼓鼴雲衢。弄影星河。或踶而齧。或駔而叱。蠭蠭申禁。駟駿何多。帝念神物來經遠道。閱之于內殿。養之于外阜。飲以玉池。秣之瑤草。窮冬虜塵。入我河濱。羽書宵飛。龍馭北巡。

選仗下之名馬屬閫外之武臣。瑣戈電燭禁旅星陳授以長策帥以全軍將士怒兮山可擘。猛馬哮兮虎可咋。何嗟嗟之無勇反遷延而避敵冰霜淒淒介甲而馳不飲不秣載渴載飢駿馬餒死行人嗟咨委天骨於衢路返星精於雲霧報主恩之無及齊戎力而何誤生芻致祭弊帷成禮瘞于崇岡全爾具體馬如有神知帝之仁嗚呼。

謚議

贈尚書右僕射孫爽謚議

宋祁

博士宋祁議曰：僕射清明莊重體柔而用健暢和吸粹儲爲英華在布衣韋帶有深沈不器之韻緩玦彈冠賓于王門是時宋興四十餘歲天子上文嚮學開太平之原薪槱髦士充布臺闕而未有卓然以儒名家僕射由經生博貫前載乃以詩之多識書之知遠易之肆而隱春秋之婉而微禮之肅雍樂之易良參勸講授爲薦紳倡始執據聖道洮汰羣疑斗杓所建遂成寒暑珩璜所觸自然宮徵歷官上庠居爲時宗旣而籍內禁閣踐諫省駁曹之任入進其熟出詭其辭批鱗罔憚職衰無闕在蹇王臣匪躬在說命朝夕納誨惟僕射舉之愛莫助之屬今上濬明厥初物色舊老實膺丹書之間進對華光之塗用階告猷式克躋聖桓榮稽古寬中眇論惟僕射有之是以似之及宸幄歸道安車稅駕天文裹錢士倫嗟挹俾耆而艾以歿元身大君廢朝行路相弔賻布所須一出長府密章加等昭飭下泉信乎令終之高顯大雅之明哲矣謹按謚法體和居中宣善問周達曰宣如僕射處躬彌沖在醜忘競不居物累不爲盜憎其讓如范宣其慎如子孺能體和矣內治家事外施邦政接士無貌言祝神無媿辭協用通介時其進退能居中矣行成

束脩節貫華皓終以碩望顯升師臣其所薦士皆足以經哲秉猷敷賁皇極遜遠時譽常如不及以年得謝嚮考終之福生平素守鮮如晨葩信善問矣建白紳次百餘篇傳經見義質聖行遠藏于冊府副在家櫨推明則董仲舒博洽則劉向其周達矣節惠知行請謚曰宣謹議

張忠定謚議

劉敞

太常禮院謚故禮部尙書張公曰忠定太子中允直集賢院同判吏部南曹劉敞覆議曰尙書布衣之時任俠自喜破產以奉賓客而借軀報仇往往過直及讀書爲文折節受學則爽厲明白務求道真至於策名試吏倣儻奮發思自見於世不令已失時蓋有古賢之風而神宗聖考知人善任使每盡其用雖專斷於外而上不疑此其所以感激慷慨能成功名者也夫英偉卓犖之人固自負其材可以意氣忠信結而不可以祿位貨利取也尙書再在蜀及宦臨泣皆朝廷所倚重或兵荒之餘而言聽計從德澤下流民到于今稱之蓋君之圖任一則士之報施重其不然歟自宋興以來且百年言治者甚衆其直已以事上盡心以撫下生有榮名死有遺愛者尙書殆無與並焉末年以疾害於朝謁不至大位士君子以爲恨今主上甄德念功使有司追賜之謚而曰廉方公正安民大慮竊以謂無間然矣請從博士之論以充太史之錄謹議

趙僖質謚議

劉敞

議曰春秋之議視遠物者見其形不見其容聽遠聲者聞其疾不聞其舒此褒貶之審也少傅公歷事三朝嘗列四輔謀膜之益施爲之效蓋多有矣然而入則極論出則詭詞是以人無聞焉雖推美讓德大臣

之宜亦其天性恭慎然也今太常易名謂之僖質稽類揣稱竊以爲允謹議

陳執中謚榮靈議

韓維

執中幸得以公卿子遭世承平因緣一時之言遂至貴顯皇祐之末天子以後宮之喪問所以葬祭之禮執中位爲上相不能總率羣司考正儀典以承答天問知治喪皇儀非嬪御之禮追冊位號於宮闈有嫌建廟用樂踰祖宗舊制執中白而行之曾不愧憚遂使聖朝大典著非禮之舉此不忠之大者閨門之內禮分不明夫人正室疎薄自紺庶妾賤人悍逸不制醜聲流布行路共知此又治家無足言者夫宰相所當秉道率禮以弼天子正身齊家以儀百官執中不務出此而方杜門深居謝絕賓客曰我無私也我不黨也豈不陋哉謹按謚法寵祿光大曰榮不勤成名曰靈執中出入將相以一品就第可謂寵祿光大矣得位行政不爲不逢死之日賢士大夫無述焉可謂不勤成名矣請合二法謚曰榮靈

歐陽文忠公謚議

李清臣

太子太師歐陽公歸老于其家以疾不起將葬行狀上尚書省移太常請謚太常合議曰公維聖宋賢臣一世學者之所師法明于道德見于文章究覽六經羣史諸子百氏馳騁貫穿述作數十百萬言以傳先王之遺意其文卓然自成一家比司馬遷揚雄韓愈無所不及而有過之者方天下溺於末習爲章句聲律之時聞公之風一變爲古文咸知趨尚根本使朝廷文明不愧於三代漢唐者太師之功于教化治道爲最多如太師真可謂文矣博士李清臣得其議則閱讀行狀考按謚法曰唐韓愈李翹權德輿孫逖本朝楊億皆謚文太師固宜以文謚吏持衆議白太常官長有曰文則信然不可易也然公平生好諫爭當

加獻爲文獻無已則忠爲文忠。衆相視曰其如何則又合議曰文獻疊犯廟謚固不可忠亦太師之大節。太師常參天下政事進言仁宗乞早下詔立皇子使有明名定分以安人心及英宗繼體今上卽皇帝位兩預定策謀有安社稷功和裕內外周旋兩宮間迄于英宗之視政蓋太師天性正直心誠洞達明白無所欺隱不肯曲意順俗以求自便安好論列是非分別賢不肖不避人之怨誹狙疾亡身履危以爲朝廷立事按謚法道德博聞曰文廉方公正曰忠今加忠以麗文宜爲當衆以狀授清臣爲謚議清臣曰不改於文而傳之以忠議者之盡也清臣其敢不從遂謚文忠謚議

范忠宣公謚議

鄧忠臣

伏惟太常寺定開府儀同三司范純仁謚議如前議曰謚法云慮國忘家曰忠善聞周達曰宣古之慮國忘家者固嘗有焉兼之善聞周達者蓋亦鮮矣全是二美得之純仁太常旣易其名博士又爲之議移文覆訂屬於考功忠臣桉純仁爲大臣之子布被脫粟而不以爲非都上公之司袞衣繡裳而不以爲泰要終原始考實求聲歷事五朝堅持一節厚同宗之族猶葛纍之庇本根見慢上之人如鷹鷗之逐鳥雀凡言責與官守皆諫行而計從讜論嘉謀確乎其不拔令名廣譽闡然而日彰在畎畝未嘗忘君思飢溺不獲由已作尙書解以進如宋璟之爲元龜抗濮園議以聞如師丹之爲黃耆臨公家之利知無不爲得小大之情矜而不喜每思捐身而開策所願休兵而息民祇知扶危而濟傾寧恤跋前而疐後文有黃裳之吉而內美言無白圭之玷而外華頃緣秉鈞適丁連茹方讒言亂國而明蔡確之無實洎姦黨投名而謂大防之可原當衆人莫敢言之時在偏州無所用之地義形於色憤發至誠非止救當時正人端士之織

羅直欲戒後世亂臣賊子之迷罔徇公忘己爲國惜賢興言嗟嘆使人於邑父母之國有時而去股肱之義於是或虧放之江湖忽如草芥紓蘭澤畔更甚屈原之忠占鵬坐隅已分賈生之死惟天知善惟君知臣適訪落之初年講圖舊之新政側席南望而決浮雲之蔽擁節東歸而詠零雨其濛公望益隆恩數彌渥法座想見其風采詔書相望於道塗欲入覲則未能願養疾者益懇改元三日以不起聞天子於是震悼輶朝贈加等告其第開府儀同三司之府表其墓賜世濟忠直之碑人臣哀榮無以尙此古學有訓阿衡詎專美乎商君違不忘臧孫將有後於魯古之遺直今也則亡謚曰忠宣於義爲允

宋文鑑卷第一百三十六

行狀

馮侍講行狀

張文定公行狀

馮侍講行狀

宋祁
宋祁

馮元字道宗。年六十三。公之先。始平人。四代祖官廣州。唐末關輔亂。不敢歸。而劉氏據南海。僑斷士人。故三世食其祿。太祖定廣公之禰。本劉氏日御。國除。始爲王官。授保章正。老病免。遂占數都。內公少嗜學。保章君不欲公疇其業。使從故僕射孫宣公授五經大義。又友博士崔頤。正逮冠彊立博覽。外嗛嗛若不足。中敏力甚。自經典故訓。祖襲師承。穿穴筵楹。皆能駕其說。浸弄翰爲詞章。默而有沉鬱之思。出入服襢衣。習矩步。如大賓。祭鄉人化其謹。至以俚語諺之。不妄交遊。惟樂安孫質。吳陸參。譙夏侯圭。相友善。三人皆直諒而材。故號四友。家貧。盛冬無薪燎。夜輒市瓶酒。與圭對經研推。一再酌以自溫。或達旦不瞑。真宗大中祥符元年。由進士調臨江縣尉。再暮罷。會講員缺。詔冬集吏能明經。得自言試可。公往應令。時諫議大夫謝泌領選。精果有風鑒。見公儒者嘻笑曰。吾聞古治一經至皓首。生能盡善也邪。對曰。達者一以貫之可矣。謝奇其對。因抉經義疑晦者。廷問參詰。公條陳詳詣。言簡氣願。謝抵掌嗟伏。卽日聞上授國子監直講。由是名震京師。公卿大夫家爭欲屈公授道者。久之遷廷尉平。又兼崇文院檢討。其八年程覆俊選。公

待詔殿中。帝讀易至泰卦。命說其義。公旣道繇象云云。因本君臣感會。所以輔相財成者。帝悅。賜五品服。稍親近之。禁中建龍圖閣。皮藏祕冊。置學士待制等員。爲搢紳譽處時用。尚書工部郎中李虛己。兵部員外郎李行簡。待制。是時公仕資淺。故以太子中允充直閣。直閣蓋由公始。數召入與二李賜清間。說易盡。上下經。帝嘗稱公誦說通而不泥。言外自有餘趣。非專門一經士也。俄改三品服。天禧元年。以諫議大夫假節使契丹還。遷太常丞兼判禮院。吏部南曹。先是今上在儲闈。帝欲得肅艾長者。使之勸學。訪於宰相。時太尉文正公以公對。或者謂公言差少。罷不用。更用博陵崔遵度。四年。遵度卒。帝卽擢公左正言兼太子右諭。德代其任。它職如舊。初文正聞公名而未之識。一日召至第。先使諸子質經義。密視其人。淹粹亮恪。乃自見之。授其老子。它日令詣府與執政衆試。已而爲帝言數矣。故公之顯。文正力焉。公由孤生挾儒術。進出入十餘年。鋗玉華綏。與諸儒獻歌頌。數得進見兩宮。所以褒禮賜予尤渥。便蕃光明。爲時宗國器。當世休之。今上嗣位。改尚書工部員外郎。升爲直學士兼侍講。未幾。孫宣公亦入露門。執經遞進。公得孫同列。以爲寵。孫得公亦自以知人爲多。兩人提衡諷道。上益嚮學。俄兼會靈觀副使。知通進銀臺司兼門下封駁事。天聖元年。判登聞檢院。明年。判國子監。三年。改禮部郎中。五年。同知貢舉。時天下階計參陪公。協力程綜。片善必錄。雖鉤捶臬平。不計其公未幾。正爲學士。當是時。天子念先帝盛烈。裁績信書。爲一王言。故貳卿中山劉公筠。今資政殿學士常山宋公綬。丞相潁川陳公同。領史事而已。丞相爲開封府。浩穰劇三輔。乃罷史官。諸公亟以公請。詔從之。書閱兩朝。論次筆削者衆。至是褒懲謹嚴。近古風烈矣。其十一月燎祭南郊。爲鹵簿使。七年。召入翰林爲學士。凡三禁職。皆天下選。而公兼有且優爲之。又判尚書都省。

俄爲三班院歲餘改吏部郎中八年以國書成進諫議大夫充史館修撰九年爲吏部流內銓兼羣牧使明道元年十月旣考室謝享宗廟又爲鹵簿使以赦令例遷給事中明年耕耤田使任如廟禮俄爲莊獻莊懿二太后園陵鹵簿使前此莊懿之未祔也壘都城右郊公嘗假鴻臚護其葬及梓宮之遷斥土沮溼近戚詆公監視亡狀十月解翰林學士及侍講二職出守河陽辭得見上但頓首引咎自請治郡滿三年奉計以報會太學官屬叩丞相府上書留公柄臣悔欲弗遣公固願行到部以清靜稱不作條教今左僕射王沂公自洛師入覲爲上言馮某東朝雋老不宜以纖芥棄外上亦意合卽日馳傳詔公景祐二年春二月至日自河陽改禮部侍郎兼翰林侍講學士兼知審官院復判太常禮院國子監公旣還朝自以羽翼舊人身託勸講宜出入諷議不苟默而已乃獻金華五箴弼違告猷詞兼婉切上納其戒優詔答之會上留意雅樂閔經文殘缺規創大典夏四月詔公領修樂書俄復爲南郊鹵簿使管祥源觀事明年七月書成上號其書爲景祐廣樂記特遷戶部賞勞也公素有蹠蹠不堪趨拜四年春病發劇告未滿三月會小瘳公自力造朝未幾病復甚氣上遷害言語後四月戊戌終于正寢上聞訃震悼以本曹尙書告其柩贈錢三十萬絹百匹醪米牢具稱之愍贈之所以優加君臣之際深矣公之配夫人周氏封臨汝郡無息命詔可擢諫衛尉寺丞諫子二人釋褐並爲將作監主簿卽孤厚忠之恩乃如是是其德已侈大哉公自褫巾至捐館進階及勳各六詔爵五封戶五加而再實其食如今署焉志閑素恬於仕進無表襯之飾雖當路諸公率賀弔一與衆往異時不造也門無雜賓惟經生朔望承問及搢紳道義交數人而已接士以

禮雖新進後生與之鈞終日談便便惟謹無戲言墮色是以受詔入主戎客於都亭館由慎恪以得之不呼僧及道士嘗執親喪自括髮至祥練皆按禮變服未始爲世之所爲齋薦者惟卒哭後遇祭日與數門生誦說孝經而已罕語浮屠氏亦不誦言排訾之熏蒿禳祓可以動氣餒者皆不動近不問家產增損晝治官事夜還讀書蟄御亦簡其面故能多識博練自臺閣文書故新品式叢夥紛厖有所咨訪者咸能記之太學禁閣容巨三局閱二十年仍其任本不愆不忘故也尤精易及揚雄方部學初公七歲母夫人令授易是夕夢公吞紺蓮夫人旦而撫公曰兒善讀此後必貴顯真宗果以識拔晚年愈刻志率三日一讀又欲爲子雲諸首作章句且患宋衷陸續范叔明宋惟幹漫漶舛駘思盡黜之最後得唐王涯註以爲差近先作釋文一篇欲遂因王說而補正之亦終不果公嘗預註先帝集同修鹵簿記校後漢志孟子及律并義疏采獲是正多得其眞同修玉牒分撰國朝會要未克就生平著述無編次家人搜攢得數百篇清緻平粹及在禁署益邇雅務爲溫純而采加焉居三城作詩百餘章推已指物曠而不怨有雅人餘風性寬厚多恕當官下未嘗以罪平鐫吏吏亦畏其明而安其仁樂道人之善好與人爲善無議事不肯自意出大者薦之二府小者與其屬聯請類多不可紀公一無建白者其遠名若此然內剛有守不流於衆初善音者取上黨黍縱累爲尺因裁十二律以獻遂改大樂鍾石以合其私老師宿工者首鼠不敢議後有建言其非者上未有以決遣中人卽太常下舍問公新樂以縱黍定尺寧有非邪公卽擿班固律曆志唐令兩說付中人因對古者橫黍度寸今以縱亂橫其法非是中人馳入明日上坐邇英閣語公曰尙考正大樂患其寢高而急今也下而緩二者不得其中失在律卿言是矣因出橫黍新尺示羣臣比縱尺差二

寸一分而弱以校衡斗皆不讎當是時微公言幾無發其繆者假有之果且不能取信於上傳曰仁人之言固博而利歟公前歿三日屬于一二僚執曰吾仕願素足今無一私以干縣官惟是窀穸累諸君已而得遺禮之文諄諄納忠訖無它語用是中外尤痛惜之公友隴西李公淑敕故吏相謙以終事嗚呼公有佐王之材不自顯雖持囊珥筆在省戶爲名命訓辭所出裁十二三使公當其時而稍自崖異不難於進益發素蘊幸而十四五且次入衡弼不爲婆娑連塞如今章章矣雖然命有屈於公公無不慊於道使素概清埃奮厲無窮薄夫光宗嫌諱夸夫懼百世之後呻簡想風者以輩魯臧文仲漢賈誼董仲舒彼此相易寧有失得間耶某曩以胄筵儀範刊綴音典皆爲公屬及此緒訓又參聞之故公治行之全頗獲詳究今日月有期矣官在三品法當得謚謹用第述上於有司節謙受名請遵故實謹狀

張文定公行狀

宋祁

張詠字復之年七十惟公稟尊嚴之氣凝隱正之量粵在羈貢不偕兒曹巍然志嚮高自標置就外傳即覽羣經書必味於義根學乃知於言選家貧無以本業往往手疏墳史每有屬綴輒据庭樹槁枝而暝苟不終篇未嘗就舍碑碣若多節默表大廈之材居然晚器弗示良工之朴太原王搏名知人見公儻然異之獨謂公曰唐魏文公本生此鄉故老有言後五百年復出一佳士元精回復祭酒當之矣公謝不敢當興國四年始遊鄴下與故上谷寇公準推轂引重時屬鄉里命秀方國試言府將雅欽公名議爲舉首夙儒張覃者悃愞有行疏畧少文公卽以檄謁府盛稱其長覃終得薦公爲之下彙茅有吉爵砥相先讓夷之風一變河朔明年進士及第釋褐大理評事知鄂州崇陽尤厲風迹大江之南民裕文弊因以手而上

下獄爲人而重輕。公廉知其狀，痛繩以法，精力於職，擿伏如神。洗其鏘薄，鎮之忠厚。吏樂其職，多一笑而歸休。民協攸居，或減年而從役，就改將作監丞。著作佐郎，解秩授太子中允，關掌麟州軍事。夏臺弗靖，西戎方強。公繕起亭鄣，精明烽火，坐贊叔敖秉羽之策，多參嫖姚穿土之樂。伐謀取勝，西鄙以安。端拱紀元，天田躬籍。轉祕書丞，明年充禮部考試官。已事復倅相州，一懼之年，始爲親解百斤之贍。終以懇辭，乞董濮上市征，以便迎養。詔可其奏，月餘召賜五品服。知浚儀縣，俄爲荆湖北路轉運使。事不諉，上世咨其清勤。罷太守姦贓，疲懦者十數人悉條所部廢格於弊者百餘事。稜威所振，吏皆股弁。察廉使上其理狀，璽書褒美。三年遷太常爲郎中，再旬乘馹赴覲，加錫金紫。翌日遷虞部爲郎中，再旬授樞密直學士，賜錢五十萬。判銀臺承進司，門下封駁事兼三班院。河東大將張永德小校犯法，因笞而死。詔按其罪，公卽封還制書。白上曰：「永德爲國才爪居天下勁兵處，若以一部曲擢辱主帥，臣恐有輕上之心，不納。」因不關銀臺而下書譙讓。未幾果有營兵脅訟軍候者，公復爭前事，上輒優容謝之。會賊順緣間，坤維搖亂，偏師數萬，鼓行而西。太宗以爲潢池弄赤子之兵，荆棘生大軍之後，疇咨上輶，崇簡守臣。參豫武功，蘇易簡白上曰：「某甫可屬大事，當一面。若奉將威命，降諭劇賊，陛下高枕，永無西顧之憂矣。」乃命公知益州，揆日占謝，賜白金一百四十斤。鴻卿出郊，不復內御。子顏引道，初無辨嚴。朝家方以大師未集，留之半歲。公潛簿所賜，上還長府。其秋遂詔赴部，公終不復言。至道二年，改兵部猶爲郎中。會丁新昌郡太夫人之喪，恩詔奪服。陽秋之義，不以家事爲辭。禮經所執，亦推順變之人。真考嗣曆，邇臣均需。卽拜諫議大夫，歸朝遷給事中。戶部使七旬拜御史丞。咸平二年知貢舉，杜絕書謁。時稱得人。夏改工部侍郎，知杭州。五年移京兆。明年戶部使。

轉刑部復爲樞密直學士再知益州尋加吏部猶爲侍郎景德三年罷歸領三班登聞檢院奉朝請先時生瘍於腦至是弗損家第賜告環中造適移狀言上醉請外藩尋知金陵兼江南安撫使岱宗成禮改尚書左丞昇人以秩滿願留卽拜工部汾睢飲至又進禮部皆爲尙書疾劇還臺求訪高手荐剡需頭之奏願遂角巾之遊魏舒之先行後言人無知其去位平津之何恙不已詔益勉於存神猗違半年必於得謝上不獲已出公知陳州以大中祥符八年八月一日遂終于理下享年七十嗚呼景命弗究宗工其萎知仁均哀殲我何贖邦人改祠而爲諱道路舉音以過喪真宗聞訃震嗟追贈尙書左僕射以天禧四十一年二十七日權窆於陳州宛丘縣孝悌鄉謝村焉從宜也公始娶夫人唐氏卒繼室以太原郡夫人王氏卽河陽節度使顯之女允執婦道以佐君子後公三年而歿子從質以父任累遷至衛尉丞居公之喪一月以毀而夭女一人適故內相王公禹偁子嘉祐母弟說以公延賞今爲虞部員外郎孫四人曰約曰綜曰綽曰紳咸以忠厚世其家公階至正奉大夫勳上柱國爵開國公食封三千七百戶實戶四百其大較也公姿宇爽邁謀謨沉敏道架俗表氣籠霄極任節俠已然諾不寃不輒如玉如瑩脩詞立誠博見強志諦書兼兩賓蓋成陰佐郡被邊遭時右武入蠻封而試馬回策若繁張狸步以射侯捨矢如破總物纖密絕人遠甚及夫司封駁則詳言粹儀有任魄之沈正總臺憲則擢姦觸佞有傳誠之剛簡治益部也宿師屯結縣官乏食掾史搏手狂狡啓心公乃賤售益鹽翔貴困米貿遷鍾豆諷告鄉縣民或妄言沮公公斬之以徇自是見糧大集戰士倍氣矣自不逞挺亂重城晏閉主帥王繼恩上官正頓師入保埋根不進坐失脫免之拒居若賈胡之留公以爲將不親行衆不可使乃勸正自當一隊以賈羣勇正許諾行有日

矣。公慮其不進。於是椎牛宿帳。具出餞之禮。中坐酒酣。親舉屬軍尉曰。爾曹俱有親弱在東。蒙國恩厚。恐無以塞責。此行當直擣寇壘。盡其噍類。平定之日。東向以報。目見朝廷舉萬年之觴。豈不快耶。若猶老師逸囚。疲民曠日。卽此地還爲汝死處也。正由此車行架入。詭道兼進。殊死鏖戰。盡俘凱旋。公乃出車勞勤。擢金大會。以次論獲。先命行賞。皆伏公氣決。不敢迎視。繼恩帳下。卒縋城夜逸。吏執以告。公惡與繼恩不叶。卽命繫投眢井。一府無知者。先時劫掠之際。誣染尤衆。脅從有狀。歸訴無階。各保營壁。共懷猜貳。公以爲鹿不擇陰。旣亡生路。虫入其腹。懼益厲階。亟下符移鑄說。魁宿宥其枝黨。縱歸田里。譬以大恩訖。無敢桀。及再任也。屬六羸南牧。靈旗薄伐。公慮遠夷爲變。欲出意以勝之。因取盜賊之尤無狀者。磔死於市。凜然人望。遂臻靖嘉。每吏牘便文。久不得判。公率爾署決。人皆厭伏。罰旣值罪案。無庾情。蜀中喜事者。論次其詞。總爲誠民集鏤墨傳布。雖張敞之爲京兆。時時越法縱舍。黃霸之守潁川。人人咸知上意。無以過之。牧餘杭也。遭民薦飢。方蜡不啓。稻蟹無種。原田苦藝。民挾鹽利以冒公禁者。日數百輩。公一切笞遣。不徇羣法。遷戍人啓曰。法亂如是。人將安禁。公勞之曰。餘杭十萬戶。飢者七八。弗挾鹽利。無復生意。若暴禁之。彼將圜視衝擊。以擾居者。則爲蹶大矣。爾曹第忍之。俟其歲定。則太守復以三尺律從事矣。是年雖歉。人無叛命者。富家子與壻分財不協。詣府廷辯。壻曰。彼先子有治命。壻七子三。因出遺札。子不能舉其契。公索酒醉地曰。彼父智人也。當死之日。子方沖孺託養於壻。苟子有七分之約。則亦死於壻手矣。今當七分歸子。三分歸壻。於是二人號慟以爲神明。公之操決。率是類也。原其遇二聖也。以功名自任。故力與命偕。顯八座也。以方格見信。故言與行危。本乎直清。貫以忠恕。無乞靈徼福。無人非鬼責。履重剛不險。臨大節。

不奪葵藿弗採於猛獸山川寧捨於驛角若夫安世之恨謝公歸之滅私大有之文明小雅之愷悌公皆兼有其美惜其未極柄用違愆腠理上欲爲相者數矣天之不憖也悲夫公雅好著文深切驚邁以不偶俗尙自號乖崖公尤善詩筆必覈情理故重次薛能詩序之曰放言旣奇意在言外議者以公自道也生平論著仲氏詵集之成十卷以行於代內外歸之日無捐膺之妾無雜弔之賓終齊事而乃瞑取禪書而頌德漢廷諸老恨王駿之不侯天下之人爲隴西而流涕斯非遺愛遺直立功立言之極歟敢撫令猷以須臾闕謹狀

宋文鑑卷第一百三十七

行狀

司馬溫公行狀

司馬溫公行狀

蘇軾

曾祖政贈太子太保。曾祖母薛氏贈溫國太夫人。祖炫試祕書省校書郎。知耀州富平縣事。贈太子太傅。祖母皇甫氏贈溫國太夫人。父池尚書吏部郎中。充天章閣待制。贈太師。追封溫國公。母聶氏贈溫國太夫人。公諱光字君實。其先河內人。晉安平獻王孚之後。王之裔孫征東大將軍陽始葬今陝州夏縣涑水鄉子孫因家焉。自高祖曾祖皆以五代衰亂不仕。富平府君始舉進士。沒於縣令。皆以氣節聞於鄉里。而天章公以文學行義事真宗仁宗爲轉運使。御史知雜事。三司副使。歷知鳳翔河中同杭虢晉六州。以清直仁厚聞於天下。號稱一時名臣。公自兒童凜然如成人。七歲聞講左氏春秋。大愛之。退爲家人講。卽了其大義。自是手不釋書。至不知飢渴寒暑。年十五。書無所不通。文詞醇深有西漢風。天章公當任子次。及公公推與二從兄。然後受補郊社齋郎。再奏將作監主簿。年二十舉進士甲科。改奉禮郎。以天章公在杭辭所遷官。求簽書蘇州判官事以便親。許之。未上。丁太夫人憂。未除。丁天章公憂。執喪累年。毀瘠如禮服。除簽書武成軍判官事。改大理評事。爲國子直講。遷本寺丞。故相龐籍名知人。始與天章公遊。見公而奇之。及是爲樞密副使。薦公召試館閣校勘。同知太常禮院。中官麥允言死。詔以允言有軍功。特給鹵簿。公

言孔子不以名器假人繁縟以朝且猶不可允言近習之臣非有元勳大勞而贈以三公之官給以一品鹵簿其爲繁縟不亦大乎故相夏竦卒詔賜謚文正公言謚之美者極於文正竦何人可以當此書再上改謚文莊遷殿中丞除史館檢討修日曆改集賢校理龐籍爲鄆州徙并州皆辟公通判州事公感籍知已爲盡力時趙元昊始臣河東貧甚官苦貴糴而民疲於遠輸麟州窟野河西多良田皆故漢地公私雜耕天聖中始禁田河西者虜乃得稍蠶食其地俯窺麟州爲河東憂籍請公按視公爲畫五策宜因州中舊兵益禁兵三千廂兵五百築二堡河西可使堡外三十里虜不敢田則州西六十里無虜矣募民有能耕麟州閑田者復其稅役十五年能耕窟野河西者長復之耕者必衆官雖無所得而糴自賤可以漸紓河東之民籍移麟州如公言而兵官郭恩勇且狂夜開城門引千餘人渡河載酒食不爲戰備遇敵死之議者歸罪於籍罷節度使知青州公守闕三上書乞獨坐其事不報籍初不以此望公而公深以自咎既沒升堂拜其妻如母撫其子如昆弟時人兩賢之改太常博士祠部員外郎直祕閣判吏部南曹遷開封府推官賜五品服交趾貢異獸謂之麟公言真僞不可知使其真非自然而至不足爲瑞若僞爲遠夷笑願厚賜其使而還其獸因奏賦以諷遷度支員外郎判句院擢修起居注五辭而後受判禮部有司奏六月朔日當食公言故事食不滿分或京師不見皆賀臣以爲日食四方見京師不見天意人君爲陰邪所蔽天下皆知而朝廷獨不知其爲災當益甚皆不當賀詔從之後遂以爲常遷起居舍人同知諫院蘇轍直言策入第四等而考官以爲不當收公言轍於同科四人中言最切直有愛君憂國之心不可不收時宰相亦以爲當黜仁宗不許曰求直言以直棄之天下其謂朕何公遂與諫官王陶同上疏願爲宗廟

社稷自重，卻罷燕飲，安養神氣，後宮嬪御進見有度。左右小臣賜予有節，厚味臘毒無益奉養者，皆不宜數御。上皆納之。初至和三年，仁宗始不豫，國嗣未立，天下寒心，而不敢言。惟諫官范鎮首發其議。公時爲并州通判，聞而繼之。上疏言：禮大宗無子，則小宗爲之後。爲之後者爲之子也。願陛下擇宗室賢者，使攝儲貳，以待皇嗣之生，退居藩服。不然，則典宿衛尹京邑，亦足以係天下之望。疏三上，其一留中，其二付中書。公又與鎮書此大事，不言則已，言一出，豈可復反？願公以死爭之。於是鎮言之益力，及公爲諫官，復上疏，且面言：臣昔爲并州通判，所上三章，願陛下果斷而力行之。時仁宗簡默不言，雖執政奏事，首肯而已。聞公言，沉思久之，曰：得非欲選宗室爲繼嗣者乎？此忠臣之言，但人不敢及耳。公曰：臣言此，自謂必死。不意陛下開納，上曰：此何害？古今皆有之。因令公以所言付中書。公曰：不可。願陛下自以意喻宰相。是日，公復言江淮鹽事，詣中書白之。宰相韓琦問公今日復何所言。公默計此大事，不可不使琦知。所以廣主意者，卽日所言宗廟社稷大計也。琦喻意不復言。後十餘日，有旨令公與御史裏行陳洙同詳定行戶利害。洙與公屏語曰：日者大饗明堂，韓公攝太尉，洙爲監祭。公從容謂洙曰：君與司馬君實善，君實近建言立嗣事，恨不以所言送中書，欲發此議，無自發之行戶利害，非所以煩公也。欲洙見公達此意爾。時嘉祐六年閏八月也。至九月，公復上疏面言臣向者進說，陛下欣然無難意，謂卽行矣。今寂無所聞，此必有小人言陛下春秋鼎盛，子孫當千億，何遽爲此不祥之事？小人無遠慮，特欲倉猝之際，援立其所厚善者爾。唐自文宗以後，立嗣皆出於左右之意。至有稱定策國老，門生天子者，此禍豈可勝言哉？上大感悟，曰：送中書。公至中書，見琦等曰：諸公不及今定議，異日夜半禁中出寸紙，以某人爲嗣，天下莫敢違。琦等皆唯。

唯曰敢不盡力。後月餘詔英宗判宗正寺。固辭不就職。明年遂立爲皇太子。稱疾不入。公復上疏言。凡人爭絲毫之利。至相爭奪。今皇子辭不貲之富。至三百餘日不受命。其賢於人遠矣。有識聞之。足以知陛下之聖能爲天下得人。然臣聞父召無諾。君命召不俟駕。而行使者受命不受辭。皇子不當辭避。使者不當徒反。凡召皇子內臣皆乞責降。且以臣子大義責皇子。宜必入。英宗遂受命。堯國公主下嫁李璋。以驕恣聞。公上疏言。太宗時姚坦爲堯王翊善。有過必諫。左右教王詐疾踰月。太宗召王乳母入。問起居狀。乳母曰。王無疾。以姚坦故。鬱鬱成疾爾。太宗怒曰。王年少不知爲此。汝輩教之。杖乳母數十。召坦慰勉之。齊國獻穆大長公主太宗之子真宗之妹。陛下之姑。而謙恭率禮。天下稱其賢。願陛下教子以太宗爲法。公主事夫以獻穆爲法。已而公主不安於李氏。詔璋出知衛州。公主入居禁中。而璋母楊歸其兄璋。散遣其家人。公言陛下追念章懿太后。故使璋尙主。今乃母子離析。家事流落。陛下獨無雨露之感。悽惻之心乎。璋旣責降。公主亦不得無罪。上感悟。詔公主降封沂國。待李氏恩禮不衰。判檢院權判國子監。除知制誥。力辭至八九。改授天章閣待制兼侍講。賜三品服。仍知諫院。上疏言。經略安撫使以便宜從事。出於兵興權制。非永世法。及將相大臣典州者。多以貴倨自恃。凌忽轉運使。使不得舉職。朝廷務省事。專行姑息之政。至於胥吏謹譁而逐御史中丞。輦官悖慢而退宰相衛士凶逆而獄不窮姦澤加於舊軍人。置三司使而法官以爲非犯階級。於用法有疑。其餘一夫流言於道路。而爲之變法推恩者多矣。皆陵遲之漸不可以不正。充媛董氏薨。追贈婉儀。又贈淑妃。輶朝成服。百官奉慰定謚。行冊禮。葬給鹵簿。公言董氏秩本微病革之日。方拜充媛。古者婦人無謚。近制惟皇后有之。鹵簿本以賞軍功。未嘗施於婦人。惟唐平陽公主有

舉兵佐高祖定天下之功，乃得給。至韋庶人始令妃主葬日，皆給鼓吹，非令典不足法。時有司新定後宮封贈法，皇后與妃皆贈三代。公言別嫌明微，妃不當與后同。袁盎引郤愬夫人坐正爲此爾。天聖親郊，太妃止贈二代，而況妃乎？知嘉祐八年貢舉，仁宗崩，英宗以哀毀致疾，慈聖光獻太后同聽政。公首上疏言，章獻明肅太后保佑先帝，進賢退姦，有大功於趙氏。特以親用外戚小人，故負謗天下。今太后初攝大政，大臣忠厚如王曾、清純如張知白，剛正如魯宗道，質直如薛奎者，當信用之。鄙猥如馬季良，讒諂如羅崇勳者，當疎遠之。則天下服。又上疏英宗言：漢宣帝爲昭帝後，終不追尊衛太子史皇孫光武起布衣得天下，自以爲元帝後，亦不追尊鉅鹿都尉南頓君。惟哀安柏靈皆自旁親入繼大統，追尊其父祖。天下非之。願以爲戒。時公所得仁宗遺賜珠金直百餘萬，率同列三上章言：國有大憂，中外窘乏，不可專用乾興故事。若遺賜不可辭，則宜許侍從以上進金錢佐山陵費。不許，公乃以所得珠爲諫院公使金錢以遺其舅氏。義不藏於家。英宗疾既平，皇太后還政。公上疏言：治身莫先於孝，治國莫先於公。其言切至，皆母子間人所難言者。時有司立法，皇太后有所取用，有司奏覆得御寶乃供。公極論以爲不可，當直下合同司移所屬立供。如上所取已，乃具數奏太后，以防矯僞。曹佾除使相，兩府皆遷。公言佾無功而得使相，陛下以慰母心爾。今兩府皆遷無名，若以還政爲功，則宿衛將帥、內侍小臣必有覬望已，而都知任守忠等皆遷。公復爭之，因論守忠大姦，陛下爲皇子，非守忠意沮壞大策，離間百端，賴先帝不聽。及陛下嗣位，反覆革面，交構兩宮，國之大賊。人之巨蠹，乞斬於都市，以謝天下。詔以守忠爲節度副使，蘄州安置。天下快之。時有詔陝西刺民兵號義勇。公上疏極論其害云：康定慶曆閒，籍陝西民爲鄉弓手，已而刺爲保捷指揮民

被其毒兵終不可用遇敵先北正兵隨之每致崩潰縣官知其坐食無用汰遣歸農而惰遊之人不能復反南畝強者爲盜弱者轉死父老至今流涕也今義勇何以異此章六上不從乞罷諫官不許王廣淵除直集賢殿公言廣淵姦邪不可近昔漢景帝爲太子召上左右飲衛館獨稱疾不行卽帝位待館有加周世宗鎮澶淵張美爲三司吏掌州之錢穀世宗私有求假美悉力應之及卽位薄其爲人不用今廣淵當仁宗之世私自結於陛下豈忠臣哉願黜之以厲天下執政建言濮安懿王德盛位隆宜有尊禮詔太常禮院與兩制議翰林學士王珪等相顧不敢先公獨奮筆立議曰爲之後者爲之子不敢復顧其私親今日所以崇奉濮安懿王典禮宜一準先朝封贈期親尊屬故事高官大爵極其尊榮議成珪卽敕吏以公手藁爲案至今存焉時中外謗謔御史呂誨傅堯俞范純仁呂大防趙鼎趙瞻等皆爭之相繼降黜公上疏乞留之不可則乞與之皆貶初西戎遣使致祭而延州指使高宜押伴傲其使者侮其國主使者訴於朝廷公與呂誨乞加宣罪不從明年西戎犯邊殺略吏士趙滋爲雄州專以猛悍治邊公亦論其不可至是契丹之民有捕魚界河伐柳白溝之南者朝廷以知雄州李中祐爲不材選將代之公言國家當戎狄附順時好與之計較末節及其桀傲又從而姑息之近者西戎之禍生於高宜北狄之隙起於趙滋朝廷方賢此二人故邊臣皆以生事爲能今若選將代中祐則來者必以滋爲法而以中祐爲戒漸不可長宜敕邊吏疆場細故徐以文檄往反若輕以矢刃相加者坐之京師大水公上疏論三事皆盡言無所隱諱除龍圖閣直學士判流內銓改右諫議大夫知治平四年貢舉神宗卽位首擢公爲翰林學士公力辭不許上面諭公古之君子或學而不文或文而不學惟董仲舒楊雄兼之卿有文學何辭焉公曰臣不能爲

四六上曰如兩漢制詔可也公曰本朝故事不可上曰卿能舉進士取高等而云不能四六何也公趨上遣內臣至閣門彊公受告拜而不受趣公入謝曰上坐以待公公入至廷中以告置公懷中不得已乃受遂爲御史中丞初中丞王陶論宰相不押常朝班爲不臣宰相不從陶爭之力遂罷公旣繼之言宰相不押班細故也陶言之過然愛禮存羊則不可已自頃宰相權重今陶復以言宰相罷則中丞不可復爲臣願俟宰相押班然後就職上曰可陶旣出知陳州謝章詆宰相不已執政議再貶陶公言陶誠可罪然陛下欲廣言語屈己受陶而宰相獨不能容乎乃已公上疏論修心之要三曰仁曰明曰武治國之要三曰官人曰信賞曰必罰其說甚備且曰臣昔爲諫官卽以此六言獻仁宗其後以獻英宗今以獻陛下平生力學所得盡在是矣公在英宗時與呂誨同論祖宗之制勾當御藥院常用供奉官以下至內殿崇班則出近歲居此位者皆暗理官資食其廩給非祖宗大意又故事年未五十不得爲內侍省押班今除張茂則止四十八不可至是又言之因論高居簡姦邪乞加遠竄章五上上爲盡罷寄資內臣居簡亦補外未幾復留陳承禮劉有方二人公復爭之又言近者王中正往陝西知涇州劉渙等諸事中正而鄜延鈐轄吳舜臣違失其意已而渙等進擢舜臣降黜權歸中正謗歸陛下是去一居簡得一居簡上手詔問公所從知公曰臣得之賓客非一人言事之有無惟陛下知之若無臣不敢避妄言之罪萬一有之不可不察詔用宮邸直省官郭昭選等四人爲閣門祇候公言國初草創天步尙艱故卽位之始必以左右舊人爲腹心耳目謂之隨龍非平日法也閣門祇候在文臣爲館職豈可使廝役爲之英宗山陵公爲儀仗使賜金五十兩銀合三百兩三上章辭從之邊吏上言西戎步將嵬名山欲以橫山之衆取諒祚以降詔邊

臣招納其衆。公上疏極論以爲名山之衆未必能制諒祚。幸而勝之。滅一諒祚。生一諒祚。何利之有。若其不勝。必引衆歸我。不知何以待之。臣恐朝廷不獨失信於諒祚。又將失信於名山矣。若名山餘衆尚多。還北不可入。南不受。窮無所歸。必將突據邊城。以救其命。陛下獨不見侯景之事乎。上不聽。遣將種誇發兵迎之。取綏州費六十萬萬。西方用兵。蓋自是始矣。兼翰林侍讀學士。登州有不成婚婦謀殺其夫。傷而不死者。吏疑問卽承。知州事許遵讞之。有司當婦絞。而詔貸之。遵上議。準律因犯殺傷而自首者得免。所因之罪。婦當減二等。不當絞。詔公與王安石議之。安石是遵。公言謀殺猶故殺也。皆一事不可分。若謀爲所因。與殺爲二。則故與殺亦可爲二邪。自宰相文彥博以下。皆附公議。然卒用安石言。至今天下非之。權知審官院百官上尊號。公當答詔。上疏言先帝親郊。不受尊號。天下莫不稱頌。末年有建言者。國家與契丹有往來書信。彼有尊號。而我獨無。以爲深恥。於是羣臣復以非時上尊號。昔漢文帝時。單于自稱天地所生日月。所置匈奴大單于。不聞文帝復爲大名。以加之也。願陛下追用先帝本意。不受此名。上大悅。手詔答公。非卿朕不聞此言。善爲答詞。使中外曉然。知朕至誠。非欺衆邀名者。遂終身不復受尊號。執政以河朔災傷。國用不足。乞今歲親郊。兩府不賜金帛。送學士院取旨。公言兩府所賜以匹兩計。止二萬。未足以救災。宜自文臣兩省武臣宗室刺史以上。皆減半。公與學士王珪王安石同對。公言救災節用。宜自貴近始。可聽兩府辭賜。安石曰。常袞辭賜饌。時議以爲袞自知不能。當辭位。不當辭祿。且國用不足。非當今之急務也。公曰。袞辭祿。猶賢於持祿固位者。國用不足。真急務。安石言非是。安石曰。不足者以未得善理財者故也。公曰。善理財者。不過頭會箕歛。以盡民財。民窮爲盜。非國之福。安石曰。不然。善理財者。不加賦而

上用足。公曰：天下安有此理。天地所生財貨百物止有此數。不在民則在官。譬如雨澤夏澇則秋旱不加賦而上用足。不過設法陰奪民利其害甚於加賦。此乃桑洪羊欺漢武帝之言。太史公書之以見武帝不明爾。至其末年盜賊蠭起幾至於亂。若武帝不悔禍昭帝不變法則漢幾亡爭議不已。王珪進曰：救災節用宜自貴近始。司馬光言是也。然所費無幾恐傷國體。王安石言亦是。惟明主裁擇。上曰朕意與光同然姑以不允答之。會安石當制遂引常袞事責兩府。兩府亦不復辭兼史館修撰。上問公可爲諫官者。公薦呂誨。誨以天章閣待制知諫院。詔公與張茂則同相視二股河及土堤利害。公用都水監丞宋昌言策。乞於二股之西置土堤。約水東流。若東流日深。北流自淺。薪芻漸備。乃塞其北。放出御河。胡蘆河下流以紓恩冀。深瀛以西之患。時議者多不同。公於上前反覆諭難甚苦。卒從之後皆如公言。賜詔獎諭。王安石始爲政。創立制置三司條例。司建爲青苗。助役水利均輸之政。置提舉官四十餘員。行其法於天下。謂之新法。公上疏逆陳其利害。曰：後當如是行之十餘年。無一不如公言者。天下傳誦以爲公真宰相。雖田夫野老。皆號公司馬相公。而婦人孺子知其爲君實也。邇英進讀至蕭何曹參事。公曰：參不變何法得守成之道。故孝惠高后時天下晏然衣食滋殖。上曰：漢常守蕭何之法不變可乎。公曰：何獨漢也。使三代之君常守禹湯文武之法。雖至今存可也。武王克商曰：乃反商政。政由舊然則雖周亦用商政也。書曰：無作聰明亂舊章。漢武帝用張湯言。取高帝法紛更之。盜賊半天下。元帝改宣帝之政。而漢始衰。由此言之。祖宗之法不可變也。後數日呂惠卿進講。因言先王之法有一年變者正月始和布法象魏是也有五年一變者。巡狩考制度是也有三十年一變者。刑罰世輕世重是也有百年不變者。父慈子孝兄友弟恭是也。前日

光言非是其意以諷朝廷且譏臣爲條例司官爾上問公惠卿言何如公曰布法象魏布舊法也何名爲變若四孟月朔屬民讀法爲時變月變耶諸侯有變禮易樂者王巡守則誅之王不自變也刑新國用輕典亂國用重典平國用中典是爲世輕世重非變也且治天下譬如居室弊則修之非大壞不更造也大壞而更造非得良匠美材不成今二者皆無有臣恐風雨之不庇也公卿侍從皆在此願陛下問之三司使掌天下財不才而黜可也不可使兩府侵其事今爲制置三司條例司何也宰相以道佐人主安用例苟用例而已則胥吏足矣今爲看詳中書條例司何也惠卿不能對則詆公曰光爲侍從何不言言而不從何不去公作而答曰是臣之罪也上曰相與論是非爾何至是講畢賜坐戶外將出上命徒坐戶內左右皆避去上曰朝廷每更一事舉朝諭諭何也王珪曰臣疏賤在闕門之外朝廷之事不能盡知借使聞之道路又不知其虛實也上曰聞則言之公曰青苗出息平民爲之尙能以蠶食下戶至飢寒流離況縣官法度之威乎惠卿曰青苗法願取則與之不願不彊也公曰愚民知取債之利不知還債之害非獨縣官不彊富民亦不彊也臣聞作法於涼其弊猶貪作法於貪弊將若之何昔太宗平河東立和糴法時米斗十餘錢草束八錢民樂與官爲市其後物貴而和糴不解遂爲河東世患臣恐異日之青苗猶河東之和糴也上曰陝西行之久矣民不以爲病公曰臣陝西人也見其病不見其利朝廷初不許也而有司尙能以病民況立法許之乎上曰坐倉糴米何如坐者皆起曰不便上已罷之幸甚上曰未罷也公曰京師有七年之儲而錢常乏若坐倉錢益乏米益陳奈何惠卿曰坐倉得米百萬斛則省東南百萬之漕以其錢供京師何患無錢公曰東南錢荒而米狼戾今不糴米而漕錢棄其有餘取其所無農末皆病矣侍

講吳申起曰。光言至論也。公曰。此皆細事。不足煩人主。但當擇人而任之。有功則賞。有罪則罰。此則陛下職也。上曰。然。文王因攸兼于庶言、庶獄、庶慎。惟有司之牧夫。公趨出。上曰。卿得無以惠卿之言不樂乎。公曰。不敢。韓琦上疏論青苗之害。上感悟。欲罷其法。安石稱疾求去。會拜公樞密副使。公上章力辭。至六七曰。上誠能罷制置條例司。追還提舉官。不行青苗助役等法。雖不用臣。臣受賜多矣。不然。終不敢受命。上遣人謂公樞密兵事也。官各有職。不當以他事爲辭。公言。臣未受命。則猶侍從也。於事無不可言者。安石起視事。青苗法卒不罷。公亦卒不受命。則以書喻安石。三往返。開喻苦至。猶幸安石之聽而改也。且曰。巧言令色鮮矣。仁彼忠信之士。於今當路時。雖齟齬可憎。後必徐得其力。諂諛之人。於今誠有順適之快。一旦失勢。必有賣公自售者。意謂呂惠卿。對賓客輒指言之曰。覆王氏者必惠卿也。小人本以利合。勢傾利移。何所不至。其後六年。而惠卿叛安石。上書告其罪。苟可以覆王氏者。靡不爲也。由是天下服公先知。公求補外。上猶欲用公。公不可以端明殿學士出知永興軍。朝辭進對。猶乞免本路青苗助役。宣撫使下令。分義勇四番。欲以更戍邊。選諸軍驍勇。募閭里惡少爲奇兵。調民爲乾糧。皺飯。雖內郡不被邊。皆修城池樓櫓。如邊郡。且遣兵就糧。長安河中邠三輔。騷然。公上疏極言方凶歲。公私困弊。不可舉事。而永興一路。城池樓櫓皆不急。乾糧皺飯。昔常造。後無用。腐棄之。宣撫司令。臣皆未敢從。若乏軍興。臣坐之。於是一路獨得免。頃之詔移知許州。不赴。遂乞判西京留司御史臺以歸。自是絕口不論事。以祀明堂恩。加上柱國。至熙寧七年。上以天下旱蝗。詔求直言。公讀詔泣下。欲默不忍。乃復陳六事。一青苗。二免役。三市易。四邊事。五保甲。六水利。此尤病民也。宜先罷。又以書責宰相吳充。天子仁聖如此。而公不言何也。元豐五年。公

忽得語澀疾。自疑當中風。乃豫作遺表。大略如六事。加詳盡。感槩。親書緘封。置臥內。且死。當以授所善范純仁。范祖禹。使上之。凡居洛十五年。再任留司御史臺。四任提舉崇福宮官制行。改太中大夫。加資政殿學士。神宗崩。公赴闕臨衛。士見公入。皆以手加額曰。此司馬相公也。民遮道呼曰。公無歸洛。留相天子。活百姓。所在數千人聚觀之。公懼。會放辭謝。遂徑歸洛。太皇太后聞之。詰問主者。遣使勞公。問所當先者。公言近歲士大夫以言爲諱。閭閻愁苦於下。而上不知。明主憂勤於上。而下無所訴。此罪在羣臣。而愚民無知。歸怨先帝。宜下詔首開言路。從之下詔榜朝堂。而當時有不欲者。於詔語中。設六事以禁切言者。曰。無陰有所懷。犯非其分。或扇搖機事之重。或迎合已行之令。上以觀望朝廷之意。以僥倖希進。下以眩惑流俗之情。以干取虛譽。若此者必罰無赦。太皇太后封詔草以問公。公曰。此非求諫。乃拒諫也。人臣惟不言。言則入六事矣。時太府少卿宋彭年。水部員外郎王諤。皆應詔言事。有欲借此二人以憲天下言者。皆以非職而言。贖銅三十斤。公具論其情。且請改賜詔書行之天下。從之。於是四方吏民言新法不便者。數千人。公方草具所當行者。而太皇太后已有旨。散遣修京城役夫。罷減皇城內覲者。止御前工作。出近侍之人。公方草具所當行者。而太皇太后已有旨。散遣修京城役夫。罷減皇城內覲者。止御前工作。出近侍之人。公方草具所當行者。而太皇太后已有旨。散遣修京城役夫。罷減皇城內覲者。止御前工作。出近侍之人。公方草具所當行者。而太皇太后已有旨。散遣修京城役夫。罷減皇城內覲者。止御前工作。出近侍之人。無狀者三十餘人。戒敕中外。無敢苛刻暴斂。廢導洛司物貨場。及民所養戶馬。寬保馬限。皆從中出。大臣不與。公上疏謝。當今急務。陛下略已行之矣。小臣稽慢。罪當萬死。詔除公知陳州。且過闕入見。使者勞問。相望於道。至則拜門下侍郎。公力辭不許。數賜手詔。先帝新棄天下。天子沖幼。此何時而君辭位耶。公不敢復辭。以覃恩遷通議大夫。初。神宗皇帝以英偉絕人之資。勵精求治。凜凜乎漢宣帝唐太宗之上矣。而宰相王安石用心過當。急於功利。小人得乘間而入。呂惠卿之流。以此得志。後者慕之。爭先相高。而天下

病矣先帝明聖獨覺其非出安石金陵天下欣然意法必變雖安石亦自悔恨其去而復用也欲稍自改而惠卿之流恐法變身危持之不肯改然先帝終疑之遂退安石八年不復召而惠卿亦再逐不用元豐舉數事以塞人言公慨然爭之曰先帝之法其善者雖百世不可變也若安石惠卿等所建爲天下害非先帝本意者改之當如救焚拯溺猶恐不及昔漢文帝除肉刑斬右趾者棄市笞五百者多死景帝元年卽改之武帝作鹽鐵榷酤均輸等法昭帝罷之唐代宗縱宦官公求賂遺置客省拘滯四方之人德宗立未三月罷之德宗晚年爲宮市五坊小兒暴橫鹽鐵月進羨餘順宗卽位罷之當時悅服後世稱頌未有或非之者也況太皇太后以母改子非子改父衆議乃定公以爲治亂之機在於用人邪正一分則消長之勢自定每論事必以人物爲先凡所進退皆天下所謂當然者然後朝廷清明人主始得聞天下利害之實遂罷保甲團教依義勇法歲一閱保馬不復買見在者還監牧給諸軍廢市易法所儲物皆鬻之不取息而民所欠錢皆除其息京東鑄鐵錢河北江西福建湖南鹽及福建茶法皆復其舊獨川陝茶以邊用未卽罷遣使相視去其甚者戶部左右曹錢穀皆領之尙書凡昔之三司使事有散隸五曹及寺監者皆歸戶部使尙書周知其數量人以爲出於是天下釋然曰此先帝本意也非吾君之子不能行吾君之意時獨免役青苗將官之法猶在而西戎之議未決也山陵畢遷公正議大夫公自以不與顧命不敢當詔不許元祐元年正月公始得疾詔公與尙書左丞呂公著朝會與執政異班再拜而已不舞蹈公疾益甚歎曰四患未除吾死不瞑目矣乃力疾上疏論免役五害乞直降敕罷之率用熙寧以前法有未便州

縣監司節級以聞爲一路一州一縣法。詔卽日行之。又論西戎大略以和戎爲便。用兵爲非時異議者甚衆。公持之益堅。其後太師文彥博議與公合。衆不能奪。又論將官之害。詔諸將兵皆隸州縣。軍政委守令通決之。又乞廢提舉常平司。以其事歸之轉運使及提點刑獄。公謂監司多新進少年。務爲刻急。天下病之。乞自太中大夫待制以上。於郡守中。舉轉運使。提點刑獄。於通判中。舉轉運判官。又以文學德行吏事武略等爲十科。求天下遺才。命文臣陞朝以上歲舉。經明行修一人。以爲進士高選。皆從之。拜左僕射。疾稍閒。將起視事。詔免朝覲。許以肩輿。三日一入都堂。或門下尚書省。公不敢當。曰。不見君不可以視事。詔公肩輿至內東門。子康扶入對小殿。且曰。毋拜。公惶恐入對延和殿。再拜。遂罷青苗錢。專行常平糴糴法。以歲上中下熟爲三等。穀賤及下等。則增價糴。貴及上等。則減價糴。惟中則否。及下等而不糴。皆坐之。時二聖恭儉慈孝。視民如傷。虛己以聽。公知無不爲。以身任天下之責。數月復病。以九月丙辰朔薨于西府。享年六十八。太皇太后聞之慟。上亦感涕不已。時方躬祀明堂。禮成不賀。二聖皆臨其喪。哭之哀甚。輶視朝。贈太師溫國公。祔以一品禮服。賄銀三千兩。絹四千匹。賜龍腦水銀以斂。命戶部侍郎趙瞻入內。內侍省押班馮宗道護其喪歸葬夏縣。官其親族十人。公忠信孝友。恭儉正直。出於天性。自少及老。語未嘗妄。其好學如飢之嗜食。於財利紛華。如惡惡鼻。誠心自然。天下信之。退居於洛。往來陝郊。陝洛間皆化其德。師其學。法其儉。有不善曰。君實得無知之乎。博學無所不通。音樂律歷。天文書數。皆極其妙。晚節尤好禮。爲冠婚喪祭法。適古今之宜。不喜釋老。曰。其微言不能出吾書。其誕吾不信。不事生產。買第洛中。僅庇風雨。有田三頃。喪其夫人。質田以葬。惡衣菲食。以終其身。自以遭遇聖明。言聽計從。以身

徇天下躬親庶務不舍晝夜賓客見其體羸曰諸葛孔明二十罰以上皆親之以此致疾公不可以不戒。公曰死生命也爲之益力病革諱不復自覺如夢中語然皆朝廷天下事也既沒其家得遺奏八紙上之皆手札論當世要務京師民畫其像刻印鬻之家置一本飲食必祝焉四方皆遣人購之京師時畫工有致富者有文集八十卷資治通鑑二百九十四卷考異三十卷歷年圖七卷通歷八十卷稽古錄二十卷本朝百官公卿表六卷翰林詞草三卷註古文孝經一卷易說三卷註繫辭二卷註老子道德論二卷集註太元經八卷大學中庸義一卷集註揚子十三卷文中子傳一卷河外諸目三卷書儀八卷家範四卷續詩話一卷遊山行記十二卷醫問七篇其文如金玉穀帛藥石也必有適於用無益之文未嘗一語及之初公患歷代史繁重學者不能綜況於人主遂約戰國至秦二世如左氏體爲通志八卷以進英宗悅之命公續其書置局祕閣以其素所賢者劉攽、劉恕、范祖禹爲屬官凡十九年而成起周威烈王訖五代上下一千三百六十二載其是非疑似之間皆有辨論一事而數說者必考合異同而歸之一作考異以志之神宗尤重其書以爲賢於荀悅親爲製敍賜名資治通鑑詔遍英讀其書賜額邸舊書二千四百二卷書成拜資政殿學士賜金帛甚厚娶張氏禮部尚書存之女封清河郡夫人先公卒追封溫國夫人子三人童唐皆早亡康今爲祕書省校書郎孫二人植柏皆承奉郎公歷事四朝皆爲人主所敬然神宗知公最深公思有以報之常誦孟子之言曰責難於君謂之恭陳善閉邪謂之敬謂吾君不能謂之賊故雖議論違忤而神宗識其意待之愈厚及拜資政殿學士蓋有意復用公也夫復用公者豈徒然哉將必行其所言公亦識其意故爲政之日自信而不疑嗚呼若先帝可謂知人矣其知之也深公可謂不負所

知矣。其報之也大。軾從公遊二十年。知公平生爲詳。故錄其大者爲行狀。其餘非天下所以治亂安危者。皆不載。

宋文鑑卷第一百三十八

行狀

程伯淳行狀

田明之行狀

程伯淳行狀

劉跋 程頤

曾祖希振皇任尙書虞部員外郎妣高密縣君崔氏祖遜皇贈開府儀同三司吏部尙書妣孝感縣太君張氏長安縣太君張氏父珦見任太中大夫致仕母壽安縣君侯氏先生名顥字伯淳姓程氏其先曰喬伯爲周大司馬封於程後遂以爲氏先生五世而上居中山之博野高祖贈太子少師諱羽太宗朝以輔翊功顯賜第於京師居再世曾祖而下葬河南今爲河南人先生生而神氣秀爽異於常兒未能言叔祖母任氏太君抱之行不覺欽墜後數日方求之先生以手指示隨其所指而往果得欽人皆驚異數歲誦詩書彊記過人十歲能爲詩賦十二三時羣居庠序中如老成人見者無不愛重故戶部侍郎彭公思永謝客至學舍一見異之許妻以女踰冠中進士第調京兆府鄠縣主簿令以其年少未知之民有借其兄宅以居者發地中藏錢兄之子訴曰父所藏也令曰此無證佐何以決之先生曰此易辨爾問兄之子曰爾父藏錢幾何時矣曰四十年矣彼借宅居幾何時矣曰二十年矣卽遣吏取錢十千視之謂借宅者曰今官所鑄錢不五年卽遍天下此錢皆爾未藏前數十年所鑄何也其人遂服令大奇之南山僧舍有

石佛歲傳其首放光遠近男女聚觀晝夜雜處爲政者畏其神莫敢禁止先生始至詰其僧曰吾聞石佛歲現光有諸曰然戒曰俟復現必先白吾職事不能往當取其首就觀之自是不復有光矣府境水害倉卒興役諸邑率皆狼狽惟先生所部飲食茭舍無不安便時盛暑泄利大行死亡甚衆獨鄴人無死者先生治役人不勞而事集常謂人曰吾之董役乃治軍法也當路者欲薦之多問所欲先生曰薦士當以才之所堪不當問所欲再募以避親罷再調江寧府上元縣主簿田稅不均比他邑尤甚蓋近府美田爲貴家富室以厚價薄其稅而買之小民苟一時之利久則不勝其弊先生爲令畫法民不知擾而一邑大均其始富者不便多爲浮論欲搖止其事旣而無一人敢不服者後諸路行均稅法邑官不足益以他官經歲歷時文案山積而尙有訴不均者計其力比上元不啻千百矣會令罷去先生攝邑事上元劇邑訴訟日不下二百爲政者疲於省覽奚暇及治道先生處之有方不閱月民訟遂簡江南稻田賴陂塘以溉盛夏塘堤大決計非萬_千^{一作千}夫不可塞法當言之府府稟於漕司然後計功調役非月餘不能興作先生曰比如是苗槁矣民將何食救民獲罪所不辭也遂發民塞之歲則大熟江寧當水運之衝舟卒病者則留之爲營以處曰小營子歲不下數百人至者輒死先生察其由蓋旣留然後請於府給券乃得食比有司文具則困於飢已數日矣先生白漕司給米貯營中至者與之食自是生全者太半措置於纖微之間而人已受賜如此之比所至多矣先生常云一命之士苟存心於愛物於人必有所濟仁宗登遐遺制官吏成服三日而除三日之朝府尹率羣官將釋服先生進曰三日除服遺詔所命莫敢違也請盡今日若朝而除之所服止二日爾尹怒不從先生曰公自除之某非至夜不敢釋也一府相視無敢除者茅山有龍

池其龍如蟬蛻而五色祥符中中使取二龍至中途使奏一龍飛空而去自昔嚴奉以爲神物先生嘗捕而脯之使人不惑其始至邑見人持竿道旁以黏飛鳥取其竿折之教之使勿爲及罷官艤舟郊外有數人共語自主簿折黏竿鄉民子弟不敢畜禽鳥不嚴而令行大率如此再暮就移澤州晉城令澤人淳厚尤服先生教命民以事至邑者必告之以孝悌忠信入所以事父兄出所以事長上度鄉村遠近爲保伍使之力役相助患難相恤而姦僞無所容凡孤贍殘廢者責之親戚鄉黨使無失所行旅出於其塗者疾病皆有所養諸鄉皆有校暇則親至召父老而與之語兒童所讀書親爲正句讀教者不善則爲易置俗始甚野不知爲學先生擇子弟之秀者聚而教之去邑纔十餘年而服儒服者蓋數百人矣鄉民爲社會爲立科條旌別善惡使其勸有恥邑幾萬室三年之間無彊盜及鬪死者秩滿代者且至吏夜叩門稱有殺人者先生曰吾邑安有此誠有之必某村某人也問之果然家人驚異問何以知之曰吾常疑此人惡少之弗革者也河東財賦窘迫官所科買歲爲民患雖至賤之物至官取之則其價翔踴多者至數十倍先生常度所需使富家預儲定其價而出之富室不失倍息而鄉民所費此常歲十不過二三民稅常移近邊載往則道遠就糴則價高先生擇富民之可任者預使購粟邊郡所費大省民力用舒縣庫有雜納錢數百千常借以補助民力部使者至則告之曰此錢令自用而不敢私請一切不問使者屢更無不從者先時民憚差役役及則互相糾訴鄉鄰爲仇先生盡知民產厚薄第其先後按籍而命之無有辭者以爲安先生教諭禁止民始信之而先生去後郡官有母死者憚於遠致投諸烈火愚俗視傍先生之教河東義勇農隙則教以武事然應文備數而已先生至晉城之民遂爲精兵晉俗尙焚屍雖孝子慈孫習

遂廢識者恨之。先生爲令視民如子。欲辦事者或不持牒徑至庭下。陳其所以先生從容告語。諄諄不倦。在邑三年百姓愛之如父母去之日哭聲震野。用薦者改著作佐郎。尋以御史中丞呂公著薦授太子中允。權監察御史裏行。神宗素知先生名。召對之日。從容咨訪比二三見。遂期以大用。每將退。必曰頻求對來。欲常相見爾。一日論議甚久。日官報午正。先生遽求退庭中。中人相謂曰。御史不知上未食耶。前後進說甚多。大要以正心窒欲。求賢育材爲先。先生不飾辭辯。獨以誠意感動人主。神宗嘗使推擇人材。先生所薦者數十人。而以父表弟張載。暨弟頤爲首。所上章疏。子姪不得窺其藁。嘗言人主當防未萌之欲。神宗俯身拱手曰。當爲卿戒之。及因論人才。曰。陛下柰何輕天下士。神宗曰。朕何敢如是。言之至于再三。時王荊公安石日益信用。先生每進見必爲神宗陳君道以至誠仁愛爲本。未嘗及功利。神宗始疑其過。而禮貌不衰。嘗極陳治道。神宗曰。此堯舜之事。朕何敢當。先生愀然曰。陛下此言非天下之福也。荊公寢。行其說。先生意多不合。事出必論列。數月之間。章數十上。尤極論者。輔臣不同心。小臣與大計。公論不行。青苗取息。賣祠部牒。差提舉官。多非其人。及不經封駁。京東轉運司剥民希寵。不加黜責。興利之臣日進。尙德之風寢衰。等十餘事。荊公與先生雖道不同。而嘗謂先生忠信。先生每與論事。心平氣和。荊公多爲之動。而言路好直者。必欲力攻取勝。由是與言者爲敵矣。先生言旣不行。懇求外補。神宗猶重其去。上章及面請至十數不許。遂閹門待罪。神宗將黜諸言者。命執政除先生監司。差權發遣京西路提點刑獄。復上章曰。臣言是願行之。如其妄言。當賜顯責。請罪而獲遷刑賞混矣。累請得罷。旣而神宗手批。暴白同列之罪。獨於先生無責。改差簽書鎮寧軍節度判官事。爲守者嚴刻多忌。通判而下。莫敢與辦事。始意先生。

嘗任臺憲必不盡力職事而又慮其慢已既而先生事之甚恭雖筦庫細務無不盡心事小未安必與之辨遂無不從者相與甚歡屢平反重獄得不死者蓋前後以十數河清卒於法不他役時中人程昉爲外都水丞怙勢蔑視州郡欲盡取諸埽兵治二股河先生以法拒之昉請於朝命以八百人與之天下大寒昉肆其虐用衆逃而歸州官晨集城門吏報河清兵潰歸將入城衆官相視畏昉欲弗納先生曰此逃死自歸弗納必爲亂昉有言某自當之卽親往開門撫諭約歸休三日復役衆歡呼而入具以事上聞得不復遣後防奏事過州見先生言甘而氣懾旣而揚言於衆曰澶卒之潰乃程中允誘之吾必訴於上同列以告先生笑曰彼方憚我何能爾也果不敢言會曹村埽決時先生方護小吳相去百里州帥劉公渙以事急告先生一夜馳至帥俟於河橋先生謂帥曰曹村決京師可虞臣子之分身可塞亦爲之請盡以廂卒見付事或不集公當親率禁兵以繼之帥義烈士遂以本鎮印授先生曰君自用之先生得印不暇入城省親徑走決堤諭士卒曰朝廷養爾輩正爲緩急爾知曹村決則注京城乎吾與爾曹以身捍之衆皆感激自效論者皆以爲勢不可塞徒勞人爾先生命善泅者銜細繩以渡決口水方奔注達者百一卒能引大索以濟衆兩岸並進晝夜不息數日而合其將合也其大木自中流而下先生顧謂衆曰得彼巨木橫流入口則吾事濟矣語纔已木遂橫衆以爲至誠所致其後曹村之下復決遂久不塞數路困擾大爲朝廷憂人以爲使先生在職安有是也郊祀需恩先生曰吾罪滌矣可以去矣遂求監局以便親養得罷歸自是醜正者競揚避新法之說歲餘得監西京洛河竹木務薦者言其未嘗敍年勞丐遷秩改太常丞神宗猶念先生會修三經義嘗語執政曰程某可用執政不對又嘗有登對者自洛至問曰程某在彼

否連言佳士。其後彗見翼軫間。詔求直言。先生應詔論朝政極切。還朝。執政屢進擬。神宗皆不許。既而手批與府界知縣差知扶溝縣事。先生詣執政。復求監當執政諭以上意不可改也。數月右府同薦除判武學。新進者言其新法之初首爲異論罷復舊任。先生爲治專尚寬厚。以教化爲先。雖若甚迂。而民實風動。扶溝素多盜。雖樂歲彊盜不減十餘發。先生在官無彊盜者幾一年。廣濟蔡河出縣境。瀕河不逞之民。不復治生業。專以脇取舟人物爲事。歲必焚舟十數以立威。先生始至捕得一人。使引其類。得數十人。不復根治舊惡。分地而處之。使以挽舟爲業。且察爲惡者。自是邑境無焚舟之患。畿邑田稅重。朝廷歲常蠲除。以爲惠澤。然而良善之民。憚督責而先輸逋負獲除者。皆頑民也。先生爲約前料獲免者。今必如期而足。於是惠澤始均。司農建言天下輸役錢。達戶四等。而畿內獨止第三。請亦及第四。先生力陳不可。司農奏其議。謂必獲罪。而神宗是之。畿邑皆得免。先生爲政。常權穀價。不使至甚貴甚賤。會大旱。麥苗且枯。先生教人掘井以溉。一井不過數工。而所灌數畝。闔境賴焉。水災民饑。先生請發粟貸之。鄰邑亦請。司農怒。遣使閱實。使至鄰邑。而令遽自陳。穀且登。無貸可也。使至。謂先生盍亦自陳。先生不肯。使者遂言不當貸。先生言。濟飢當以口之衆寡。不當以戶之高下。且令實爲之。非吏罪。乃得已。內侍都知王中正。巡閱保甲。權寵至盛。所至凌慢縣官諸邑。供帳競務華鮮。以悅奉之。主吏以請。先生曰。吾邑貧安能效它邑。且取於民。法所禁也。令有故。青帳可用之。先生在邑歲餘中。正往來境上。卒不入鄰邑。有冤訴府。願得先生決之者。前後五六有犯小盜者。先生謂曰。汝能改行。吾薄汝罪。盜叩首願自新。後數月。復穿窬捕吏及門。盜告

其妻曰我與太丞約不復爲盜今何面目見之耶遂自經官制除奉議郎朝廷遣官括牧地民田當沒者千頃往往持累世契券以自明皆弗用諸邑已定而扶溝民獨不服遂有朝旨改稅作租不復加益及聽賣易如私田民旣倦於追呼又得不加賦乃皆服先生以爲不可括地官至謂先生曰民願服而君不許何也先生曰民徒知今日不加賦而不知他日增租奪田則失業無以生矣因爲言仁厚之道其人感動謝曰寧受責不敢違公遂去之他邑不踰月先生罷去其人復至謂攝令曰程奉議去矣爾復何恃而敢稽違朝旨督責甚急數日而事集鄰邑民犯盜繫縣獄而逸旣又遇赦先生坐是以特旨罷邑人知先生且罷詣府及司農丐留者千數去之日不使人知老穉數百追及境上攀挽號泣遣之不去以親老求近鄉監局得監汝州酒稅今上嗣位覃恩改承議郎先生雖小官賢士大夫視其進退以下興喪聖政方新賢德登進先生特爲時望所屬召爲宗正寺丞未行以疾終元豐八年六月十五日也享年五十有四士大夫識與不識莫不哀傷爲朝廷生民恨惜先生資稟旣異而充養有道純粹如精金溫潤如良玉寬而有制和而不流忠誠貫於金石孝悌通於神明視其色其接物也如春陽之溫聽其言其入人也如時雨之潤胸懷洞然徹視無間測其蘊則浩乎若滄溟之無際極其德美言蓋不足以形容先生行已內主於敬而行之以恕見善若出諸已不欲弗施於人居廣居而行大道言有物而動有常先生爲學自十五六時聞汝南周茂叔論道遂厭科舉之業慨然有求道之志未知其要泛濫於諸家出入於老釋者幾十年返求諸六經而後得之明於庶物察於人倫知盡性至命必本於孝悌窮神知化由通於禮樂辨異端似是之非開百代未明之惑秦漢而下未有臻斯理也謂孟子沒而聖學不傳以興起斯文爲己任其言

曰道之不明異端害之也昔之害近而易知今之害深而難辨昔之惑人也乘其迷暗今之入人也因其高明自謂之窮神知化而不足以開物成務言爲無不周遍實則外於倫理窮深極微而不可以入堯舜之道天下之學非淺陋固滯則必入於此自道之不明也邪誕妖異之說競起塗生民之耳目溺天下於汙濁雖高才明智膠於見聞醉生夢死不自覺也是皆正路之蓁蕪聖門之蔽塞闢之而後可以入道先生進將覺斯人退將明諸書不幸早世皆未及也其辨析精微稍見於世者之所傳爾先生之門學者多矣先生之言平易易知賢愚皆獲其益如羣飲於河各充其量先生教人自致至於知止誠意至於平天下洒掃應對至於窮理盡性循循有序病世之學者捨近而趨遠處下而闢高所以輕自大而卒無得也先生接物辨而不間感而能通教人而人易從怒人而人不怨賢愚善惡咸得其心狡僞者獻其誠暴慢者致其恭聞風者誠服覲德者心醉雖小人以趨嚮之異顧於利害時見排斥退而省其私未有不以先生爲君子也先生爲政治惡以寬處煩而裕當法令繁密之際未嘗從衆爲應文逃責之事人皆病於拘礙而先生處之綽然衆憂以爲甚難而先生爲之沛然雖當倉卒不動聲色方監司競爲嚴急之時其待先生率皆寬厚施設之際有所賴焉先生所爲綱條法度人可效而爲也至其道之而從動之而和不求物而物應未施信而民信則人不可及彭夫人封仁和縣君嚴正有禮奉舅以孝稱善睦其族先一年卒子曰端懿蔡州汝陽縣主簿曰端本治進士業女適假承務郎朱純之卜以今年十月乙酉葬于伊川先塋謹書家世行業及歷官行事之大概以求誌於作者

曾祖永孚故不仕。祖均故不仕。考亮故贈左中散大夫。母永嘉縣太君王氏本貫河南府姓田氏諱述古字明之。田氏本居密州安丘家世儒者。明之蚤孤游學京師。甫冠補太學生事安定胡先生爲弟子勤篤好問。先生稱之娶尹師魯族家子河南縣主簿仲甫之女遂徙家河南。凡四試以鄉薦不中第嘆曰得失命也。乃慨然發憤穩居講誦積二十餘年不復出。哲宗嗣位搜訪遺逸故孫溫靖公固居守西都以明之名聞。詔除襄州司法參軍。明之曰老矣不任爲吏然君命不敢辭乃卽其家廷拜受詔而不出仕。孫公守鄭又奏以爲州教授特詔從其請居頃之河陽學官以嫌求對易命旣下故王公巖叟時守鄭奏謂述古以處士起今新進後生援例徒非是且無以慰鄭學者詔又聽終任未幾除太學正改宣德郎充廣親北宅教授秩滿貧不能久留調簽書通利軍判官事轉通直郎。今上登極轉奉議郎元符三年十二月六日以疾終享年七十夫人後五月亦卒子男處仁處訥處厚處恭處約女嫁進士張安石太廟齋郎溫萬石明之爲人淳靜簡易不爲表襮胸中坦無留閑與人交傾蓋不疑旣久益親及其不合毅然去之莫能奪於書無不闕惟易中庸論語孟子老子迺其素所學申重復熟造其深旨餘不甚錯意也。邵先生二程先生皆居洛陽明之從之游司馬溫公居相鄰因徒步造門問經史大義語不及他事范翰林祖禹以編修資治通鑑日諳溫公溫公多召明之與之俱邵程司馬公皆重望來者率巨公顯人門無雜賓而明之獨以白士羈旅預其間合堂同席相視莫逆語必殫竭未嘗少貶諸公以是敬愛之晚歲篤好易古今諸儒訓詁得失歷歷別白常稱曰道言之必可行行之必可言今學者泥章句不知妙在日用因自爲註祁寒盛暑造次顛沛未嘗廢卷與賓客言不事劇談惟論易則亹亹不倦日暮客欲去而明之談益勝意益精

明其所著書未就客欲索其書上之朝明之遂不肯出友人張雲卿以累舉恩當釋褐貧欲毋行明之出錢爲助鄉人爭之乃得去既去其妻與子俱病妻竟死家無一錢明之日往護視又辦喪事事竟然後歸昌王薨假北宅教授官氏撰次行狀以故事遺白金百兩明之曰他人爲文而我受其賜無是也使者屢及門終不受通利並河一夕暴漲守將遽調急夫明之爭曰曷不視水勢今雖漲而平此將殺也吾民不可徒擾已而果無事當官不苟亦不爲已甚居家廉儉衣不兼食不屬裕如也樂道自信以是終身焉嗚呼可謂吉德君子也夫將以建中靖國元年某月葬于某所之原晉陵鄒浩以明之語謂劉某曰我無稱於時然賢公卿大夫多知我今皆亡晚乃得二人焉尙何恨獨謂吾子與浩耳今其葬也其能無言邪其許諾居亡何其孤自洛抵汝上持治命來赴果以文爲請某外祖母尹夫人魯郡著姓與河南之尹宗族也故於明之有葭莩之好官於鄭又嘗同僚蓋知之詳熟於其來請謹敍次爵里伐闕及其學行大略以告鄒子爲之銘庶幾乎明之意而二人者亦以是自致焉

宋文鑑卷第一百三十九

墓誌

吳王李煜墓誌銘

穆夫人墓誌銘

徐文質墓誌銘

种世衡墓誌銘

范純佑墓誌銘

吳王李煜墓誌銘

徐
柳
開
穆
脩
富
弼

范
仲
淹

徐
鉉

盛德百世。善繼者所以主其祀。聖人無外。善守者不能固其存。蓋運曆之所推。亦古今之一貫。其有享蕃錫之寵。保克終之美。殊恩飾壤。懿範流光。傳之金石。斯不誣矣。王諱煜。字重光。隴西人也。昔庭堅贊九德。伯陽恢至道。皇天眷祐。錫祚于唐祖文宗武世。有顯德載祀三百。龜玉淪胥宗子。維城蕃衍萬國。江淮之地。獨奉長安。故我顯祖用膺推戴。焜耀之烈。載光舊吳。二世承基。克廣其業。皇宋將啓玄貺。真符有周。開先太祖。歷試威德所及。寰宇將同。故我舊邦祇畏天命。貶大號以稟朔。獻地圖而請吏。故得義動元后。風行域中。恩禮有加。綏懷不世。魯用天王之禮。自越常鈞。鄙存紀侯之國。曾何足貴。王以世嫡嗣服。以古道馭民。欽若彝倫。率循先志。奉烝嘗。恭色養。必以孝。賓大臣事者老。必以禮。居處服御。必以節。言動施舍。必

以仁。至於荷全濟之恩。謹藩國之度。勤修九貢。府無虛月。祇奉百役。知無不爲。十五年間。天眷彌渥。然而
果於自信。怠於周防。西隣起釁。南箕構禍。投杼致慈親之惑。乞火無里婦之辭。始營因壘之師。終後塗山。
之會。太祖至仁之舉。大賚爲懷。錄勤王之前効。恢焚謗之廣度。位以上將爵爲通侯。待遇如初寵錫斯厚。
今上宣猷大麓。敷惠萬方。每侍論思。常存開釋。及飛天在運。麗澤推恩。擢進上公之封。仍加掌武之秩。侍
從親禮。勉諭優容。方將度越等彝。登崇名數。嗚呼。閬川無捨。景命不融。太平興國三年秋七月八日遘疾。
薨于京師里第。享年四十有二。皇上撫几興悼。投爪慄悲。痛生之不逮。俾歿而加飾。特詔輶朝三日。贈太
師。追封吳王。命中使涖葬。凡喪祭所須。皆從官給。即其年冬十月日葬于河南府某縣某鄉某里。禮也。夫
人鄭國夫人周氏。勳舊之族。是生邦媛。肅雍之美。流詠國風。才實女師。言成闡則。子左千牛衛大將軍某。
襟神俊茂。識度淹通。孝悌自表。於天資才略。靡由於師訓。日出之學。未易可量。惟王天骨秀穎。神氣清粹。
言動有則。容止可觀。精究六經。旁綜百氏。常以爲周孔之道不可暫離。經國化民。發號施令。造次於是。始
終不渝。酷好文辭。多所述作。一游一豫。必頌宣尼。載笑載言。不忘經義。洞曉音律。精別雅鄭。窮先王制作
之意。審風俗淳薄之原。爲文論之。以續樂記。所著文集三十卷。雜說百篇。味其文。知其道矣。至於弧矢之
善。筆札之工。天縱多能。必造精絕。本以惻隱之性。仍好笠乾之教。草木不殺。禽魚咸遂。賞人之善。常若不及。
掩人之過。唯恐其聞。以至法不勝姦。威不克愛。以厭兵之俗。當用武之世。孔明罕應變之略。不成近功。
偃王躬仁義之行。終於亡國。道有所在。復何媿歟。嗚呼哀哉。二室南峙。三川東注。瞻上陽之宮闕。望北邙
之雲樹。旁寂寂兮迥野。下冥冥兮長暮。寄不朽於金石。庶有傳於竹素。其銘曰。

天鑒九德錫我唐祚。縣縣瓜瓞。茫茫商土。裔孫有慶。舊物重覩。開國承家。彊吳跨楚。喪亂孔棘。我恤疇依。聖人旣作。我知所歸。終日靡俟。先天不違。惟藩惟輔。永言固之。道或汚隆。時有險易。蠅止于棘。虎遊於市。明明大君。寬仁以濟。嘉爾前哲。釋茲後至。亦觀亦見。乃侯乃公。沐浴玄澤。徊翔景風。如松之茂。如山之崇。奈何不淑。運極化窮。舊國疏封。新阡啓室。人惎之謀。卜云其吉。龍章驥德。蘭言玉質。邈爾何往。此焉終畢。儼青蓋兮。祚祚驅素虬兮。遲遲卽隧路兮。徒返望君門兮。永辭庶九原之可作。與綠嶺兮相期。垂斯文於億載。將樂石兮無虧。

穆夫人墓誌銘

柳開

漢開運元年開叔父諱承贊卒。叔母穆年二十有七。娶居四十五年。歲己丑五月歿於家。後七年葬叔父墓中。唐季我先人塋館陶縣北三十里。周廣順中始葬叔父大名府西南二十里村曰馮杜。開近歲連上書。天子哀之。賜錢三十萬。使葬先臣之屬。得華州進士王煥襄其事。煥義者也。恭恪弗懈。成開之心。柳宮姓爲地法。利坤艮。自叔父墓東下十七步。我皇考之墓。又東下仲父諱承昫之墓。各以子位從之。又東下叔父諱承陟之墓。步悉如九數。叔陟無嗣。以季父諱承遠之墓同域焉。故昭義軍節度推官閔叔母長子也。閔叔父卒始生次子也。趙氏故婦女也。次病廢老於室。開爲兒時見我烈考治家孝且嚴。視叔母二子常先開與閔。我母萬年君愛猶已出。勤勤儲儲。常懼有闕。乃叔母至老。我二兄至成人。不類諸孤兒寡婦。月旦望諸叔母拜堂下畢。卽同上手抵面聽奉我皇考誡告之曰。人之家兄弟無不義盡。因娶婦入門。異姓相聚。爭長競短。漸漬日聞。偏愛私藏。以至背戾。分門割戶。患若賊讎。皆汝婦人所作。男子有剛腸者幾。

人能不爲婦人言所役。吾見多矣。若等寧是乎。退卽惴惴閉息。恐然如有大誅責。至死不敢道一語。爲不孝事。抵開輩賴之得全其家也。如此嗚呼。君子正己直其言。居上其善也。家國治焉。小人枉已私爲言。居上不善也。家國亂焉。旨哉君子也。銘曰。

昔我叔之去世兮。垂嚴誠之深辭。指穆母而告云兮。惟夫婦之有儀。伊生死之孰免兮。於貞節而勿虧。代厚養以多屬兮。家復貴而偶時。寧不完於安佚兮。胡適彼而亡斯。介如石之克鮮兮。衆猶草之離離。母血涕以奉教兮。哀心以自持。畢考命之惄孤兮。終天地而弗移。噫噦過此兮。母曷爲知。

徐文質墓誌銘

穆脩

進士徐孝山喪其父。執喪之三日。以其友張生道卿所錄父事。拜且泣。復授之張生。并繼以語。俾來請曰。孝山未卽殯生。尙惟喪事不可緩。將卜葬以某日期。日且迫。敢迹其實。託銘於先生。用刻而納之。以光永幽穸。予旣受而閱其始卒。乃謂曰。是葬也。蓋得其禮矣。比是今貴家富族。將葬其先。必惑葬師說。拘以歲月畏忌。大至違禮過時。久而不克葬者多矣。生能葬以其道。正合士禮踰月之制。此獨可尙。又安得拒請而勿銘也。按君諱文質字處中。其先祖父嘗寓籍并土之文水。逮君之考。猶爲晉人。考生未亂而孤。見教育子季父氏。旣而復會朝廷。以兵取太原。太原平。大徙并民入處之京。輔考於時。與其族來至京師。遂家焉。自是得遊太學。爲生徒。治春秋經傳。前後四舉有司。竟不及祿而終。考始娶穎川陳氏女。亡。再娶清河張氏。生男子二人。女子二人。次子文蔚。少卒。獨君爲前室。陳氏所生二女子。今皆適京師良族。由君而下。始爲京師里人。凡并人。其俗剛厚而勤嗇。能而節損。以立衣食。諸來徒之戶。初雖貧極者。居久而皆爲富。

室矧其宿有齋者蓋可知故考亦用是而殖其家考之歿貽其規法於君君於此益爲之善守者也君嘗念陳氏早世又傷父之不逮故事後親彌盡其力無何數年母張氏又終初君亦嘗授經於儒官馬龜符有慕仕進心至悼親之繼喪顧門中時無彊子弟可任懼覆先人遺業則爲不肖子因刻力事生於家非時慶吊大事不出門如此者蓋有年天聖八年適五十忽得疾醫累月弗愈以是年七月十七日卒於居君凡四娶室輒有喪有四男五女初室李氏無子長子孝山出次室李氏景山德山皆未及娶五女子亦幼在室孝山有諸弟妹合族謀葬得其年八月之二十一日藏君於東京之祥符縣開封鄉西韓村先墓之次以次室李氏爲合初李氏次苗氏李氏三室皆同穴而異棺斯實禮也銘曰惟古之葬等殺異宜日月有數舉無越斯末代不然惑於葬師陰陽拘忌率常過時其孰警此伊徐氏子以時而葬順禮之軌旣合旣祔有銘有紀如君之藏民亦鮮矣

种世衡墓誌銘

君諱世衡字仲平國之勞臣也不幸云亡其子泣血請於予予嘗經略陝西知君最爲詳懼遺其善不可不從而書之初康定元年春夏戎犯延安我師不利朝廷以堡障衆多有分兵之患其間遠不足守者卽命罷之寇驕而貪益侵吾疆百姓被其毒君時爲大理丞任鄜州從事建言延安東北二百里有故寬州請因其廢壘而興之以當寇衝左可致河東之粟右固延安之勢北可圖銀夏之舊有是三利朝廷從之以君董役事君膽勇過人雖俯逼戎落曾不畏憚與兵民暴露數月且戰且城然處險無泉議不可守鑿地百有五十尺始至于石工徒拱手曰是不可井矣君曰過石而下將無泉耶爾攻其石屑而出之凡一

范仲淹

畚償爾百金工復致其力過石數重泉果沛發飲甘而不耗萬人歡呼曰神乎雖虜兵重圍吾無困渴之患矣用是復作數井兵民馬牛皆大足自茲西陲堡障患無泉者悉倣此大蒙利焉旣而朝廷署故寬州爲青澗城授君內殿承制知城事復就遷供備庫副使旌其勞也塞下多屬羌向時漢官不能布恩信羌皆持兩端君乃親入部落中勞問如家人意多所周給常自解佩帶與其酋豪可語者有得虜中事來告於我君方與客飲卽取坐中金器以獎之屬羌愛服皆願効死青澗東北一舍而遠距無定河河之北有虜寨虜常濟河爲患君屢使屬羌擊之往必破走前後取首級數百牛羊萬計未嘗勞士卒也故功多而費寡建營田二千頃歲取其利募商賈使通其貨或先貸之本速其流轉歲時間其息十倍乃建白凡城中芻糧錢幣暨軍須城守之具不煩外計一請自給一子專視士卒之疾調其湯餌常戒以笞責期于必瘳士卒無不感泣今翰林承旨王公堯臣安撫陝西言君治狀上悅降詔褒之曰邊臣若此朕復何憂二年就兼鄜延路駐泊兵馬都監制置本路糧草遷洛苑副使慶曆二年春予按巡環州患屬羌之多而素不爲用與夏戎潛連助爲邊患乃召蕃官慕恩與諸族酋長僅八百人犒于麾下與之衣物縉綵以悅其意又采忠順者增銀帶馬絨以旌之然後諭以好惡立約束而俾之遵向然悍猾之性久失其馭非智者處之慮復爲變時青澗旣完人可循守乃請于朝願易君理環朝廷方以青澗倚君又延帥上言人重其兵則勢危斯急病也君乃周行境內入屬羌聚落撫以恩意如青澗焉有牛家族首奴訛者屈彊自處未

嘗出見官長聞君之聲始來郊迎君戒曰吾詰朝行勞爾族奴訛曰諾是日大雪三尺左右曰此羌兇詐嘗與高使君繼嵩挑戰又所處險惡冰雪非可前君曰吾方與諸羌樹信其可失諸遂與士衆緣險而進奴訛初不之信復會大雪謂君必不來方坦臥帳中已至蹙而起之奴訛大驚曰我世居此山漢官無敢至者公了不疑我耶乃與族衆拜伏誼呼曰今而後惟父所使自是屬羌咸信於君有兀二族受夏戎僞署君遣人招之不聽即使慕恩出兵誅之死者半歸者半盡以其地暨牛羊賞諸有功其僕受僞署如兀二族者百餘帳咸股慄請命納其所得文券袍帶由是屬羌無復敢貳君戒諸族各置其烽火夏戎時來抄掠則舉烽相告衆必介馬而待之破賊者數四涇原帥葛懷敏定川之敗戎馬入縱于渭予領慶州蕃漢兵往扼邠城又召君分援涇原君卽時而赴羌兵從者數千人屬羌爲吾用自此始君曰羌兵既可用矣乃復教土人習弧矢以佐官軍吏民有請某事辭某事者君咸使之射從其中否而與奪之坐過失者亦用此得贖吏農工商無不樂射焉繇是緣邊諸城獨環不求增兵不煩益糧而武力自振夏戎聞屬羌不可誘土人皆善射烽火相望無日不備乃不復以環爲意前後經略使交薦君之才能朝廷益知可倚卽明年遷東染院使充環慶路兵馬鈐轄仍領環州西南古原州之疆有明珠滅臧康奴三種居屬羌之素號彊梗在原爲孽寢及于環撫之很不我信伐之險不可入北有二川交通于夏戎朝廷患焉其二川之間有古細腰城復之可斷其交路又明年予爲宣撫使乃諭君與原守蔣偕共幹其事君久悉利病卽日起兵會階于細腰使甲士晝夜築之夏戎固忌此城君遣人入虜中以計款之兵遂不至又召明珠等三族酋長犒撫之俾以禦寇彼旣出其不意又亡外援因而服從君之謀也君處細腰月餘逼以苦寒城

成而疾作。慶曆五年正月七日甲子啓手足神志不亂。享年六十一。葬于京兆萬年縣之神和原。君之先河南洛陽人也。曾祖存啓。河南壽安令。祖仁詡。京兆長安令。贈太常博士。父昭衍。登進士第。累贈職方員外郎。季父放字明逸。初隱于終南山。君少孤。依之服勤。左右以力學稱。明逸道高德純。太宗朝再詔以事親不起。真宗復加聘禮。起拜左司諫。直昭文館。累遷尙書工部侍郎。大中祥符五年。君用工部蔭得將作監主簿。五遷至太子中舍。初監秦州太平監。以母老求養。又監京兆府渭橋倉。邛州惠民監。知涇之保定。京兆之武功。涇陽三邑。在武功毀淫祠。崇夫子廟。以來學者。在涇陽有里胥王知謙者。姦利事露。逃之。逼郊禮乃出。君曰。送府則會恩。益以長惡。從所坐杖脊于縣庭。而請待罪。府君李公諮奏釋之。自是豪黠莫不歛手。其嫉惡如此。又邑有三白渠。比年浚疏。用數邑力。主者非其才。而勞逸弗等。功利日削。君使勤墮齊其力。故功倍貧富均其流。故利廣。至今民能言之。歷通判鎮戎軍。環鳳二州。鳳之守王蒙正。託章憲外姻以私干君。復欲以賄汚君。君正色不納。蒙正大怨之。乃使人諭王知謙訟君。蒙正內爲之助。獄成。流竄州上親政。量移汝州。君之世材以一宜讓君。乃除孟州司馬。龍圖閣直學士。李公絃。雪于朝。授衛尉丞。主隨州推酷。又禮部尙書宋公綏。工部侍郎狄公棐。皆言君非辜。改知虔州。贛縣君辭得監京兆軍資庫。以同鄜交辟。改簽署同州判官事。又移鄜州。因從軍延安。乃有故寬州之謫。君少尙氣節。昆弟有欲析其家者。君推資產與之。惟取季父圖書而已。蒞官能摘惡庇民。青澗與環人皆畫君之像而享事之。及終。吏民暨屬羞曾長朝夕臨柩前者數日。朝廷深惜之。賜三子恩。君娶劉氏。封萬年縣君。男八人。長曰詰。文雅純篤。養志不仕。有叔祖明逸之風。次曰診。試將作監主簿。曰詠。同州澄城尉。曰譖。郊社齋郎。曰譎。三班奉職。

皆有立訢記誼三子尙幼一女適西頭供奉官田守政君在邊數年聚貨食教弧矢撫養士伍牢寵羌夷無賢不肖皆稱之又出奇以濟幾事嘗遣諜者入虜中凡半歲間而虜誅握兵用事二三人諜者還言某謀得行會君已沒又天子方懷來故其績不顯銘曰

嗚呼种君出于賢門吾志必立吾力是陳寧以剛折果由直伸還自瘴海試于塞垣權以從事意其出人捍虜之患又邊之民夙夜乃職星霜厥身生則有涯死宜不泯邊俗祀之子子孫孫

范純佑墓誌銘

富弼

僕天聖初始識范文正公於海陵未幾公遊文館僕再舉進士來京師又見之公益厚我間或造其門目公傍一童子方十歲許神重氣遠如老成人僕竊詢焉卽公之長子也已能誦詩禮泛讀諸書爲文章籍籍有可稱者所與遊皆一時之俊時天下庠序未甚興公典姑蘇首建郡學聘安定胡瑗爲先生瑗條立學規良密生徒數百多不率教公患之君尙未冠輒白于庭入學齒諸生之末盡行其規約久之人皆隨而不敢犯自是蘇之學遂爲諸郡倡寶元中西戎叛一方盡驚公連易關陝官皆不出兵間君侍行日與將卒錯處鈞微擿隱悉得其良駕由是公任人無失而屢有功公帥環慶也議城馬鋪寨寨逼賊境賊懼城成而扼其衝故常寇撓之使我不得城君率兵馳據其地賊衆大至且戰且督役數日而成一路恃以安人又知君材武有足嘉者後公以讒罷知政事君亦逡巡於仕進間從公之鄧暴得疾昏不省事廢臥許昌僕守淮西過其家省之猶能感慨道忠義問僕之來公耶私耶僕曰公曰公則可噫人一有疾已不能自顧其形骸奚暇他卹如君病昏身已棄而尙不忘公忠豈非根乎至性第昏於事而性終不昧耶茲

尤異於人。可貴重而不可學者。病十九年卒于襄邑弟純仁之官舍。年四十九。君英悟天得尙節行。事父母盡孝養。未嘗去左右。文正愛之甚。日夕以講求道義爲樂。亦不欲其遠去。君雖文學自富。固不肯應鄉里舉。不得已以蔭授守將作監主簿。亦慙爲跋下司竹監。非其好也。卽解去。使君壽且不病。得施其所有。於時良能美業。其少諸君名純佑。字天成。娶長葛李氏。一男正臣。守太常寺太祝。一女嫁故人子進士元。受早亡。純仁謀歸葬河南萬安山先壟之側。行有日。走京師來乞銘。僕已銘其父。今又銘其子。悲夫。銘曰。君之才之賢。宜有祿有年。一命而盡不復遷。病十九年不復痊。今其云亡報已篤。英名不隱兮何足嘆。

